


REGIME DE VIVRE, ET CONSER- vation du corps humain, auquel est amplement discours des choses na- turelles, & de tous viures qui sont cō- munement en vſage, avec plusieurs receptes bien approuuées: le tout nouuellement recueilly des bons auteurs, tant anciens que mo-

~~de l'Académie~~ dernes. *J. B. de la Roche.*




A P A R I S,

Pour Vincent Sertenas Libraire, tenant ſa
boutique au Palais, en la gallerie
par ou on va à la Chancellerie.

M. D. L X I.

AVEC PRIVILEGE.



REGIME DE

VIVER ET CONDUIRE
l'homme de bien, et de
s'acquiescer à la destinée
qui lui est assignée, avec
satisfaction et sans
recours à la violence.
C'est le but de ce
bon régime, tant
pour l'individu que
pour la société.



A PARIS
Pour l'Édition, chez la Citoyenne
Bachelier, au Palais, et la Citoyenne
Lafont, au Palais National.
M. D. C. C. I.
Avec Privilege.

REGIME DE VIVRE;

ET CONSERVATION DV CORPS

humain, auquel est amplemēt discours
des choses naturelles, & de tous viures
qui sont communement en vsage: avec
plusieurs receptes bien approuuées: le
tout bien amplement recueilly des bons
auteurs, tant anciens que modernes.

ET PREMIEREMENT

DE L'AIR.

CHAP. I.



L est bien decent & conue-
nable à chacun de mettre sa
cure & sollicitude à euter &
fuir les occasions des mala-
dies & passions emergentes,
ausquelles le corps humain
est de iour en iour subiect &
enclin: & combien que la cōplexion y soit sub-
iecte, ce nonobstāt y obuier & mettre bon reme-
de & cōuenable, en s'abstenant de prendre aucūs
breuuages & viandes: à celle fin que par l'attré-
pance & proportionalité corporelle la santé &
prosperité soit conseruée & gardée: car il n'a rien
esté donné naturellemēt à l'humain lignage, fors
que les vertus & dons de l'ame, qui soit si bon ne

tant à desirer que santé. Et à bien considerer, les operations & vertus de l'ame ne se peuvent bien faire & accöplir sans la santé corporelle: & sans icelle on apprendroit en vain, & perdrait on sa peine d'apprendre & sçauoir les sciences & vertus: car quand le corps est malade, il est quasi impossible de faire aucune chose qui soit profitable: & ce est assez notoire. Parquoy vn chacun doit diligemment mettre peine à garder santé, en ensuyuant les reigles cy dessoubz escrites: & sur toutes choses s'estudier & mettre sa cure à elire le meilleur air & le plus sain pour son habitation & demeure: laquelle chose ne profitera pas seulement pour la conseruation de santé, mais plus pour la perfection & augmētation de raison & d'entendement. On trouue aussi par le dict & auctorité des anciens, & mesmemēt par experience (qui est la maistresse de toutes choses) que l'air lequel est gros & infect ne gaste pas le corps seulement, mais hebeté, obscurcist & rend totalement l'esprit & l'entendement gaste, & destruiēt toutes les vertus, & force de courage & de l'ame: tout ainsi que la rouilleure gaste le fer. Parquoy l'ö ne doit point vouloir demourer en vn lieu anguste & estroit, auql n'y a point d'air, & lá ou l'air n'est point eüé. Et ne doit on point demourer au parfond d'une vallée ou il y ayt fosses d'eau dormant, & semblablement de bourniers. Et combien que le Philosophe die que le moindre des elemens ne peut estre contaminé ne pourry, toutesfois si l'air est meslé avec les vapeurs terrestres & aquatiques, il est faict plus gros & plus pesant, & se peut contaminer &

miner & pourrir. Et de tant que la matiere de laquelle est faicte l'euaporation est mauuaife, d'autant plus est l'air mauuais & d'agereux: & qui plus est, il est aucunes fois rendu si infect & corrompu par aucunes eaux & terres venimeuses, que tout soudainement il faict mourir non pas seulement les oyseaux volés en l'air, mais aussi les bestes brutes & les gens passans par lá. Il fault doncques elire, qui veult auoir s'até, le meilleur air, le plus sain & le plus léger, lequel soit temperé, & ses qualitez selon la diuerse partie de l'an: c'est asçauoir en esté, elire pour son demeure & pour sa residence vne place en laquelle y ayt bõ air, pur, clair, euenté & subtil, declinant à vne frigidité attrempée, & soit directement vers Orient & Septentrion: car en telles regiõs l'air n'est poit tardif à eschauffer quand le Soleil se leue: & aussi semblablement se raffreschist bien tost quand le Soleil se couche. Au tēps d'hyuer lon peut habiter les plus froitz lieux & ausquelz n'y a pas grãds vens, & sont environnez de montaignes & de l'air de Septentrion declinans à vne chaleur attrempée. Et s'il aduient qu'il faille demourer en lieu auquel l'air est pestilentieux & mauuais, il se fault bien garder d'habiter en vne maison vague ou il y ayt grands vens: c'est asçauoir lá ou il vente fort: car par l'alaine & par les pores des veines, quād l'õ demeure en lieu venteux, le venin entre plus facilement aux cœurs des personnes. Parquoy alors fault elire vne maison bien close & fermée de tous costez & nõ vague ne vétueuse: & vne fois le iour soit icelle maison rectifiée & purifiée, en brulant du genéure,

lequel est de bonne odeur, au milieu des salles & des chambres, & en chacun autre lieu de la maison: ou en brulant du chesne ou du myrrhe ou du bois de cypres, ou des bourrées de serment. Et apres il les fault enfumer d'encens & d'un peu de myrrhe, & apres que le feu sera estinct & que ladicte maison sera bien espurgée & nettoyée, si c'est au temps d'esté, il y fault semer des herbes & choses fraisches, comme du saulx, des fueilles de vigne, ou de myrrhe: & apres ce arroser lesdictes herbes ainsi espandues d'eau froide & de vin aigre, en gardât les autres reigles preseruatues de la peste. Et si il y a bon air en la ville ou cité en laquelle on habite & demeure, & on veult aller visiter ses terres & heritages, ou aller quelque part aux champs, & illec faire aucune residence, soit pour un iour ou pour deux autât du plus que du moins, deuant que d'arriuer audit lieu, pour rectifier & purifier l'air qui y est, il est conuenable de bruler du bois dessusdict, & de semer desdictes herbes ou fueilles, en faisant les irrigations dessusdictes: car l'air d'une maison inhabitée lequel a esté longuement clos & enfermé sans estre aucunement euenté, a peu prendre & tirer à soy l'infection des eaux pourries & de mauuaises qualitez, laquelle infection il faict bon rectifier deuant que d'entrer audit lieu, cōme dict est: car le feu, principalement celuy qui est faict de bois odoriferât & de bonne odeur, purifie & nettoye toute l'infection & mauuaise qualité de l'air. Or dōcques toutes les inattempances de l'air sont à fuir & euitter, veu que l'air est si necessaire à nostre vie: Car

par luy & par son inspiration le poulmon donne refrigeratiō au cœur, & l'esuente qu'il ne vienne à trop grande chaleur, & par ce aussi que par luy le cœur est mondifié & purgé de toutes fumositez & vapeurs fumeuses: & aussi sur toutes choses les chaleurs rabieuses sont biē à fuir & euter: car ilz resoluent & debilitent le corps, & semblablement avec anxieté debilitent & font perdre l'appetit, & exhaler & expirer la chaleur innée. Semblablement aussi preparent & disposent les humeurs à putrefaction & pourriture. Et souuentefois les vės de midy font venir ces accidēs cy, & avec ce aggrauent fort la teste, & assourdissent l'ouye: Parquoy se fault garder de soy exposer aux vens de midy. Et pour ceste cause les anciēs ont commandé d'habiter les lieux frais, & que les palais & edifices qui sont vers la region de Boreas & de Septētrion eussent grandes & larges fenestres, à celle fin que pour estre plus idoine & meilleure à habiter la maison, soit toute inspirée de l'air de Septentrion. Mais il est conuenable de soy garder de l'air quand il est trop froid. Et iacoit ce que le froid lequel n'est pas aspre, mais moyte, face faire bonne digestion, & qu'il donne vigueur à la chaleur naturelle pour mieux nourrir les parties interieures du corps, ce neātmoins quand il est trop aspre & vehemēt, & propremēt quand Boreas vente, il mortifie la chaleur naturelle, & prouoque douleur aux nerfz & à la poitrine, la toux, les catherres & coliques passions. Et adonc est commandé & est bien necessaire auoir maisons bien closes, & à force de feu bien

chauffées, & auoir robes bien espesses & bié fourrées pour garder le corps de toutes les maladies dessusdictes. Et quand fera bon se chauffer, il se fault garder de trop superflüement se chauffer pour les inconueniens qui y sont.

D V D O R M I R E N L I E V

voulté sans ouuerture, avec du feu de

charbon. Chap. ij.

SVr toutes choses ce est bien à craindre, & doit son mettre grand cure & sollicitude si au temps d'hyuer il cōuient dormir ou habiter en chābre voultée, ou habitatiō voultée de toutes pars, close & fermée sans air ne ouuerture; qu'il ne soit pmis auoir feu de charbō. Car cōme dit maistre Benoist de Murfia Docteur en medecine, aucuns de son temps sont mors soubdainement de la fumée & des vapeurs venimeux du feu de charbō: & que entre autres choses le cas est aduenü, que vne fois ses escolliers le menerent à vn de leurs compagnons, lequel estoit à demy mort, & auoit ia perdu l'entendement & la parolle, pour ce qu'il auoit alumé du feu de charbon en la chambre voultée ou il estudioit, lequel incontinent le fist porter à l'air esüenter, & froter la teste de bonnes odeurs, & par telles odeurs incontinent recouura l'entendement & la parolle; & en c'est hyuer plusieurs prisonniers (ainsi que le recite ledict maistre Benoist) fussent perilz par ce qu'ilz auoient du feu de charbon, & s'estoient endormis en la prison aupres dudit feu, si n'eust esté l'un d'eux

d'eux qui se mouroit, leql s'ecria si haut à l'huy
de la prison, que ceux qui l'ouyrent en eurent
pitié, & si on ne les eust secourus hastiuement ilz
fussent tous periz. Et si aucunesfois estoit neces-
saire de faire du feu de charbon, il faudroit ou-
rir les fenestres ou l'huis, à celle fin que les fu-
mées vniuerselles s'en allassent: & au regard de ce
qu'aucuns mettent du voirre entre les charbons,
il n'y profite en aucune maniere.

DE L'EXERCICE, ET

d'eiter: oyfueté superflue.

Chapitre iij.

POUR ce que l'exercice atrempé & lequel est
raisonnablement pris, est vn singulier remede
pour la conseruation de santé, à ceste cause le su-
perflu & oyseux repos, & lequel est contraire à
l'exercice, comme le grand ennemy de santé, est
à eiter & fuir: car tout ainsi que par la rouilleu-
re le fer est consummé & myné, en semblable ma-
niere le corps humain par oyfueté est rendu ine-
pte, inutile, pesant & malfaisant: par oyfueté
aussi la chaleur naturelle est gastée & diminuée:
l'esprit aussi & l'entendement en est agrossi & a-
lourdy: & par elle sont retenues les superfluitez
dedans le corps: lesquelles preparent les humeurs
du corps à pourriture. Oultre plus oyfueté chā-
ge & mue les bonnes complexions, prepare &
donne voye à plusieurs & diuerses maladies, dōt
le corps est preserué & gardé par exercice mode-
rément prins. Certainement exercice est tresin-

guliere & speciale medecine : car il preſerue les corps humains de griefues maladies, ou il reſolue inſenſiblemēt les ſuperfluitez de toute digeſtiō, ou les fait & rend plus habiles & conuenables à reiecter, parquoy il nous excuſe & faiēt que par luy nous n'auons que faire de prendre medecines laxatiues : leſquelles le plus ſouuēt par venin precipitent & inueterent le corps. Exercice ſemblablemēt garde que les matieres ne ſ'aſſemblent dedans le corps, & qu'elles ne rendent la perſonne replete. Il viuifie & corrobore la chaleur naturelle & prepare la digeſtion. Oultre-plus exercice rend les membres plus habiles à receuoir bonnes nourritures, & faiēt que par luy les membres ſont mieux ſouſtenuz, nourriz & alimentez de la viande que le corps prend, & rend les membres fort agiles & prōpts en toutes les œuures auſquel les ilz peuuent ſeruir. Fault donc eſtudier à l'vſage de ce trefloüable exercice : toutesſois il ne ſe doit iamais prendre quand le corps eſt vain, & qu'il n'a ne beu ne mangé. A l'opposite auſſi ne ſe doit point prendre incontinēt apres que le corps eſt biē ſaoul & replet: Mais fault auoir regard cō bien de temps il y a que lon a prins ſa reſectiō, & ſi la viande peut eſtre ia deſcēdue en bas, & fault attendre que la ſeconde digeſtion ſoit faiēte : laquelle ſelon la diuerſité des complexions & qualitez des perſonnes eſt ſouuent prolongée. A ceſte cauſe l'exercice ſera bō & tresvtile mais qu'il ſoit prins bien pres de l'heure en laquelle lon veult prendre ſa reſection, c'eſt adire vn peu deuant que lon vueille mager. Premieremēt à celle
fin

fin que le corps soit purifié par turine & des autres superfluitez, selon l'opiniõ de Galien le grãd medecin en son liure qu'il a faict de la petite spe-
 re, lon doit elire l'exercice non pas seulement ce-
 luy qui faict labourer le corps, mais aussi celuy
 qui rend l'entendement & le courage ioyeux,
 car comme il dit plusieurs ont esté deliurez, sa-
 nez & guariz de griefues maladies pour soy res-
 iouir seulemẽt. Et entre tous autres exercices ice-
 luy Galien loüe le ieu de la petite paulme, mais
 qu'il soit attrempé, neãtmoins cest exercice est le
 plus à loüer, par lequel tous les mēbres prēnēt la-
 beur & trauail. Et ne fuffist pas audict exercice
 que tous les mēbres trauaillēt, mais en leur trauail
 & labeur fault qu'il y ait iusticiable proportiõ, cõ-
 me audit ieu de la petite paume, auquel les iābes
 & les bras trauaillēt le plus, mais les autres mēbres
 tant interieurs qu'exterieurs se mouuēt selõ l'exi-
 gence naturelle. A ceste cause labeur & exercice
 des escriuains est le plus reprouué de tous les ex-
 ercices, pource que l'entēdemēt seulemẽt & les
 bras trauaillēt & labourēt, & selõ la forme & ma-
 niere dessusdicte aurāt qu'il sera possible. Il est cõ-
 uenable d'aller aucunesfois à la chasse & de se
 pourmener, aller à cheual & faire tout autre bon
 exercice. Et adõc fault laisser l'exercice & y met-
 tre fin quād on est à la grosse alaine: & quād lõ se
 cõmēce à fascher & ennuyer, sēblablemēt quād
 on voit q̃ les mēbres sont eschauffez iusq̃s à suer,
 il est adõc bõ d'aller en vne chābre close & chau-
 de, & despoiüller sa chemise premier que le corps
 soit refroidi, & puis estre froté deuāt le feu de lin-
 ge blāc & delié, car cela nettoye toute superflui-

*L'opinion
de Galien
reprouee*

té de sueur. Et incontinent fault estre reuestu de
 chemise de lin nette & fraische, & si le temps est
 froit, doit estre premieremēt reschauffée: que lon
 se garde toutesfois autāt qu'il sera possible de la-
 beur superflu, & exercice pris en vain, & ne sois
 point si fol que ta ieunesse ou ta force te deçoie
 tāt que tu oublies ta santé. Il nous fault estre aua-
 ricieux de santé quand nous sommes sains: car a-
 donc commencerions nous trop tard à estre aua-
 ricieux de santé quand nous serions vieulx ou ma-
 lades. Et si d'aventure il fault & conuiēt aller en
 armes pour la pvince, ou chasser, & soy fastiguer
 & trauailler, fault bien craindre & prendre garde
 apres qu'on aura prins trop grand labour que lon
 ne prenne repos en lieu trop euenté & exposé à
 vent par la distillation de l'air: car adonc la distil-
 lation de l'air perceroit & penetreroit les pores
 & entreroit iusques aux parties interieures du
 corps: laquelle chose induiroit disposition de
 tresgriefues maladies.

Oultre plus si tu veus auoir santé, quand tu
 seras leué au matin peigne tous les iours les che-
 ueux de ta teste, & la frôte d'un linge legeremēt,
 & la laue vne fois la sepmaine à ieun: car auoir la
 peau de la teste & les cheueux netz & essuyez, ce-
 la purifie le cerueau des caligineuses & superflues
 vapeurs, & faict l'entendement plus clair & plus
 agu. En apres fault que tu laues tes piedz vne fois
 la sepmaine au soir deuant soupper, ou quād tu ieu-
 neras à l'heure q tu te voudras coucher, & apres
 que tu auras laué ta teste & fait froter au tēps d'hi-
 uer de vin avec decoctiō de romarin, de saulge &
 de cyperi,

de cyperi, & d'autres ſéblables. En eſté plus ſou-
 uent aux heures deſſusdictes, laue la d'eau tiede
 avecques decoction de roſes, fueilles de myre, &
 autres ſemblables, & celá ſera tresbó. Car il faiçt
 dormir plus paiſiblement, & en meilleur repos
 & plus pacifique, il deſcharge & allege la teſte &
 toute les parties ſenſitiues. Et ſemblablement il
 deſtourne & faiçt aller en bas les fumées montans
 au cerueau. Et avec ce nettoie & purifie les par-
 ties ſuperieures. Se faut garder de baigner en eau
 en laquelle y a ſouphre, ſi on n'en eſt contrainçt
 par aucune emergente & accidentale paſſion.
 Car vn tel baing nuist meſmement à ceux qui
 ſont pleins de ſanté en debilitant l'appetit & ex-
 tenuant l'appetit des membres principaux. Et ſi
 d'aventure il aduient que pour ſe lauer on entre
 en telles eaues de mer, pour ſ'y baygner, que ló ſe
 garde de l'infuſion de la teſte, & incontinent l'a-
 blution faiçte deuant que la peau prenne rou-
 geur, fault ſortir de l'eau. Que lon ſe garde auſſi
 de baigner en eau actuellement froide. Et ſi d'a-
 uenture à cauſe de la ſueur precedente ou ſuper-
 fluité de la peau il prent enuie à quelque perſon-
 ne de ſe baigner en ladicte eau, deuant que d'y
 entrer doit eſtre meſlée avec eau tiede, avecques
 laquelle les roſes, le mirre, cappillus veneris, ou
 autres ſemblables auront aucunement bouilly.

Au temps d'hiuer, il faiçt bon entrer aux eſtu-
 ues, mais qu'elles ne ſoyent point trop chaüdes.
 Et ſi toſt que lon ſera eſtuué & ſoubdainement
 torché, il ſe fault eſtandre dedans de beaux draps
 blancz en vn liçt, avecques groſſe & eſpeſſe cou-

*L'ame
 du liçt*

uerture, à celle fin que la froidure de l'air ne frappe ou ataigne les mēbres, mais il fault entendre que les estuues sont sur toutes choses defendues au tēps de pestilēce pour plusieurs causes & raisons. Premièrement pource que plus facilement est faite resolution des humeurs. Secondement pource qu'en lieux voutez, & par especial quand les corps sont nudz rechauffez, le venin communique plus tost aux cōpagnies estans ausdictes estuues, laquelle chose est trespangereuse quand aucun de la compagnie à quelque maladie contagieuse. Et certainement d'une alaine infecte peut aduenir grande infection avec contagieuses maladies à toute la compagnie: car quand on est ausdictes estuues, & que la personne immōde & infecte expire & reiecte son alaine, incōtinent il est force que les autres l'inspirent & tirent à soy. Et ne se doit on point baigner incōtinent apres qu'on a trauaillē & prins labeur, mais il y a heure requise & conuenable: c'est asçauoir quand l'estomach n'est trop vain, ne trop vuide, ne trop replet, ainsi que dessus est dit de l'exercice. Si ce n'estoit que celuy ou ceux qui se vouldroyēt baigner se vouldissent engressir: car les medecins commandent à ceux qui se veulent engressir qu'ilz se baignent incōtinent apres qu'ilz auront bien repeu & mangē: car pour certain le baing & les estuues amaigrissent fort ceux qui sont fameliques, & les font seicher filz y sont longuement: mais ceux qui se baignerōt saoulz, tant & si longuemēt qu'ilz serōt saoulz & repletz ilz engresserōt. Et nota que ceux qui ainsi se veulent engressir doyuent bien
soy

foy garder des opitulations lesquelles facilement aduiennent au baing, durât ladicte repletion : car elles sont productiues de plusieurs maladies.

*DU DORMIR ET DU
VEILLER.*

Chap. iij.

TOut ainsi que pour la conseruation de santé corporelle il est opportun & conuenable de adiouster repos proportional, raisonnable & nō excessif aux mouuemens & exercice du corps, semblablement il est conuenable proportionner le dormir par veiller. Et iagoit ce qu'il soit à l'hōme indifferent de dormir ou de veiller, toutesfois le seigneur & maistre de toutes choses la pl^e crée pour veiller & labourer, que pour dormir & prédre repos, ainsi comme dit Mantue le Poëte. Souuienne toy que Dieu n'a pas crée l'homme pour prédre ses delices & voluptez charnelles. Et ainsi comme dormir & prendre repos sont semblables, ainsi est la vigilation semblable au mouuement. Et labeur & operation sont des bōnes fins de l'humain lignage. Et si ne sçauroit-on aucune bōne œuure accōplir ou estudier à quelque chose faire sās veiller: car en dormāt il est impossible de rien faire. A ceste cause les Philosophes dient que le veiller est disposition du viuāt: par laquelle disposition chaleur naturelle est espendue aux membres exterieurs, & les espritz sont espenduz aux instrumēs de l'entēdemēt & des mouuemēs, à celle fin que d'iceulx ilz vsent à faire quelque

operation, mais nous ne pouuons ne deuons pas veiller excessiuelement, car apres que nous auons trop vueillé nous ne sommes pas si aptes ne si prompts à labourer: parquoy fault mettre grand sollicitude à se garder de trop & superfluellement veiller. Combien que plusieurs au iourd'huy n'ayent que faire de ceste reigle: lesquelz comme ie croy ne sont pas trauaillez par vigilles. Et quād le trauail ou la vigille est superflue elle prosterne & corrompt vertu. Elle diminue la digestion, elle resoust l'esperit & chaleur naturelle: elle debilité la veue, elle seiche le cerueau & semblablement tout le corps, & le prepare & dispose à plusieurs & griesues maladies. A ceste cause le dormir nous est tresoportū, car le repos lequel est attrempé, bien proportionné & non superflu, ou excessif, restaure & restablist les espritz naturez & corrompus par trop veiller, il vigore & fortifie challeur extincte. Il oste lasseté laquelle prouient des vapeurs & de trop veiller, & finalement fortifie toutes les operatiōs naturelles, ainsi comme narre Aristote en son liure qu'il a faict du dormir, & du veiller, disant en ceste maniere. L'œuure de vertu nutritiue profite plus en dormant qu'en veillant, à ceste cause auoient de coustume les anciens de plus habondamment soupper que disner, pour ce que la nuict est plus prochaine du soupper, que du disner. En laquelle nuyct à cause du dormir, la digestion est faicte plus profitable. Ce neātmoins il est conuenable de se garder de trop dormir, pour ce que quand le corps est trop longuement inutile & à repos,

tel dormir

tel dormir ou repos aggraue les vertus motiues, & assourdist & hebetes les vertus sensitives. Il faict perdre l'appetit, il appesantist la teste, finalement il prepare aux froides maladies, & cattherres, non pas que le dormir ne face meilleure digestion que le veiller. Mais il garde que resolution & eiection ne soit faicte des superfluitez corporelles. Le veiller semblablement faict auoir meilleur appetit que le dormir, non pas qu'il face meilleure digestion que le dormir, mais pour ce qu'il fait resouldre & reiecter les superfluitez du corps & donne force & ayde à la vertu expulsive. Le dormir retient quasi toutes euacuations des superfluitez corporelles, sinon qu'aucunes fois prouoque & cause la sueur. Et adoncques fault prendre garde à foy, & enquerir le cōseil du medecin, pour sçauoir s'il est bō de suer ou non. Car la cause prouocquante la sueur est, par ce que le corps a prins plus de viande qu'il ne luy en failloit naturellement. Laquelle il ne peut souffrir, & pour ce luy conuient regetter par les pores en grande ferindité & chaleur, ou pour ce que le corps a indigence & besoing d'estre purgé & euacué. Et adoncques y conuient pourvoir, pour fuyr & euitier l'inconuenient de maladie qui s'en peut par ce ensuyuir & venir. Parquoy si tu veux garder santé il te fault mettre ordre au dormir & au veiller. La proportionnelle quantité du dormir doit estre depuis neuf heures du soir, iusques entre trois & quatre du matin, & adonc se fault leuer & faire sa besongne. Et regulieremēt ne fault dormir que six heures, ou au plus que six & de-

*Ce que nous
la fuyr*

mie, & fault veiller en chacun iour naturel dix & sept heures. Que lon se garde aussi de dormir incontinent apres le manger, pource que tel dormir empesche l'estomach, & apesantist la teste. Il multiplie les caterres, & frequente les douleurs de costé en costé. Il faict perdre le sōme parfond que lon doit prendre de nuict. Et finalement empesche la digestion. Il est donc bon incontinent apres que lon a prins sa refection, non pas ta teste ou le dos à la renuerse, mais quasi tout droit, soy asseoir ou se tenir en quelque lieu, ou sans labeur & sans peine cheminer mille pas tout à loysir, & iusques à ce que la premiere digestion soit faicte & que la viāde descēde de l'estomac au vētre. En telle maniere qu'entre la refection & le dormir il y ait deux heures de distāce, & en cesdictes deux heures est tresbon soy abstenir des occupatiōs de la pensēe, cōme de cogiter ou afficher son entendement à quelque chose faire: car par telles pensēes & meditations lesquelles sont faictes cōme dit est, incōtinent apres la refection chaleur naturelle est distraicte de la digestion. Et le cerueau le quel est organe des vertus cogitatives, c'est asçavoir lesquelles procedēt de la pēsee ou de l'entendement, labeure, & facilement est eschauffé: parquoy est rédu plus apte à recevoir les vapeurs & caterres. Et doit cedit temps de deux heures par ceux qui sont sains passer & estre occupé en choses qui leur sont plaisantes & ioyeuses, tant à voir qu'à pēser. Autāt qu'il est possible lon se doit garder de dormir de iour, car tel dormir est repudié de to^{us} les aucteurs, dāné & blasphemé par ce qu'il debilitē

ou ilz puissent besongner, leur action se cōuertist
 au nourrissement d'une grand' chaleur incrée &
 vaine, parquoy faict abreger la vie. Le meilleur
 dormir que nous puissiōs elire est en la nuit pour
 la disposition du temps, & à cause du silence qui
 est faict de toutes choses. Sēblablemēt à cause de
 l'obscurité de la nuit, & à cause de la fraischeur
 ou frigidité de l'air, lequel repos nocturne a plu-
 sieurs bontez, laquelle part ie laisse à reciter pour
 cest heure presente. Et proprement le dormir le-
 quel est fort parfōd n'est pas excité pour vn peu
 de bruit. Aussi entreromppe le somme est chose
 fort nuyfible: car telle interruption garde & fait
 cesser nature de digerer la viande, & est par ce
 moyen son action discōtinuée à nourrir par les
 meilleures figures. Quant est de la maniere & fa-
 çon de soy coucher pour ceux qui ont l'estomac
 debile & foible, & qui ne font gueres bōne dige-
 stiō, est de se coucher premieremēt sur le vētre &
 sur l'estomac & dormir en cest estat, en ayāt vn pe-
 tit coissin mol sur l'estomac les bras estēduz, & pri-
 cipalemēt quād on sçaura auoir māge viandes de
 forte digestion. Certainemēt telle façon de cou-
 cher dōne grād ayde à digerer: vigore & fortifié
 chaleur naturelle, & gardé d'auoir multitude de
 flumes en l'estomac. Ce neantmoins lon se doit
 garder de mettre ledit coissin si bas & de telle sor-
 te qu'il voyse iusques à la partie du foye, & à cel-
 le fin qu'iceluy foye ne soit trop eschauffe. Et si
 aucunes fois lon veult dormir autremēt lon doit
 commencer le prochain somme sur le costé dex-
 tre, en apres sur le costé senestre selō sa puissance:

Majs

Mais est meilleur & plus profitable dormir sur le costé dextre que sur le fenestre.

D'auantage il se fault garder de dormir à la renuerse: c'est aſçauoir le dos deſſouz: pource que tel dormir prepare le corps à catèrres & à humides & diuerſes maládieſ, & faiſt retourner les ſuperfluitez aux poſteriores parties du cerueau, leſquelles doiuent couler & ſortir par le palais de la bouche & auſſi par les narines. Il aſſourdift & empesche la memoire & remplift les racines des nerfz.

Oultre-plus ſe coucher quaſi droièt & la face droiète, empesche la droiète inſpiratiõ de l'air: auſſi pareillemēt leſ vapeurs fumeux, leſquelz des inferiores parties comme à la cheminée du corps tendēt & montēt au milieu de la teſte, ſ'en retournent finalement aux parties antérieures du cerueau: Leſquelz auſſi quand ilz ſont cõuertiz en humidité ilz n'ont point de droiète voye pour deſcendre, & à ceſte cauſe ilz ſont empeschemēt en ceſte partie. Il fault dõc dormir la teſte droiète proportionalemēt: & la poiètrine auſſi vn peu droiète & leuée avec leſ ſuperieures parties du dos, & eſtre plus fort couuert, & auoir plus de couuerture que lon n'a le iour de veſtemēs veſtus, pource que au dormir leſ eſpritz & chaleur naturelle ſe retirent dedans le corps aux parties interieures & leſ parties exterieures demeurent totalement deſnuées de chaleur. Et fault prédre garde quád on reſoſe la nuit que la Lune ne luyſe ſur aucune partie du corps par la fenestre ou autre pertuis, & principalemēt ſur le cheſ: car telle luyſeur & vmbra de Lune engendre leſ rumes, elle deſlie leſ

froides humeurs, & faict cracher le fâg par la bouche. Le dormir semblablement quand la Lune luyft iufques fur le liêt est plus nuyfible que dormir hors des maisôs, ou que de cheminer & estre tout enuironné de la lueur de la Lune: car quand la Lune espâd vn de ses raiz par la fenestre, ou autre lieu, ce ray-là entre avec toute infuëtion humefactiue & infrigidatiue, & non pas avec toute la lumiere: Pource que lumiere (selon l'opinion des Philosophes) est de soy calefactiue & eschauffe. Iacoit ce que par vn accident elle puisse estre infrigidatiue quand elle est vestue de la vertu des froides estoilles: & a la Lune plus grande lueur & resplendeur aux champs. Pour ceste cause demandoit Aristote pourquoy les nuiëtz de la pleine Lune sont plus chauldes que les autres.

DE PURGER LES CORPS VIVANS

delicatement, à tout le moins vne fois l'an.

Chapitre vi.

Cela empesche lanté corporelle, quand on vuidé ou qu'on euacue ce que lon doit retenir. Et au cōtraire quand on retiët dedans son corps ce que lon doit euacuer & vuider: car à grâd peine trouue-on au tēps present personne si attrépée & si bien proportionnée, qu'elle n'ait besoin de medicine. A ceste cause les corps viuans delicieusement, & lesquelz sōt nourris, soustenuz & alimētez de delicates viandes, doiuent estre purgez à tout le moins vne fois l'an. Semblablement aussi les corps viuans sans auoir peine ne labeur, c'est adire oyssiement: parquoy cōuient à icelles personnes

sonnes vers le prin-temps estre purgez de syrops & de breuuages legers. Et pour les causes dessusdictes est bien à loüer & requis de requerir le conseil d'un expert medecin, à celle fin qu'il cōsidere la debile digestiō de l'estomach, & la multiplication des fleumes & vëtositez, aussi la disposition des catterres, & qu'il ne laisse la naturelle & chaul de complexion, & avec ce la chaleur du foye. Et doit la persōne informer ledit medecin tousiours que sa complexion naturelle est ou pour sa delicate nature, ou pour la regionale cōplexion qu'elle est deliure & guarie d'une petite & legerë medecine, & tousiours corrompu & debilité d'une forte medecine. Ce pëdant fault estudier & prendre peine de vüider deux fois le iour son ventre si est possible, & si naturellemēt on n'a pas de ce faire coustume, & aussi qu'il n'est possible de le faire, fault secourir & ayder à nature par medecines: cōme par suppositoires ou clisteres legers & de cōmune decoction, mais pour les trëchoisons & vëtositez du vëtre fault adiouter en ladicte decoctiō de l'anis, des fleurs de camomille, & autres semblables avec demië vnce de benoiste simple ou plus, & avec huile de rue & sëblables, ou prendre trois ou cinq pillules de aromatibus selō l'opportunité au matin ou au soir vne fois ou deux en la sepmaine: pource qu'elles sont bië faciles à vser & les doit on bië garder, car elles sont fort loüées des medecins: pource qu'elles guarissēt de la douleur & pesanteur de la teste, pductiue de la douleur & fleume du ventre: & sont de grand profit & vtilité à purger & mundifier le cerueau.

des grosses humeurs pourries, elles resistēt aux ca-
 terres, donnēt cōfort à tous les instrumens sensi-
 tifiz. Et finalemēt confortēt la vertu digestiue. La
 description desquelles ie ne metz point icy à cau-
 se & pour euitier prolixité: mais il la fault voir en
 Mesué lá ou il descrit la recepte des pillules Ele-
 phangines: lesquelles pillules avec leur vertu dō-
 nent confort à la chaleur du foye, en ouurant &
 confortant les oppilations. Et quand on sentira
 son estomach estre debile, fault mettre & porter
 sur iceluy estomach vne emplastre appellée Ce-
 rotun, lequel est faict de seule pouldre de Mastic,
 en mettāt in stagnetallo vne vnce de pouldre de
 mastic avec trois gouttes d'huile mastic seulemēt,
 & tenir ledit emplastre vn peu sur le feu iusques
 à ce qu'il se commence à eschauffer & qu'il soit
 amolly: car ledit cerotun est sec de foy. Et quād
 il est sur le feu il s'amollist soudainement, & de-
 uant qu'il se réducisse il doit estre espādu sur du
 cuir en la forme d'vn escusson. Et apres cela doit
 estre mis sur l'estomach. Et tient ledit cerotū tel-
 lement à l'estomach & sans auoir aucun lien qu'il
 ne nuist en façon que ce soit à porter, & n'altère
 point l'estomach en aucune qualité, mais le con-
 forte moult & luy donne puissance de digerer.

Entre toutes les choses medicinatiues & con-
 ducibles l'usage de la recepte cy dessoubz escrite
 est profitable, vtile & necessaire. Premièrement
 elle conforte & profite beaucoup au cerueau, à
 l'estomach, au foye & à la rate, & conforte leur
 digestiue. Secondement à ceux qui sont disposez
 à auoir les fieures, & aux catterres, aux gouttes, aux
 douleurs

douleurs du ventre & amorroides elle donne vn singulier secours & ayde , elle faict auoir bonne alaine à la bouche:elle restaure chaleur & rend la face claire, & principalement elle oste tristesse, & proprement celle de laquelle on ignore la racine : elle refresne les humeurs melancoliques : elle conforte le cœur & faict les espritz plus subtilz & plus agiles:elle resiouïst l'ame:elle induict & faict auoir bonne memoire, & icelle prepare à bonnes meurs:elle rend les corps plus fors & plus puïssans à resister contre le venin . Et ont les anciens Roys fort vsé de ceste recepte laquelle s'en suit.

Recepte.

Rosarum rubearum trium, sandalorū añ dragmam vnam & semis, corticū citri, seminis been albi & rubei, ligni aloes, mentæ siccæ, añ dragmā vnam, & scrupulū vnū masticis, macis, galange, piperis, macropiperis, daronici, nucis muscatæ, gariofilorū, cinnamomi, azari, zinziberis, spice, croci, zeduariæ, cubebæ, añ dragmā vnam, corallorū nō perforatorū , fragmentorū zaphiri, hyacinthi, smaragdi, sardini oſis de corde cerui, limaturæ eboris, limaturæ auri, limaturæ argēti, añ dragmas duas, reubarbari, mirabolanorū citronorū, chebulorū nigrorū, exictimi lapidis lasuli secūdum artē abluti & præparati, añ scrupulum vnum & semis zuccari albi libras duas & semis. Fiat electarium, prius tamen de purato zuccaro cū succo boraginis, buglossæ, melissæ, añ vncias tres. Et si l'odeur du mucs nous est agreable, aromatizetur cū musci granis tribus. On peult prédre de la cōfection de ceste presente recepte trois ou quatre fois le

mois à soleil leuant la quâtité d'vne cuiller. Et apres ce auecques vn peu de vin pur, fault ieusner à tout le moins par trois heures deuant que prendre sa refection.

L'vsaige de tyriacque en hyuer, & metridact en esté pour la conseruation de santé est fort approuué & loué par les auteurs. Semblablement nul ne doit estre prôpt à se faire saigner, si ce n'est par grande necessité. Car nous deuons grandement garder nostre sang, lequel est le tresor de nature. Et iacoit ce qu'il n'y ait point de meilleure euacuation que de se faire saigner quand le sang est corrompu, neantmoins il n'y a point de plus grâd erreur que de se faire saigner sans que le sâg ait aucun vice ou corruption. Et pour ceste cause il est bien requis d'auoir le cōseil du medecin en tel cas. Mais si d'aventure aduenoit que lon fâgnast du nez, ou que lon eust le flux de ventre ou les emorroides, il ne les fauldroit pas restraindre sans le conseil d'un sage & expert medecin. Pour ce que le corps par vn tel flux, mais qu'il ne soit point vehement, & qu'il ne dure pas longue mêt, est preserué & gardé de plusieurs maladies. Endurer & souffrir grand fain le long & l'espace d'un iour, ou estre réply & saoulé de viandes plus qu'il n'appartient naturellement & oultre raison & mesure, cela prepare le corps à diuerses & grieues maladies. Et ne doit on iamaishoire ne mēger durât la santé, iusques à ce que premieremēt on ait eu fain & appetit, pource que l'appetit qui ne viēt à la personne à l'heure naturelle que l'appetit luy doit venir, c'est signe q̄ parauant elle en auoit prins

prins oultre raison, ou faulte de santé & de prosperité. Et fault bien prendre garde si c'est par la debilité & foybleſſe de l'eſtomach, à cellé fin que ne face encourir griefues & contagieufes maladies. Et pource qu'aux cours du temps preſent par l'action de l'air qui eſt autour avecques inſuſtion celeſte & action d'une chaleur innée, aduient continue reſolution d'humidité ſuſtantiſique dont les membres ſont vains, & cherché leur nourriture pour la reſtauration, en recouurance de ce qu'ilz ont perdu. Et avecques ce ſuccent les humeurs des teſtes, & des veines. Et les veines ſuccent le ſang du foye. Et eſt à noter qu'à vn chacun corps ſain la ſain vient directement à ſon heure, deuant laquelle on ne doit point manger, car ſi on mange ſans auoir appetit & ſain, la viande eſt rendue & faiſte abhominable à l'eſtomach. Et engendre adonques ſtupidité & laſcheté. Celá auſſi multiplie les trenchoyſons & ventofitez du ventre, & ne peult le foye conuerſir telles viandes mangées ſans appetit, en bon ſang & bone nourriture. Et ne peuuet auſſi les autres membres donner bon œure à la reſection & nourriture, ſi la viande eſt mal cuyte & mal digérée en l'eſtomach. Pource que nulle vertu poſtérieure peut corriger le premier erreur: pour ceſte cauſe dit Ypocrates, que la pire viande ou du pire brüuaige, mais qu'ilz ſoient pris avec bon appetit, ſengendrét meilleurs humeurs au corps & plus louables que de la meilleure viande mangée ſans appetit. Pour ce q̄ quād on a bō appetit l'eſtomach recoit la viande avec delectation, & avec naturelle

anxiété & prent son desir & sa voluptuosité: parquoy plus legitimement & plus parfaictemēt est faicte la digestion . Toutelſſois ſe fault garder quand on a grand appetit de manger goulument ſans maſcher parfaictement la viande . Et ne de uons point manger avecques voracité, & gulofité, car quand la viande eſt maſchée parfaictemēt elle eſt à demy digerée. Et ſi elle n'eſt parfaictemēt maſchée & ainſi qu'il appartient, l'eſtomach ne peult corriger la faulte, reduire ne reſtablir. Parquoy eſt faict empeschement à la vie par les œuures des vertus poſterieures. Ceſte raiſon aſſignoit Ariſtote, in ſuis problematibus, quand il propoſoit la queſtion, Pourquoi ceux qui ne ont gueres de dentz ne viuent pas ſi longuement que les autres . Auſſi ſe fault garder de trop remplir ſon eſtomach, car certainement pluſieurs ont eſté homicides d'eux meſmes par trop gourmander & yurongner. A ceſte cauſe ne doit on pas touſiours menger iuſques à ce que lon ſoit ſaoul, mais en telle façon qu'on ſente ſon eſtomach legier, & non trop replect & qu'il ſoit en bon repos & ſain. Sur toutes choſes n'y a rien qui plus nous contraigne & incite à trop mēger, que en vne meſme table auoir de pluſieurs & de diuerſes viandes, car la ſenteur & fumée des viādes nouuelles & la preparation de diuerſes viandes eſt attractiue & inductiue à gourmandiſe, pour ce que telle ſenteur reuocqué & rameiné meilleur & plus recent appetit que deuant. Parquoy l'eſtomach deſire & appetite beaucoup plus qu'il ne ſçauroit diger: & de tāt plus que l'eſtomach ſera chargé

*autre Gour
ne de dentz
mēger pas*

chargé de plusieurs & diuerses viandes, tant plus
 fera la repletion mauuaise & difficile à digerer.
 Car manger viandes lesquelles sont de grosse &
 difficile digestion avec lesquelles sont facile-
 ment digestibles & de legiere digestion, cela in-
 duist & donne grád empeschemēt à l'estomach,
 ainsi comme plus à plein on pourra voir au cha-
 pitre du boire & du manger cy apres escript.
 Certainement nous abusons des odeurs & sen-
 teurs en ceste derniere & mauuaise aage, pour ce
 que les diuerses confections & compillations des
 bonnes senteurs & odeurs ne sont pas trouuées
 ne faictes à celle fin que nous mangeons plus ha-
 bondamment, mais à celle fin que nous man-
 geons viande d'un meilleur & plus sain appetit.
 Et sil aduient que lon ait remply son estomach
 excessiuelement & superfluement, il est decent &
 conuenable de plus longuement dormir. Et est
 le plus expedient apres telle repletion excessi-
 ue de soy abstenir de manger par longue espace
 de temps, à celle fin que par telle sobriété, la pre-
 cedente gourmandise soit compescée & refrain-
 ste. Quand il est iour de ieufne, & semblablemēt
 aux autres iours nous ne deuons iamais differer
 n'attēdre à disner iusques apres l'heure de midy
 si ce n'estoit qu'aux autres dictz iours non ieuna-
 bles nous eussions desieuné. Pour ce qu'endurer
 longuement la faim remplist l'estomach de gros-
 ses & superflues humeurs: car quand les membres
 sont froictz & n'y a aucune nourriture qui les
 puisse eschauffer, & semblablemēt quand l'esto-
 mach est famelicque & qu'il ne vient aucune viā

de pour luy donner pasture & sustentation, nature s'estudie de regetter & oster ceste triste sensation, & donne secours audict estomach, en luy enuoyant les mauuaises humeurs, avecques lesquelles l'estomach se resiouist, & prent sa volupté, & adonc cesse la faim iusques à l'heure de l'autre refection, si elle n'est entrerompue. Pour laquelle cause ont de coustume ceux qui ieusnēt de dire qu'il n'est aucunemēt difficile de ieusner sinon iusques à l'heure qu'ilz ont accoustumée de manger & prendre leur refection, mais quand ladicte heure est passée, ilz diēt qu'ilz n'ont plus faim, & que le residu du iour ilz endurent facilement la ieusne sans peine ou tristesse aucune. Pour ce que nature voulant secourir & ayder à la triste sensation, que nous appellons faim, & qu'il ne vient aucune viande par dehors, elle renuoye les humeurs à l'estomach comme dict est, avec lesquelles il se resiouist, & se rassasie comme de bonne viande, pour raison de quoy la faim cesse. Toutesfois l'abstinence du souper est plus seure que l'abstinence du disner pour plus ample & meilleure digestion. Et ne faict rien ce qu'aucuns veulent dire que l'abstinence du souper est pire que celle de disner, pour ce que le sommeil vient quād l'estomach est vuide. Lequel comme nuyisible est prohibé, car il est plus nuyisible au corps endurer la faim du disner, que soy coucher & dormir toute la nuict l'estomach vuide, tant pource que la viande n'est pas toute digerée le iour, que pour ce que telle digestion se faict la nuict, en refrigeration du soupper. Et qui plus est, il

est, il est commandé aux personnes grasses, lesquelles ont le corps flumatique, humide & charnu, pour conseruer santé, de souper legierement, ou ne souper point. Et ont plusieurs expérimenté le profit que faict telle abstinence.

DE LA VIANDE ET DV

bruuage. Chap. vij.

REste maintenant de determiner les reigles de la viande & du bruuage dont le corps doit estre substenté, nourry & alimenté. Fault donc prendre le bruuage & la viande par mesure selon l'usage, & la force que lon a de tollerer & souffrir, car il ne fault pas viure pour manger, mais il fault manger pour viure, & à celle fin nous a Dieu créez. Et selō l'opiniō des anciēs aucteurs, celle viande est pire, laquelle engendre fastidiosité, & induit pesanteur à l'estomach, & bruuage mauuais: quād il laisse attrempāce, & faict noyer la viande en l'estomac. Fault doncques pour conseruation de santé, eslire les plus subtiles viandes de facile & legiere digestion, generatiues, & attractiues de bonnes humeurs. Et se garder & abstenir de manger grosses viandes, de difficile digestion & qui engendrent mauuaises humeurs. La viande doit estre attrempée, ou qu'elle n'excede gueres attrempance. Et si trop grand excès est faict en l'une des dessusdictes qualitez, comme en chaleur, humidité, frigidité, ou siccité, qu'elle soit tēperée avec ses contraires. Et on craint à mager d'un concombre, pour cause qu'il est trop

froit soit compensé avec chauldes especes aromatiques. Et si au contraire on craint à manger viandes par trop chauldes, soyent icelles compensées avecques choses froides. Il est aussi licite & conuenable d'observer & garder à la table l'ordre de manger les viandes, car lon ne doit pas manger la viande subtile & ligiere apres qu'on aura mangé viande grosse, dure & de difficile digestiõ, cõme si incontinent apres qu'on auroit mangé du bœuf on mangeoit des œufz clers & si molz qu'il ne les fallist que humeur, lesquels de soy sont incontinent digerez: car ne seroit d'icelle viande faicte aucune digestion: pour ce lesdictz œufz ne pourroient descendre bas en ostant l'estoupe ment du bœuf, & ainsi est il du mouton & des autres viandes digestibles, apres dures & grosses viandes: car quand on mâge telles viâdes legieres apres grosses viandes, les legieres n'ayent plus longuemēt qu'elles ne doiuent sur les grosses viâdes. Parquoy se pourrissent & demourent corrompues en l'estomach, & preparent la viande indigerée à laquelle elles sont meslées à mauuaise corruption. Toutesfois lon ne doit pas manger la grasse viande, pesante, & difficile à digerer incontinent apres la viande trop subtile & trop digestible, comme apres lesdictz œufz clers manger grande quantité de fourmage dur, pour ce que pour la grande compressiõ & pesanteur du dict fourmage, & pour la legereté desdictz œufz, la viande chet plus tost en bas qu'elle ne deburoit & deuant que la digestion soit parfaicte. Et pour ces causes & raisons est la diuersité des viâdes prohibée

hibée en vne table. Iacoit ce que les phisiciés qui veulent regarder l'ordre des viandes par le manger & par raison speculatiue contemplent & diēt estre plus forte digestion au fons de l'estomach, qu'à la bouche d'iceluy, & la vertu appetitiue estre pl^s forte à la bouche de l'estomac qu'au fons, & à ceste cause cōcluēt que les viandes qui sont de forte digestion doiuent estre premises à l'estomach, au lieu auquel y a plus grand vertu digestiue, & cōcluēt semblablement que lon doit mager les viandes qui sont de grosse digestiō deuant celles qui sont digestibles & de facile digestiō, & est ceste raison vraye. Mais ilz concluent seulement quād il y a peu de difference & de distance entre les viādes en la difficulté & facilité de la digestiō. Mais quād la difference est grande, cōme entre la viande legiere & subtile, & entre la viāde dure & pesante. La viande legere doit estre magée la premiere, pour ceste cause est il dit quil n'est riē pire que mager apres qⁱ la viāde qui est en l'estomach est à demy digerée ou totalement digerée, qui est mettre viāde nō digerée sur celle qui est digerée. Les autres dient que lon doit mettre grand soing & sollicitude entre la viande & le corps, duquel fault garder la santé, soit deue & raisonnable proportiō & particuliere habitude cōforme, car soit ce que le fromage, vin, laiēt, & ainsi des semblables, entrēt en la conseruatiō de santé, & se cōuertissent en bonne nourriture, ce neantmoins il y a plusieurs corps ausquelz pour leur inseparable complexion, le fourmage, le laiēt, le vin & autres semblables, sont venin, de telles viandes dont les

corps de telle complexion se doiuent garder cōme de venin. Et en ces choses l'experience surmonte raison, à ceste cause est plus digne de croire l'experience que la raison. Semblablement y a des corps qui ont la viande proportionnée & cōuenable à leur complexion, laquelle ne leur doit point estre prohibée ne defendue, car s'ilz en mengeoyēt d'autre, elle leur pourroit nuire: outre plus en telles matieres fault aussi garder & obseruer la coustume du pays, combien que tel vsage soit veu estre contre raison. Car comme dient & vculēt les auteurs, la viande qu'ō a accoustumée de manger iacoit que de soy elle soit mauuaise & nuisible, neantmoins elle est meilleure & plus cōuenable au corps que la bonne viande inaccoustumée, à ceste cause, cōme dit est, l'experience en telles choses surmōte raisō. D'auātage la viande & nourriture qui est meilleure à vn corps sain c'est celle laquelle a meilleure odeur: car de dispositiō naturelle telle viande est mieux digerée, & la prêt le corps trop plus ioyeusement pour sa nourriture. Et si le corps est mal disposé, ou de sa propre nature mal attrempé, il ne fault pas obeyr à son appetit, car de disposition naturelle il demande tousiours semblables à soy contre nature, ou appetite choses qui luy sont contraires. Fault aussi entendre que par la lascheté & debilité de l'estomac, la viande descent plustost en bas qu'elle ne deuroit, comme au commencement du disner ou du souper. Et adoncques est necessaire de prendre choses qui estouppent & confortent l'estomach, & qui donnēt ayde & secours à faire plus parfaicte

parfaicte digestion, car les choses qui estouppent si elles sont mengées deuant la viande, elles restraignent & estouppent le ventre. Et si elles sont mengées apres la refection, pour leur pesanteur & cōpression, elles laschent le ventre. Toutesfois lon peut prendre tous les iours apres la refection quelque chose stiptique, mais qu'on prenne en petite quantité pour faire le séele de l'estomach, comme manger vn peu de poires cuytes, de la coriande, ou vn peu de fromage: car de leur séele la bouche de l'estomach est confortée à chaleur naturelle pour digerer: & cela garde semblablemēt que si grande multitude de vapeurs ne montent au cœur. Mais par les fruietz humides & qui laschent, comme les raisins au temps de vendanges, ou comme les figues nouuelles, les meslans ou autres semblables, se doyuent manger au commencement de la refection deuant toute autre viande. Et ne doit on pas incontinent apres manger autre viande, mais on doit attendre iusques à ce qu'elles soyent descendues au fons de l'estomach, & qu'elles soient à repos. Et apres celá fait bon manger & prendre sa refection, à celle fin que telz fruietz descendent en bas. Au téps d'esté fault estudier à la plus froide heure du iour: manger & prédre sa refection en vn lieu enclin à froidure, mais au téps d'hyuer, il est tresbon de se chauffer deuāt le feu la partie exterieure du corps & les autres mēbres exterieurs apres la refection. Pour ce qu'apres la refection les membres exterieurs demourent denuez de chaleur à cause de l'assumption de la viande: car adonc la chaleur se

retire dedans le corps en hyuer, aussi lon doit māger actuellement viandes chauldes, & en esté froides ou vn peu reschauffées. Fault entendre pareillement qu'en hyuer & tēps froid, à cause de chaleur naturelle, laquelle se retire dedans le corps, est faicte meilleure & plus parfaicte digestiō que en esté. Car en esté la chaleur naturelle est resolue & debilitée par ce qu'elle est dispersée aux membres exterieurs, à ceste cause les corps viuās delicieusement, & lesquelz n'vsent pas de grād exercice, doiuent māger & vser de plus grosses & de plus forte digestion en hyuer, qu'en esté, & de viādes lesquelles sont de plus grosse nourriture. Et ne doit on iamais boire que premieremēt on ait vraye & naturelle soif. Laquelle est cause des mēbres qui ont indigence d'humidité comme il est cy dessus dit de la faim, ou de manger grosses viādes & feiches, dont l'humidité à la bouche de l'estomach est cōsummée, à la cōsummation de laquelle s'ensuit vraye naturelle soif, apres laquelle fault boire pour cōseruer santé: neantmoins aucunesfois aduient accidentalle & non vray soif, que medecins appellēt soif menteuse, laquelle iacoit qu'elle ait plusieurs causes causantes, toutefois le plus souuent elle aduient apres qu'on est saoul, & qu'on a excessiuemēt gourmandé, & propremēt apres souper quād l'estomach est plus réply de viāde: & s'est tresdebile à cause de la viāde qu'il prēd à l'heure qu'il doit digerer, qu'il brusle & est englouty de soif. Et est à noter qu'il vault mieux endurer & tollerer celle soif mēteuse que d'icelle esteindre par boyre, si elle n'est trop vehemente,

mente, & apres ycelle les auteurs cōmandent dormir pour ce que le dormir l'estainct & la fait cesser, & aussi conforte la digestiō, & ayde à digerer les viādes non digerées, lesquelles eschaufent & bruslēt l'estomac, & par ce moyē cesse l'eleuatiō des fumées à la bouche & ouuerture de l'estomac ou ladicte soif menteuse estoit causée, & ne cesse point ceste soif cy pour boire, pour ce que par la viāde estāt encores à l'estomach non digerée, se eslieuent les vapeurs qui induisent & prouoquēt la soif, pour ceste cause fault toller & endurer ceste soif, pour ce que de boire en icelle aduient grans incōueniens, car tel boyre empesche la decoction & digestion de la viande, tout ainsi comme si on mettoit de l'eau froide parmy de l'eau boullāte comme il est dit cy dessus, qu'il ny a riē plus nuyfible que de mettre viande non digerée dessus viande digerée. Mais si ceste soif menteuse vient de nuict, ou apres souper, deuant que soy coucher, & soit gardée vehemente & ennuyeuse, le plus expedient est de boyre. Et adōc commāde Galien que lon boyue. Et se truffe de ceux qui autrement entendent l'auctōrité d'Ypocrates quand ilz l'ont interpreté, là ou il loue le dormir, apres la soif menteuse. Et Auicēne aussi a voulu pour reiecter & esteindre la soif mēteuse, que lon prenne de l'eau froide. Laquelle ne fault pas aualler à grosses gorgées, mais la fault boyre en vn vaisseau, lequel ait le goulet estroict & lōg, à celle fin qu'ō ne la face que succer, & q̄ par vn peu d'eau ceste soif menteuse & interieure soit estāchée. Au regard des condimens ou cōpillatiōs

comme gelée, ou autre viande qui est faicte & cōpillée de plusieurs drogues & viandes, & aussi de leurs faueurs & preparations, n'est mise ne faicte aucune reigle, pour ce qu'ilz ont telles vertus en eulx cōme les especes aromatiques, ou les autres drogues & matieres desquelles ilz sont preparez & composez: mais à celle fin que de ces choses cy on ait meilleurē doctrine & plus explanatiue, c'est à sçauoir de toutes les choses desquelles nous vsons, tant en viâdes, bruuages, odeurs & especes aromatiques, qu'autres preparations selō raison, & l'opinion des experimentations, & le plus bresquement & succintemēt qu'il sera possible, ie declareray & descripray d'vn chascun d'iceulx la propre & particuliere nature. Et est mon intētiō de declarer toutes les vertus d'icelles, desquelles on vſe en viandes, en bruuages & à la table, & lesquelles dōnent bon remede & secours pour la conseruation de santé de la vie humaine. Et de declarer aussi toutes les vertus par lesquelles nous pourrons resister contre le venin nuyſible.

ET PREMIEREMENT,

DES AMANDES. Chap.vij.

DEs amandes l'vne est amere, & l'autre douce, de celle qui est amere nous ne disons riē, pour ce q̄ c'est la ſouueraine medecine des malades. La douce amāde est quasi attrempée en ſes qualitez, declinant vn peu à humidité, & moins toutesſois que la noix: elle est difficile & de groſſe digeſtion & dure

& dure longuement en l'estomach. A ceste cause elle doit estre fort maschée. Toutesfois quād elle est mangée avecques le succe, elle est plus facilement digerée, elle descend en bas, & engendre bonne nourriture. Iagoit ce que telle nourriture soit petite: semblablement aussi engressist, elle nettoye & ouure les oppilations du foye, & le preparatif & viande qui en est faicte, construite & composée qui est vne agmidallate, & sert, profite & donne bon remede contre les passions & douleurs de la poictrine & du poulmon, comme à la toux & autres semblables. Vn cōdiment preparatif ou compillation faicte d'icelle, ou des amādes, est d'une mesme vertu. L'amāde douce prouoque l'vrine, & en oste la chaleur, & ardeur. Elle purifie & nettoye les ordures des reins, & mise & apposée sur la morsure d'un chiē enragé, ou quād on en mange, elle profite moult, & y donne bon remede.

DE L'AUELINE.

Chap. viij.

L'Aueline, qui est vne espeece de noysette, est chaulde & seiche, quant au premier degré, & est de meilleure & plus profitable nourrissement que la grosse noix: iagoit ce qu'elle soit de plus terrestre & plus pesant nourrissement, pour ce qu'elle est plus massiue, & plus ferme, & qu'elle n'est pas si huilleuse. A ceste cause est de plus tardieue digestiō que la noix: elle estoupe vn peu, & engēdre vētositez: mais nō pas quād on oste la pel-

leüre de dessus quand elle est rostie, & qu'on la mäge avecques vn petit de poyure, elle subuient subitement & donne soudain remede à ceux qui sont malades de reume de la teste. Et semblablement cõtre la morsure & poincture d'escorpiõs. Principalement s'elle est mengée avecques la rue & la figue, ou si on en faiçt vne emplastre.

D'AMYDVM. Chap.ix.

AMydũ est froid & sec au premier degré, & le preparatif ou cõpilatiõ qui en est faite se doit cuyre iusques à ce qu'il en y ait le tiers en eau, & puis l'assẽbler avec des amãdes, & du sucre, & celá adoucist la poitrine. Il prohibe & garde des flux & des catterres la poiçtrine, il rappelle & garist la toux, & ne produict gueres bon sang, mais s'il est cuit avec symula il nourrist bien, & engendre at-trempé sang. Toutesfois l'excessiue frequen-tation de son menger à cause de sa viscosité in-duyst opilations du foye. Et s'il trouue les reins chaulx, il les dispose à generation & disposition de pierres, mais si amy dum est mangé avecques, il restrainct le ventre du flux colerique. Et sert & profite aux femmes pour empeser leurs tourez ou autres fins draps de lin.

DE L'ANET. Chap.x.

L'Anet est chauld en la fin du secõd degré, & sec en la fin du premier: & est naturatif des hu-meurs froidz. Il purifie & nettoye le ventre de la putrefaction des humeurs, il adoucist & repelle aussi les douleurs. Il resoluẽ & lasche les ventositez, & induict à auoir bon sommeil,

mais

mais trop souuent en vser debilité fort la veüe, & nuist asprement à l'estomac, pource qu'il faict auoir appetit de vomir. Et sa graine & seméce semblablement prouoque vomissement.

DV TREFFLE.

Chap. xi.

LE treffle est vne herbe de laquelle nous vsons aux herbages, cōme en la salade ou autre vian de appareillée avec des choux, & est quasi cōforme aux espinars. Il est froid au premier degré & humide au second. Iasoit qu'aucuns dient qu'il est attrempé, il amolist le ventre, & est facilement digéré, il engendre bonne nourriture, iasoit ce qu'elle soit petite. Il donne secours & medecine aux yteriques & à ceux qui ont le foye eschauffé. Sa semence & graine quand elle est baillée aux coleriques avec eau chaude elle les faict vomir.

DE L'OZEILLE.

Chap. xij.

L'Ozeille est vne herbe qui est de quatre especes. Nous n'vsons point des plus grādes especes aux herbages, aumoins gueres: c'est asçauoir de parelle & rumice magna, mais des deux autres nous en vsons en salade & en faulce avec du sucre, desquelles especes l'une croist aux lieux infertility & sablōneux, & a les fueilles sēblables à l'ongle du poulcé, laquelle si elle est touchée du Soleil acquiert aucunes petites veines rouges au front: c'est asçauoir au long de son bois, qui s'estēd tout le long de la fueille, laquelle espee est vulgaire-

ment appellée faulce ou fallemonde. L'autre es-
 pece croist aux lieux fertiles & fructifians à la sem-
 blance du petit treffle, & est appellée menue o-
 zeille, & aucuns dient que du ius d'icelle est fait
 rodderibes, qui est en la vertu du cirop de l'aigre-
 té du cytron, lequel est fort loüé en temps de pe-
 stilëce. Ces deux especes d'ozeille sont froides &
 seiches au secõd degré, engédret humeur loüable
 & ostent la fastidiosité & foiblesse de l'estomac.
 Elles aguent l'appetit, & inferent les vertus du
 cœur cõfortatiues. Le syrop fait de leurs ius avec
 succe, il est en la vertu du cyrop de cytron, & est
 de grande vtilité, profite à ceulx qui ont chaud
 foye. Ces deux especes donnent remede & con-
 fortément au colerique contre le flux de ventre
 & à la rasure des genitoires. Elles donnent aussi
 remede contre la douleur des dentz de la matiere
 chaulde, si de leur decoction on laue la bouche.
 Semblablement aussi le lauement fait desdictes
 deux especes d'ozeille est tresbon pour guarir les
 galles & rongnes. Et l'vsage desdictes deux espe-
 ces est tresbon aux herbages à la semblace d'huil-
 les, & en esté aussi en la salade, principalemēt en
 temps pestilencieux. Et aussi est le cyrop qui en
 est fait & compilé.

*oſer ſai-
 re ſi
 galles*

DE L'AGRÛN.

Chap. xij.

AIgruns sont de plusieurs especes, lesquelles
 sont bien cõuenables de declarer & monſtrer
 en vn chapitre: Mais premierement ie passeray
 vn peu oultre, pour la diuerſité des effectz ou
 propriété

propriété des choses de la difforme approximation à nostre corps: Car il y a aucunes choses lesquelles si on les mange, engendrent pour le nourrissement bon sang, & induysent bonnes dispositions en nostre corps, comme les aulx, les oignons, & autres semblables, lesquels filz sont mis & apposez sur le corps en forme d'éplastre, ilz produysent des playes, apostumes, & les autres semblables maulx. Et si aussi en forme d'emplastre on les met sur vne playe, ilz induysent vn effect venimeux. Semblablement y a autres choses, lesquelles valent autant à boire & à manger, comme le venin, & ne seroit le corps non plus greué d'vser de telles viandes, & induysent la mort: comme le vis-argent, le plomb, & autres semblables, lesquels filz sont mis & apposez sur le corps en forme d'emplastre, ne nuyssent ny induissent aucun detrimement au corps, sinon par aduenture par trop souuent en vser, comme testifient les femmes, lesquelles veulent estre veües plus belles par leurs bagues ou ioyaux qu'elles mettent dessus leurs poictrines, ou autre partie de leurs corps. Et pour raison de ce en leur vieillesse les dentz leur chéent, ou pour autre raison deuiennent noires. Autres choses aussi y a, lesquelles prinſes & mises dedans le corps, ou dessus le corps, induysent vertueux effect. Et la cause pour laquelle l'oignon & l'ail procréent & engendrent playes quand sont mis & apposez dessus le corps, & quand sont dedans le corps induissent bonne nourriture & assigne, pource que la chose, laquelle par sa vertu faict quelque ope-

ration en nostre corps induiroit son effect, si par
 chaleur naturelle de nostre corps elle n'estoit p-
 hibée, reduicte & coercée de sa puissance à acom-
 plir son operation. Et de ce aduiét que l'oignon
 & le sel pourrissent & gastēt la chair viue, & gar-
 dent la chair morte de pourriture: pource qu'en
 la chair morte n'y a aucune chaleur naturelle re-
 sistant contre leur vertu & puissance vlceratiue
 de leur operation accomplir. Ainsi comme en ieu-
 nesse, & par remise & estainte chaleur, la ver-
 tu vlceratiue de l'oignon & de l'ail est reduicte
 en son acte & operation. Et à ceste cause, quand
 sont mis sur le corps, ilz engendrent plusieurs
 playes: & s'ilz sont dedans le corps ou la chaleur
 naturelle est aspre & plus vehemente, leur vertu
 vlceratiue, c'est asçauoir qui engendre telles
 playes, est resoluée & consommée, & ce qui de-
 meure est conuertty en sang & en nourriture,
 & est soulagée & fortifiée la chaleur dedans le
 corps, à celle fin qu'ilz ne nuyent deuant que
 telle vertu soit resoluée, pource que acrumina
 sont mangez avec & parmy autres viandes, par-
 quoy se meslent en l'estomac avec les humeurs,
 & ne demeurent continuellement fichez en vn,
 ainsi qu'est dit des choses mises & apposées par
 dehors, mais le vis-argēt & autres séblables sont
 au corps de contraire disposition, pource qu'ilz
 sont composez des parties conioinctes & assem-
 blées, parquoy ont besoin de grande chaleur afin
 que leur vertu soit reduicte à effect, à ceste cau-
 se quand ilz sont approchez du corps & mis des-
 sus, ilz ne luy font aucun dōmage ou vlceration
 pour

pour la chaleur remise & lointaine de la peau: & n'ont point les parties agues & penetratiues aux pores de la peau comme ont l'oignon & l'ail, mais filz sont mis & apposez dedans le corps, ilz viennent vers la grande chaleur du corps reduire leur puissance suffisante en acte, c'est adire, à operation: parquoy ou ilz induisent mauuais & dâge reux excès & disposition nuisible ou la mort selon la puissance determinée de chacū. Ainsi dōc quand il dit que l'ail, l'oignon & autres semblables sont vlceratifz: c'est asçauoir qu'ilz produisent des cloux, des apostumes & autres vlceratiōs il s'entēd filz sont mis & apposez en forme d'emplastre sur la peau. Iagoit que quand à aucuns, s'entende quand ilz sont mis dedans le corps: ne se fault donc esmerueiller si aucunes choses, comme l'ail, l'oignon & autres semblables soyent viande dedans le corps & venin par dehors, & autres choses, comme vis-argent, litargirus, qui est vne pierre argentée & autres semblables mises dedans le corps sont venin, & par dehors induisent santé, & guarissent quand ilz sont mises sur les playes.

L'Ail est chault & sec au commencement du quart degré. Il induist & engendre playes & aduſtion. Son vsage excessif aggrauē la teste, engendre douleur, & debilitē la veüe, & nuist plus asprement aux corps qui sont de chaude complexion, & rend la personne plus chaude & plus encline à luxure, il oste la nuyſance des eaux estans au corps, & semblablement les ventositēz, & vault autant à manger comme tyriaque à ceux qui sont

de froide cõplexion, il tue & faict mourir les vers du corps, il resoluë les humeurs flegmatiques. Il amolift le vêtre & le rend lasche. Il faict auoir la voix claire, nettoye & garde la gorge de toute or dure & immundicité. Contre les douleurs de la gorge & contre la toux donne remede: Il prouoque & excite luxure si on en mange à petite quantité: Et au contraire si on en mange beaucoup & en grande quantité, il estainct luxure & chaleur naturelle par sa chaleur & siccité. Et entre autres choses donne bon remede contre la morsure des bestes venimeuses, & d'un chien enragé.

ET l'oignon est chauld au quart degré, & humide au tiers degré. Et est à noter que l'oignon rouge est plus chauld que le blanc, & plus chaud aussi cru que cuit, il engendre grosse nourriture, & profite peu au corps: mais l'oignon cuit est moins nuyfible, il ouure les conduictz du corps, il est inflammatif & prouoque la soif: trop vsér de l'oignon cuit, engendre douleur & pesanteur en la teste: aucunesfois induit de terribles & merueilleux songes, & moult est nuyfible à l'entendement, il produist mauuaises humeurs en l'estomac & multiplie la salive: mais si on en mange à petite quantité, il cõforte l'estomac debile, il induist & prouoque l'appetit. Oultre-plus incite luxure, & augmente la liqueur & la matiere de luxure par son humidité, & ouure les amorroides quand il est mis dessus.

LE porreau est chauld au tiers degré, & sec au second. Son vsage induist douleur au chef, & faict voir & apparoir de nuict mauuais songes & fanta-

fantastiques. Il corrompt les dentz & genciues, & incite grand' douleur en elles, il nuist semblablement à la veüe. Le ius du porreau restrainct le sang des narines : quand il est meslé avecques du vin-aigre, de l'enscét ou huile rosat, le porreau cru oste & fait cesser le routemét aigre & puant, & profite mais qu'il soit mangé apres les laictues, le pourpié & les choux frois, Il nettoye le poulmon, il conforte la poictrine, & donne bon remede contre les amorroïdes, principalement quand il est cuit. A ceste cause il nuist à ceux qui ont les reins vlcerez de playes & de rongnes, & qui ont la vessie gastée. Le porreau fa semence & graine sont moult incitatifz de luxure. Et ont la vertu des aulx contre le venin.

S Calogne ou eschalotes sont especes de racines aigres, comme dessus est dit des oignōs & des aulx, & sont à eux semblables, & ont la vertu des oignons. La racine se nomme Raphanus domestique. Et est à noter qu'il y a plusieurs especes de raphanus. L'une des especes est domestique, laquelle absolument se nomme racine.

La seconde espece est, qui a les fueilles crespes comme celle qui est appellée racine: mais elle est d'une chaleur plus ague: & est dictée moratia.

La tierce espece a grandes fueilles & legeres, à la semblance d'Emila campana en qualité & en forme. Et est plus ague que toutes les autres especes. Et sont les Naueaux & Raues quasi de ceste sorte & de telles especes (comme cy apres sera dit.) Tous les aucteurs veulēt & dient que chacune de especes de raphanus est de chaude com.

plexion selon ce qu'il participe plus d'aspreté & force: mais ilz discordent en humidité & siccité: car il y a aucuns des auteurs qui dient qu'ilz sont humides, & les autres qui dient qu'ilz sont de seiche nature: toutesfois nous voyons qu'ilz participēt plus d'humidité. La racine & toute espee de raphanus sont de plus petit nourrissemēt que les raues, par ce qu'elles sont plus aspres & de plus dure digestion, à ceste cause nuyent à l'estomac. Elles esmeuent ventositez & induysent route-mens si on les mange devant autre viande. Et empeschent aussi lesdictes especes que la viande ne descēde au fons de l'estomac & qu'elle y demeure: mais pour les ventositez qu'elles causent retiēnent la viande souzleuée en l'estomac comme en l'air & la font noyer. Elles prolongent la digestion & preparent à vomissement, & propremēt si on mangela decoction de leur peleure apres la refection, elles amolissent le ventre, & font plus parfaictement digerer la viande. Semblablement corrompent & amoindrissent les ventositez montans au chef. Si on mange ledit raphanus cuyt, il donne remede cōtre la vieille toux. Oultre-plus toute espee de raphanus corrompt les fleumes, laue & absterge les reins & la vessie de toutes grosses humeurs, rompt & brise la pierre s'aucune y en a, & faict vriner, ses fueilles aydent à la digestion, & ottroyent appetit. Entre toutes les vertus estans audit raphanus, il donne bon remede contre la morsure du serpent. Il faict mourir les vers venimeux, & qui plus est, si on met aucune partie d'iceluy sur l'escorpiō, il meurt soudainement,

ment, & principalemēt si ledict raphanus est sauvage, ou si c'est la decoction d'iceluy, & si l'escorpion auoit faict morsure au ventre de quelque personne, laquelle eust mangé dudit raphanus deuāt icelle morsure, certainemēt ledit scorpion ne luy sçauroit aucunement nuyre.

DE L'ANIS.

Chap. xiiij.

L'Anis est chauld au premier degré, & sec au tiers. Sa semence & graine conficte avecques du sucre est resoluque des ventositez, & est meilleure mangée apres sa refection. Elle rend la bouche odoriferante, & reprime les vapeurs. Elle ouure la poictrine, & oste les opilatiōs du foye & de la rate inductes & causées par les humeurs. Elle prouoque l'vrine & irrite luxure. Elle est oupe, & profite moult pour appaiser la douleur de la teste, & ayde semblablement à expeller & iecter ce qui nuist aux nerfz.

DV VERIVS DE GRAIN.

Chap. xv.

Varius de grain est froid au tiers degré, & sec au second. Il constipe & conforte l'estomac, il induist & prouoque l'appetit s'il default par chaleur trop grand' & violente. Il estaint la chaleur du foye, & oste la soif. Il restraint le vomissement & le flux du ventre: toutesfois il restraint moins s'il est mangé cuit. Son ius est tresbon reduict au Soleil à l'espeſſeur de miel, & profite

moult aux choses dessusdictes, aux confitures, cōmixtions & senteurs. Et est à noter que lon faict du sirop de la graine d'iceluy, lequel a grand' vertu & force contre les venins chaudz & fieures pestilencieuses. Il oste & faict cesser la soif, & observe les dessusdictes conditions.

DU VIN-AIGRE. Chap. xvi.

Vin-aigre est composé de plusieurs parties: c'est asçavoir chauldes & agues, mais les froides sont reprouuées, & est d'une grand' seicheté. Aucuns des aucteurs dient que combien qu'il ait les parties fort froides, ce neantmoins à cause de chauldes meslées avec les froides, il est froid au premier degré, & sec au tiers. Et dient aucuns qu'il est froid au second. Le vin-aigre est infrigideratif avec choses froides; & s'il est meslé à petite quantité avec les choses chaudes il eschauffe par sa vertu penetratiue, laquelle faict les autres choses penetrer: mais il est le grand ennemy des nerfz par sa frigidité & aspreté, & par sa vertu penetratiue, pour laquelle les autres humeurs nuisibles passent aux nerfz: à ceste cause nuist aux paralytiques & spumeux & podagres. Son excessif usage debilité la veüe & refrene luxure, en diminuant fort la matiere d'icelle. Il rectifie l'air infect & pourry au lieu auquel il est espandu, & garde que les eaux pourries ne nuisent au corps. Et cōbien que le verius de grain soit aigre cōme grenades, le jus de citrons & autres semblables, & qu'il soit inductif de plus grande froideur que le vin-aigre, toutesfois ilz sont plus fors à affroidir par ce que ilz obeissent aux parties agues & penetratiues. A
ceste

ceste cause Galien au quatriesme liure. de la simple medecine dit, que ceux qui veulent refroidir l'estomac trop chauld, il leur est plus expediēt & plus profitable de prendre du ius du verius de grain, & de semblables que du vin-aigre, pource que leur vertu n'est pas violente ny inductiue de playes, de galles & autres corruptions n'y meslée avec chaleur aspre : Parquoy s'ensuit à ceux qui veulent refroidir les membres loingtains & non prochains de l'estomac le vin aigre est plus conuenable: car il a vne vertu en soy qui se fait voye afin qu'il s'adresse & applique es parties loingtains. Et pour ces causes le vin-aigre amaigrift, & amoindrift, diminue & demembre le corps, & principalement si on en vse souuent. Le vin-aigre profite aux coleres & melancoliques: Car il engendre humeurs melancoliques & brüstées. A cette cause il nuist fort à ceux qui sont entachez de lepre & d'autre rongne: mais il auance la digestion & prouoque l'appetit. Aussi est aduersaire au fleumatique, en le diminuant & rongnant: il repugne aux mauuaises humeurs qui coulent à l'estomac, Et est vtile & profitable pour guarir de brusleure: car par sa frigidité soudainemēt on appaise la douleur. Il profite semblablement contre la morsure des bestes venimeuses, s'il est mis & appose dessus ladicte morsure, & est aussi son odeur & olfaction profitable. Oultre-plus est chose vtile & conuenable vser de vin-aigre au temps de pestilence, & en lieux pestilencieux. La frigidité du vin-aigre est diminuée par elixation & ebullition, & principalemēt quand il est meslé

Otre la
 Brusleure
 12

Otre mor
 De la fure
 De la fure

avecq' vn peu de miel. Et si lon faict bouillir avec le vin-aigre vne liure de ses senteurs qu'on a de coustume porter en temps de pestilence dedans la main, en forme d'vne pelote, il n'en pert quasi aucunement son odeur: Mais la plus grande partie de ses vertus nuyssibles est ostée & estaincte.

DE L'EAV. Chap. xvij.

DEs eaux celle est la meilleure laquelle est claire, & n'a aucune odeur ne saueur: & celle semblablement, laquelle est plus legere, & est à ce cogneüe en ce qu'à cause de sa subtilité est incontinent chaude deuant le feu, & incontinēt froide à l'air. Et en celle eau sont les choses plustost cuytes & depecées, & descéd clairement de l'estomac. Sa pesanteur aussi est cogneüe ou par la pesâteur d'vne egale mesure, ou par l'infusion de deux draps de lin, l'vn en vne eau & l'autre en autre eau & que lesditz draps soyent blancz & netz, car celui qui sera en la plus legere eau, sera le plus tost sec. Et apres qu'il sera parfaictement sec, il sera le plus blanc & le plus leger, & est ceste legere eau meilleure & pl^s saine que l'autre. Entre les autres elemens la seule eau a ceste propriété qu'elle entre & est au genre des breuages & des viandes. Et oultre-plus l'eau de plusieurs choses acquiert la malice & la bonté comme de son engence & naissance pour la station & demeurâce dudit lieu du corps de la decoction & admixtion des choses. de leur gère & naissance les eaux de fontaines sont les meilleures, & la fontaine de laquelle l'eau vient

vient de pure terre, est meilleure que celle dont l'eau procede du sablon pierreux, car telle eau procedant de pure terre est plus purifiée & plus subtile que l'autre: cōbien que l'eau procedant du sablon pierreux soit moins preparée à putrefactiō terrestre. Les eaux lesquelles ne bougēt d'un lieu & n'ont aucun cours, sont plus nuyfibles que les eaux courātes, & plustost alteratiues en terrestre putrefaction, & sont de tant pires qu'elles sont sur la bourbe & sur la fange. L'eau des puiz laquelle n'a aucun cours, & est plus pres des fosses & grādes eaux terrestres est pire que l'eau des fontaines, combien qu'elle soit meilleure que l'eau laquelle se tient sur la bourbe & fange: toutesfois par frequemment tirer de l'eau d'un puiz, & souuent la remuer, elle est meilleure & plus saine. A ceste cause quand il y a aucune petite quātité de poissons en un puiz, ilz rendent l'eau meilleure & plus saine par souuent la remuer & mouuoir, & pource qu'ilz se nourrissent des petitz vers & parties putrescibles: mais quād il y a grand' quātité de poissons en un puiz, ilz corrompent l'eau. A ceste cause les puiz & cisternes desquelz lon ne tire pas frequemment de l'eau, ne sont pas si bōs que les autres.

DES eaux courantes celles sont les meilleures lesquelles courent descouuertes & euentées, & de tous les conduictz des eaux, & les cōduictz & tuyaux de plomb sont les pires, pource qu'ilz preparent les corps à flux de ventre quand ilz boient de l'eau par eux conduicte, & aussi entre les eaux ayās cours, celles sont les meilleures les-

quelles courent en grande affluence legerement
 & impetueusement comme grans fleuves. Et cel-
 les lesquelles courent sur bonne fange, qui n'est
 ny bouëuse ny puante, sont meilleures que celles
 qui ont leur cours sur les pierres: combien qu'au-
 cuns aucteurs dient le contraire, & ne dient pas
 bien: pource que la bonne fange du fleuve cou-
 rant, purifie l'eau, l'humilie & la fait plus subtile,
 laquelle chose les pierres ne font pas. A ceste cau-
 se tant plus est l'eau distancieuse & loingtaine du
 lieu dont elle sourt, de tant plus est meilleure &
 profitable s'elle est beüe en son temps sans la lais-
 ser croupir à la gueule de la fontaine, pource que
 telles eaux sont plus esmeües & corrompues à la
 mixture de la fange, & aussi plus humiliées. Et
 est à noter que pas ne doiuent estre beües les eaux
 incontinent qu'on les a prises au fleuve ou à la
 fontaine, ou en quelque autre lieu: mais les doit
 on mettre & faire reposer en vn grand vaisseau,
 car adonc descendent les parties de la fange & or-
 dure par les veines de l'eau: en laquelle descende
 s'en vont ensemble les plus grosses parties de
 l'eau, & vont faire leur residence au fons du vais-
 seau. Et l'eau laquelle demeure dessus est sembla-
 ble à eau bien purifiée & à la conformité de l'eau
 cuite & boullue, laquelle fait residence des gros-
 ses parties par la sequestration de l'eau, laquelle
 demeure au fons, & tire tous accidens à soy. A
 ceste cause selon l'opinion d'aucuns aucteurs an-
 ciens, il est defendu de mesler l'eau de puiz avec
 l'eau de fleuve: car iacoit ce que l'eau du puiz soit
 claire & nette: toutesfois elle est grosse & crue,

non faisant aucune residence, & l'eau du fleuve a les parties fangeuses, lesquelles resident bien subtillees en icelle: Mais meslée avecq' l'eau du pui: la descente est empeschée, & n'est faicte aucune residence. A ceste cause, combien que l'eau du fleuve soit meilleure que l'eau du pui: toutesfois chacune d'icelles est meilleure à parsoy, que meslée l'une avec l'autre. Et pour ces causes l'eau acquiert bonté par decoction: Car cōbien qu'en la faisant cuire aucunes subtiles parties de l'eau soyent resolues: toutesfois par bouillir elle se diminue & se separe, & dissolue totalement ce qui estoit congelé en icelle par froidure, à ceste cause quand l'eau ratifiée deuant le feu se repose, les grosses parties peuuent descendre au fons. Laquelle chose ne se pouoit faire deuant la decoction. Le feu ne subtilise pas l'eau: car la nature du chaud est de resoudre les subtiles parties: mais sequestre de la subtilité les grosses parties de l'eau. Et ne faict en rien de dire que l'eau boullue est plus grosse que la crue: pource qu'elle est plus obscure & plus trouble.

ET outre plus l'eau des cisternes, laquelle pro-
 uient & est assemblée de pluye: cōbien qu'elle ne soit en la bōté de l'eau des fontaines, & qu'elle dōne aucun empeschement à la poictrine & à la voix: toutesfois si on en prend à petite quantité en plusieurs cisternes elle est de vertu elite, & profite moult: pource qu'elle est legere, subtile, moins humide & moins inflammatoire que les autres eaux. Elle cōstipe aucunement, & donne confort

aux membres. Elle ne nuyt en aucune maniere à l'estomac, ny au foye, ains le conforte. Neantmoins fault entendre & sçauoir que pour sa subtilité celle eau de cisternne a esté engendrée aux nues & au ciel en la subleuation des vapeurs, dõt il aduient pourriture. A ceste cause quand vient l'esté qu'il n'y a gueres d'eau aux cisternes, c'est asçauoir qu'au fons icelle eau pourrist, à cause qu'elle est trop pres de la terre. Et adoncques se fault abstenir d'en boire: car tel breuusage prepare le corps à fieures, & pourrist les humeurs du corps: Mais à telle putrefaction le vin-aigre & autres choses aigres sont opposites. Veu que l'eau est vn simple element, elle n'est point baillee pour nourriture ny à celle fin qu'elle nourrisse le corps: car l'eau ne se digere point. Semblablement l'eau, pource que c'est vn element ne peut estre conuertie en sang, lequel sang conuient, & fault qu'il soit composé des quatre elements: Mais toutesfois le breuusage d'eau est d'autre vertu: Car il eschauffe la nourriture, & la fait subtile. Il rectifie sa substance, la fait passer & penetrer iusques aux membres, & restrainct son humidité & froideur. Il impose silence à la soif, & la paist de chaleur naturelle & accidentale. Il resoluë la creuseté du cœur. L'eau pure nuist aux paralytiques, & aux podagres, & à tous autres ayans froides complexions. Et semblablement aux opilations du foye. Et est à noter, que boire beaucoup d'eau en feruente chaleur, ou incontinent apres labour eschauffant, induist hydropisie. Mais la decoction & mixtion du

vin avecques l'eau, ou la mixtion du miel escumé, oste & efface quasi toutes les malices de l'eau. Notez aussi qu'il se fault soigneusement garder de boire eau trouble pure, car elle oppille le foye & engendre pierres aux reins.

DES ESPECES AROMATIQUES.

Chapitre xvij.

Nous vsons des especes aromatiques communement aux bancquetz, aux potages, saulces bruuages, & senteurs, lesquelles sont, Le poiure, le saffra, la cinamome, les girofles, la noix muguette, zinzambre, cuminum, desquelz est expedient de dire & traicter en vn mesme chapitre.

LE poiure comme il soit de trois sortes, c'est à sçauoir long, blanc, & noir, il est quasi d'une mesme vertu & puissance. Il est chaud & sec vers la fin du tiers degré, combien qu'aucuns dient que c'est au commencement du quart degré. Il conforte l'estomach, il ayde & induist appetit: il prepare la digestion. Et si on en vse en bonne & deue proportion il dōne bon cōfort & ayde aux nerfz enfroidurez: semblablement cōtre la vieille toux, la douleur du ventre, & prouoque l'vrine. Toutesfois son vsage est plus loué en hyuer qu'en esté: & proprement ceux qui sont de froide complexion.

LE saffran est chaud au second degré, & sec au premier. Ce neantmoins plusieurs ont voulu dire que le saffran n'altere iamais l'humeur: mais le garde avec attrépance & le rectifie & garde de

*de f...
de m...
de y...*

pourriture. L'usage moderé du saffran prouoque l'vrine sans difficulté, & dōne force à aspirer. Il œure les opilations du foye. Et iacoit ce qu'il conforte par sa chaleur & stipticité : toutesfois il incite vomissement de geter & fait perdre l'appetit pour ce qu'il est opposite à acetosité, laquelle induist appetit. Il cause aucunesfois & infere douleur en la teste. Et si lon le boit avec le vin, il enyure & faict dormir: mais neantmoins le saffran de sa propriété conforte vehementement le cœur, & donne force à l'esprit & entendement de soy esliouyr. Il enlumine les espritz & les faict espendre par tous les membres exterieurs, en tant que aucunesfois la multitude de sa comestion disperse avecques ioyeuseté les espritz aux membres exterieurs, en laissant la fontaine de chaleur naturelle. Et pour ceste cause ont dict aucuns autheurs que manger demye once de saffran induist la mort en riant & faisant ioyeuse chere.

*ats
anelle*

Cinamome est chaulde & seche au tiers degré, elle rectifie & purge la pourriture & corruption des humeurs, elle conforte l'estomac: elle œure les opilations du foye & fortifie la digestion, elle guarist du caterre & oste les ventolitez du ventre, elle rend la veue plus ague & plus clere, & donne bon remede contre la toux, & les douleurs de la poiëtrine, elle est de grād vtilité & profit par sa vertu tyriacale contre la morsure des bestes venimeuses si on la boyt: ou on la met sur ladicte morsure en forme d'emplastre.

*de m...
de y...*

Girofle

Girofle est chauld & sec au secôd degré. Il fait
& rend bon odeur au corps. Il accue & esclarcist la veue. Il conforte l'estomach & le foye. Il induist & prouoque l'appetit & appaise le vomissement. *Ho la 6e*

LA noix muguette est chaulde & seiche au
second degré. Elle conforte le foye, l'esto-
mac & la rate. Elle prouoque l'vrine, est aussi de
telle vertu, qu'elle restrainct le vomissement &
rent tresbonne odeur à la bouche. *Ho la 6e*

Zinzambre est chauld au tiers degré & sec au
second & a en luy humidité superflue, dont
le signe est tel que sa viande pourrist totalement
à ceux qui ont l'estomach & le foye frois. Tou-
tesfois il est profitable à leur humidité. Il est sem-
blablement de telle vertu, qu'il aduance la dige-
stion. Il allegé & adoucist le ventre, & dône bon
remede contre la morsure des bestes venimeuses.

CVminum est chauld au tiers degré, & sec au
second. Il est de telle vertu qu'il deslie les vèn-
tositez, & appaise la douleur du ventre. Il prouo-
que l'vrine & donne bon remede à la stillatiō &
degoustement. Mais son vsage excessif rend la
face de la personne passe, triste, difforme & toute
exterminée. A ceste cause les hypocrites tiennent
leurs faces & leurs mains à la fumée du cuminū,
quand il est mis dessus les charbons ardans, afin
qu'ilz ayent la face pale, qu'ilz apparoissent au
peuple ieufner. *Ho la 6e*

AV premier degré le basilic est chauld & sec. Ilaçoit qu'il ait en luy aucune humidité, laquelle n'est pas bonne. Et est le basilic de plusieurs especes, mais le meilleur est celuy qui est girofle, & de moindres fueilles. Sa semence ou graine a vne vertu cordialle, car elle œuvre le cerueau & les opilations des narines par le mâger ou odorier. Il resiouist l'ame & le courage par son bon odeur, il donne remede contre les amoroïdes, & contre la crainte du cœur. Son vſage excessif n'est pas à louer: car il engendre sang trouble & melancolye. Toutesfois son odeur induist aucune pesanteur en la teste, ce neantmoins le basilic est iniustement vituperé de ceux qui dient que de ses fueilles s'engendre l'escorpion. Mais cōme dit Galien lon trouue les scorpions aupres du basilic, non pas qu'ilz soient de luy engendrez, mais pour ce que voluntiers courent a son odeur.

DE LA BOVRROCHE.

Chap. xx.

Bourroche est chaulde & humide au premier degré, Et est l'une des especes de buglose: elle esiouist le cœur en nettoyant le sang. Mangée avec leuain elle guerist de la crainte du cœur, & donne remede contre toutes les passions quand elle est cuyte avecques eau & miel. Elle donne secours semblablement contre les apostumes de la bouche, contre la toux, & l'aspreté de la poitrine, & engendre tresbon sang. Elle est aussi de telle vertu

vertu qu'elle profite aux dispositions melancoliques. Son vsage & l'vsage de ses fucilles est moult à louer aux faulces & potages.

DE LA BUGLOSE.

Chap. xxi.

BUGLOSE est celle herbe laquelle nous appellōs *Ala la de bing* langue de bœuf, & est de telle vertu que la bouroche. Toutesfois Auicenne dit qu'il croit que nous n'auons point ceste herbe en ce pays, mais vne autre herbe semblable à la buglose.

DE LA PORÉE.

Chap. xxij.

PORÉE est chaulde & seiche au premier degré, mais elle a les parties froides & humides. Elle ouure les opilations du ventre & le tient lubrique si on la mange avec l'eau de la premiere decoction. Mais quand on iecte la premiere eau, & qu'on l'a encores de rechef cuyte, elle estainct adoncques le ventre. Son nourrissemēt est petit, à cause de son amaritude, en corrompant & rongean l'estomach. A ceste cause doit estre mägée avec doulces especes aromatiques, & avec lait d'amendes.

DV BEURRE.

Chap. xxij.

AV premier degré le beurre est chauld, sec & *So. ang. w* humide. Il est de grand nourrissement, & qui

engresse fort. Toutesfois son vsage superflu rend l'estomach debile, & prepare à maladies flumatiques s'il est meslé en la viande avec des amandes & sucre, il meurrist le catherre, & donne remede contre la toux froide & seiche. Et quand on en frote l'estomach & la poitrine, il dōne remede contre les crachemens, & vomissemens de sang. Semblablement aussi cōtre la morsure des bestes venimeuses. Et le manger cru sans autre viande est tyriaque contre tous venins, prins par boire: & contre tous autres venins, quand il est mangé seul à ieun.

D U C Y T R O N .

Chap. .xxiiij.

LE cytrō a quatre diuerſes parties, son escorce est chauld au premier degré: laçoit ce que lō dye qu'il soit chauld & sec au ſecōd, & son escorce, & sa ſemence, ſont treſcordiaux, & reſiouiffās l'ame. Sēblablemēt ſon acetositē cōſorte le cœur, & propremēt quād elle est en chaulde attrēpance. L'escorce du citrō dōne bon odeur en la bouche, garde & preſerue le corps de la putrefaction des humeurs, & est entre autres de telle nature que ſi elle est miſe entre les draps elle les garde d'eſtre mengez de vermine. La pulpe du cytron quād elle est crue est inflatiue, & gaſte l'estomac. Elle est de difficile digestion, & prepare les douleurs du ventre, mais conſite elle est de meilleure digestion & profite à la gorge & au poulmon. Son acetositē avec ce qu'elle conſorte le cœur, elle reſtrainct le flux de ventre, & le vomissement colerique: elle prepare l'appetit, elle eſtainct

frainct les chaleurs furieuses. Lon faiet aussi de son ius & acetosité du cyrop, lequel est de grandes louenges: Car il donne tresbon remede cõtre les fieures pestillenciales, & garde la personne de les auoir. Toutesfois son ius nuyt aux nerfz & à la poictrine. Et est aussi de telle vertu le ius de cytrons, que si on en frotte la face, il garde d'auoir des lentes en la teste. Si aucun drap est taché ou vicieux de quelque tache & vice, & que dessus ladicte tache lon mette du ius de citron, ledict drap reuiendra en sa premiere couleur, & n'y apparoiſtra aucunement qu'il y ait eu tache. Si lon boyt des grains ou semence de citron, ou que d'iceux on frotte tel mēbre que lon voudra, par le bruuage tout le cors, & par le frottemēt du mēbre, iceluy mēbre sera guaranty & preferué de tous venins.

D V C O I N G.

Chap. xxv.

LE coing est vn fruiet lequel est froid au premier degré, & sec au second: & quand il n'est pas en parfaite maturité, il aggrauē & corrompt l'estomach, & est de difficile digestiõ. Les coings aigres sont nuyſibles, iacoit ce qu'ilz soient meilleurs pour le flux du ventre. La meilleure mode & façon de menger le coing est de cauer dedans & tirer la semence: puis l'emplire de myel & de sucre, apres cela le mettre sur les charbons & le manger, car adonques il n'y a rien qui plus garde l'estomach, que d'autre

part ne prenne les humeurs. Il induit appetit. Il oste ebriété comme le syrop, & si on le mange apres la gourmandise, il profite moult à la poictrine. Il adoucist l'aspreté de la gorge, & la canne du poulmon, & propremēt le cyrop faict de sa semēce & graine, garde de cracher le sang. Le coing a ceste propriété que quand il est faict en condignac, & on le mange seul, l'estomach ieun, deuant toute autre viande, & que prendre sa refection, il conforte l'estomach & restrainct le ventre : mais quand on le mange apres la viande, il faict vn bō seel à l'estomach. Et à cause de sa stipticité en comprimant la viande rend le ventre lubrique. Si on mange en grande quantité il faict descendre la viande indigerée, & est quasi ceste reigle cōme de toutes viandes stiptiques quand on les mange deuant la viande & refection, elles restraignent le ventre mais apres la viande le rendent lasche & fluxible.

DE LA CHASTAIGNE.

Chap. xxvi.

LA chastaigne est chaulde au premier degré, & seiche au second. Elle est de grād & moult bon nourrissement si elle est bien digerée: elle en gressist, & conforte l'appetit: mais elle est encore de plus profitable nourrissement, quand elle est mangée avecques miel & sucre. C'est à sçauoir quant à ceux qui sont de complexion flegmatique. Toutesfois les chastaignes sont de dure digestiō & enflent le vêtre en causant & engēdrant quelque

quelque ventosité: mais aussi aucunes fois induysent pesanteur & aggravation du cerueau, à cause de leur difficile digestion & de leur fumée enclose en l'estomach. Quand la chasteigne est rostye elle est tresbonne & saine: car par le feu sa stipticité est ostée, & aussi toutes choses nuyssibles qui y peuuent estre. Et adonc est plus legiere & contempere la poictrine, & semblablement la seicheresse de tout le corps. Si apres que la chasteigne est rostye lon la met dedans de l'eau tie-de, elle prouoque l'vrine. Aucuns aucteurs blasphemement la chasteigne, disant qu'elle est semblable au gland quāt au nourrissemēt: A ceste cause dient qu'elle n'est pas viande aux hommes, mais aux pourceaux.

DE CHRISOMYLA,

autrement dictē Munia.

Chap. xxvij.

Chrisomyla autrement dictē munia, sont petites pesches, lesquelles sont froides & humides au second degré. Elles engendrent grosses flegmes & visqueux. Elles esmouuēt le vētre & l'enflent. Leur nourrissement est de legiere pourriture, parquoy preparent le corps humain à fieures pourries. Toutesfois leur infusiō oste la soif, & donne remede contre les fieures agues. Semblablement elles sont profitables à l'estomach en le confortant plus que la pesche. Iacoit ce qu'aucuns diēt qu'elles nuyssent à l'estomach,

en estaignant chaleur naturelle, laquelle chose est veritable quant à l'estomac froid. Mais la maniere de corriger leur malice & vertu nuyfible, est de les manger deuant la viande. Et apres qu'on les aura mengées, que lon mange de l'anis & mastix avec vin vieil pur & odoriferant, ou avec raisins de Carefme: & ceux qui ont l'estomac froid, mengent du myel: mais si on les mange apres la viande, elles nagent en l'estomach, & se cōuertissent en putrefaction.

D E S C A P P R E S.

Chap. xxviij.

AV second degré la cappre est chaulde & seiche. Elle est de petit nourrissement. Elle cōferme & profite a l'estroicture de la poitrine. Elle ouure les opiliatōs de la rate & du foye. Et proprement conforte la rate, & la clarifie en euacuāt d'icelle les grosses matieres. Elle prouoque l'vrine aux melancoliques, elle tue les lumbrices: elle incite & prouoque l'vrine, a vertu tyriacale contre le venin. Son vsage avec le vin-aigre est fort à louer au temps de pestilence: car le vin-aigre corrige sa malice, & sa vertu nuyfible.

D E L A C O U R G E.

Chap. xxix.

Courge est froide & humide au second degré. Son nourrissement est petit & flumatique, & descend

descend de l'estomach legierement, elle rend l'estomach humide, & estaint la soif: elle cōpete & appartient aux chaudes cōplexions: mais elle est cōtraire aux froides. La vertu de la courge engendre telz humeurs comme sont choses meslées avec elle, avec choses chaudes elle engendre chaudes humeurs, & avecques choses froides humeurs froids. Elle est tresbōne avec le vin de coings, ou avec le vin de grenades, ou de verius de grain: car en ce cas elle estainct la soif à ceux qui sont de chaulde complexion, en refrigerant chaleur naturelle. Elle profite beaucoup à ceux qui sont de froide complexion avec choses choses aromatiques & avecques miel. Sa viande donne remede contre la toux & douleur de poictrine: & par sa froydeur affroydist l'estomach & les entrailles. Aucunefois engendre douleur au corps. Mais si elle est fricte apres qu'elle aura trempé & boullu en eau, son humidité superflue sera ostée, & adonc peut estre confitte avec le ius d'agrefta, que nous appellons verius de grain, ou avecque choses aromatiques, selon l'indigence de la complexion: car de telle preparation & appareil elle est rendue moins putrescible, pour ce que la courge de soy engendre facilement humeurs tendans à pourriture. Finablement la courge estainct l'ardeur de l'vrine. Et icelle pro-uoque principalement sa graine & semence.

D V C O N C O M B R E .

Chapitre xxx.

E ij

Concombre est froid, & humide au second degré, il engendre dures & grosses humeurs: & est de difficile digestion. Il descend tart de l'estomach & est disposé à putrefaction & pourriture des humeurs, parquoy excite fieures pourries. Il rend la viande crue, laquelle il trouue & rencôtre en l'estomach, en telle facon qu'elle ne peult estre desliée de l'estomach. Il oste la soif, & son aquosité & humidité estainct l'ardeur de la fieure. Sa pulpe prouoque l'vrine & estainct son ardeur. L'odeur du concombre faict reuiure ceux qui ont chaulde sincopin. Sa racine faict & incite vomissement, mais ses fueilles sont de telle vertu, qu'elles donnent remede contre la morsure d'un chien enragé.

DES CITROVILLES.

Chap. xxxi.

Les citrouilles sont fort semblables aux concombres. Mais ilz engendrent plus gros sang & plus froides humeurs. Ilz nuysent plus à l'estomach que le concombre, & sont de plus longue digestion. Ilz courent par les veines tous cruz, & disposent les corps à fieures quotidiennes. Quand ilz sont trop longuement en l'estomach, ilz nuysent plus à la force de l'estomach. Son vsage excessif prepare à corruption des humeurs venimeux. Mais leur moille engendre plus parfaite humeur. Ilz ont les vertus semblables aux concombres à estaindre la soif & l'ardeur de la

la fieure, & à prouoquer l'vrine.

DES CERISES.

Chap. xxxij.

LES cerises font moult froides au premier degré, & humides au second : & sont de trois especes, c'est à sçauoir douces, aigres & meures. Et y en a de petites aigres, & de grandes & de grosses cerises lesquelles sont aigres & doulces. Et celles la engendrent mauuaises humeurs, gastent l'estomac & les entrailles, & sont lesdictz humeurs preparez à pourriture & empeschent generation: Parquoy preparét le corps à fieures pourries. Les grosses cerises aigres sont de pire qualité que les autres, & induisent plus grande aggrauation & douleur à l'estomach. Les petites cerises aigres engendrent meilleurs humeurs, & n'ont pas tant d'humidité putrescible. Toutesfois elles participent aucunement de stipticité. Elles rompent la colere & estaignent la soif, & induisent à appetit. Celles là sont les meilleures, lesquelles sont gardées seiches pour vsage. Et du ius d'icelles lequel est gardé & seiché au soleil en vne fiolle, est faicte tresbonne saueur sil est destrempé avec vin-aigre ou verius de grain: car entre toutes les autres saueurs incite principalement l'appetit.

DES POIX.

Chap. xxxij.

E. iij

IL y a trois especes de poix, c'est à sçauoir blâs, rouges & noirs: le blanc est chauld au premier degré, & sec au cōmencement du premier: laçoit ce qu'aucuns dient qu'il soit humide. Le rouge est plus chauld & plus sec que le blanc, & le noir encores plus que le rouge. Toutes ces especes cy sont de meilleur nourrissement que les febues. Toutesfois elles ont disposition inflatiue, & enflēt. Le noyr est de meilleure vertu que le rouge, & le rouge que le blanc. Ilz clarifient la voix & profitent à la poictrine, & le plus souuent donnent bon nourrissement au corps humain. On faict des chauldeaux de leur farine pour la disposition de la poictrine, & doit on faire cuire lesdictz poix avec l'eau en laquelle ilz auront trempé & amolli. Et doyuent estre mangez avec la decoction premiere. Car en leur chauldeau ou brouet est leur meilleure vertu, pour ce qu'il oste les opiliatiōs de la rate & du foye. Il induist bonne couleur & viue à la personne. Et est à noter que par cicer nous entendons toutes sortes & manieres de pois estans de present en vſage pour le corps humain. Les poix doncques rompent la pierre des reins & de la vessie. Ilz prouoquent l'vrine. Ilz nuyſent aux playes & aux douleurs de la voye de l'vrine. Ilz engendrent lepre, ilz incitent & prouocquent luxure. Celuy qui est verd engendre à l'estomach & aux entrailles superfluitez, il faict auoir mauuaise odeur en la bouche. Les petis pois sont en la vertu des blancs. Le noyr est meilleur à oster les opiliations, à rompre la pierre & à reietter les vers
hors

hors du corps. Mais le blanc est meilleur pour augmēter la matiere de luxure. Et est à noter que le laüement faict du brouet de pois nettoÿe & purge le corps.

D V C H O V.

Chap. xxxiiij.

LE chou est de plusieurs especes, mais le domestique, c'est à sçauoir celuy duquel nous auons commun vsaige en ce pays, est chault & sec au premier degré. Il engendre gros sang & melancolie, & faict aucunesfois apparoir mauuais songes & fantastiques. Son nourrissement est petit, & nuyt aucunement à l'estomach: mais quand lon le faict cuire avecques chair grasse & chair de poulle est de meilleur nourrissement. Les choux d'hyuer sont meilleurs que les choux d'esté. Ilz expugnent de la poictrine les humeurs flegmatiques. Ilz adoucissent la gorge, & clarifient la voix. Leur semence avecques eau de lupinus faict mourir les vers. Si les choux sont mangez avec leur premier chauldeau & premiere decoction, ilz laschent le ventre, & leur substance corpulēte prouoque l'vrine: mais quand ilz sont mangez avecques le chauldeau de la seconde decoction ilz restraignent le ventre, principalement si avecques eulx est cuit vieil fourmage. Leur decoction & leur semence ostent ou retardent ebriété, de laquelle chose Aristote assigne raison in suis problematibus, car ilz font penetrer le vin aux vaines de l'vrine avec lubricité, parquoy deffault la calligi-

neuse euaporation du cerueau , laquelle caufoit ebriété. Le ius des choulx est moult profitable avec le vin contre la morsure du chien enragé.

D U F O U R M A G E .

Chap. xxxv.

Fourmage est faict aucunesfois de laiët, & aucunesfois d'eau de laiët que nous appellös laiët clair, & est celuy qui est appellé fourmage recuit. Le fourmage est diuersifié selon ce qu'il est recët, c'est à dire mol, ou selon ce qu'il est antique & dur, ou selon ce qu'il est fallé, ou non fallé. Le fourmage mol est froid & humide au tiers degré. Cöbien qu'aucuns dient que ce soit au premier. Le fourmage sec fallé a chaleur & seicheté au tiers degré. Et le fallé non sec a vertus mediocres entre le mol & le dur. Le meilleur fourmage est celuy lequel declinant à suauité & aucune douceur, n'est point trop fallé, & est moyen entre le dur & le mol, le visqueux, & le sangible. Et est à noter que le fourmage est varié selon la diuersité des bestes desquelles le laiët est traict, comme cy apres sera dict au chapitre du laiët. Il est varié aussi selon les regions & selon la diuersité des herbes, desquelles les bestes portans laiëtages prennent pasture. Le fourmage mol est de moult grand & bon nourrissement. Il engressist & est bõne viande pour ceux qui crachët le sang. Il donne bon remede & cöfort à la poëtrine & à l'estomach. Cöbien qu'aucuns doutent d'iceluy, pour ce qu'il ne profite point aux froides

froides cōplexions. Le fourmage vieil est de difficile digestion, il est contraire & nuyfible à l'estomac. Ceux qui vsent trop d'iceluy encourēt douleur au ventre. Il est de petit nourrissement. Il amaigrift & est facilement conuertible aux humeurs coleriques. Le fourmage recuit, qui est appellé recocta, est pire q̄ le fourmage mol, & que le fourmage moyen salé, & est de meilleure nourriture que le fourmage vieil. Le fourmage engendre la pierre aux reins & à la vessie, & propremēt celuy qui est humide. Quiconques est disposé à la pierre se doit garder de manger fourmage: car comme nous voyons la terre glaire ou la craye estre cōuertiz en pierre & en tuile en la decoctiō de la fournaisc: tout aīsi est-il des humeurs gluās, gros, visqueux quand il y a chaleur ardente es voyes de l'vrine: car d'iceux s'engendre la grauelle, laquelle ioincte ensemble constitue & engendre la pierre, & est le fourmage generatif de telz gros humeurs & visqueux, principalemēt quand il est mangé parmy de la paste, comme en vn gaſteau, en bignetz ou en tarte. Le vieil fourmage roſty ou peſtry & lauē aucunes fois en eau de roſes, a ceste propriēté qu'il reſtraint moult le flux de ventre. Iacoit ce que le fourmage ſoit ſi nuyſible comme deſſus eſt dit: toutesſois quand on en mange vne petite portion ou aucune petite quantité apres la reſectiō, il corrobore & fortifie la bouche de l'eſtomac, & faiēt vn bon ſéel à ladiētē bouche de l'eſtomac. Il n'eſt pas auſſi du tout mauuais, mais a celle vertu en luy entre les autres vertus qu'il garde & defend de mōter les fumées

Contre le
flux de
ventre

en la teste. Il oste la satureté & fastidiosité, lesquel
 les prouienent de viandes doulces, & engendrent
 ventositez. Ce est à noter que quand le fourmage
 est si familiere viande à quelque personne, qu'il
 est coustumier d'en manger pour le grand appetit
 qu'il y trouue, la plus grande partie de ses ver-
 tus nuisibles sont ostées. Car ainsi comme est dit
 aux reigles generales, la viande accoustumée à
 manger, & laquelle est prinse & mangée avecq'
 bon appetit, combien que de soy elle soit nuyssi-
 ble, elle engendre meilleur sang que la meilleure
 viande que lon puisse trouuer non mangée de si
 bon appetit : & qui plus est, l'accoustumance de
 manger des le ieune aage à l'enfance, est de si gran-
 de vertu & efficace, que le venin & la medecine
 venimeuse est conuertie en bonne nourriture. A
 ceste cause les Indois pendant le temps qu'ilz au-
 oyent mauuais roys, leur coustume estoit de
 nourrir & alimenter ex nappello, herbe tresveni-
 meuse, & d'autres venins les ieunes fillettes, les-
 quelles ilz voyent estre le temps aduenir excel-
 lentes en beauté, pour reprimer & refrener la ma-
 lice & lubricité d'iceux roys. Car quand ilz ac-
 complissoient leur luxure & paillardise avec ces
 filles, ilz mouroyent soudainement.

DE LA CHAIR.

Chap. xxxvi.

ENtre toutes autres viâdes, la chair est de tresbon
 nourrissement: car elle corrobore, conforte, ali-
 mente & engressist le corps, & est de prochaine
 conuer-

conuerſion en ſang. Parquoy ceux qui mangent grande quantité de chair avec breuuage de vin ſont moult repletz & ſanguins. A ceſte cauſe ſouuentefois ont indigence & beſoin de medecine laxatiue ſelon l'opportunité du tēps. La bonté & malice de la chair eſt variée par pluſieurs ſortes & manieres,leſquelles fault entēdre & ſçauoir pour cōſeruation de ſanté corporelle. La premiere ſorte eſt prinſe pour la difference du ſexe. La ſecōde ſorte eſt prinſe de la differēce du chaſtremēt. La tierce ſorte eſt prinſe de la differēce de la ieuneſſe. La quarte ſorte eſt prinſe de la differēce des regiōs ou demeurēt les beſtes, & la differēce des herbes & paſturages, deſquelz leſdictes beſtes ſont paſturées & nourries. La cinquieſme ſorte eſt prinſe de la difference de la greſſe & maigritude des beſtes, ou de la ſanté, ou de la maladie d'icelles. La ſixieſme ſorte eſt prinſe de la difference du temps de l'an auquel la chair eſt mangée. La ſeptieſme ſorte eſt prinſe de la difference de l'induftrieux appareil & cuiſſon d'icelle. La huiētieſme ſorte eſt prinſe de la diuerſité & difference des eſpeces des beſtes, ſelon leur propre nature. La neufieſme eſt prinſe de la difference & diuerſité des membres.

Quant à la premiere differēce, cōme ainſi ſoit que tout maſle ſoit plus chauld & plus ſec q̄ toute femelle de ſon eſpece, la bonté de la chair ſera variée ſelon le ſexe, quant à la variation de la nature des eſpeces des beſtes: car combien que plus ſouuent la chair des maſles ſoit plus loüable & meilleure que la chair des femelles, ce neantmoins en aucunes eſpeces de beſtes ou oyſeaux la

chair de la femelle est plus loüable & meilleure
 que celle du masle, cōme la chair de la cheure au
 regard de la chair de bouc, & la chair de la geline
 au regard de la chair de coq. De la secōde différen-
 ce, nous voyōs la chair des bestes chastrées estre
 meilleure que la chair des autres bestes de ceste
 espee. Les masles chastrez sont meilleurs que les
 femelles à cause de la nature masculine : Et la fe-
 melle chastrée est meilleure que le masle nō cha-
 stré, car par le chastrement chaleur naturelle est
 remise, & la seicheté ostée. Et sont les bestes
 chastrées reduictes à aucune espee d'attrempan-
 ce. Car quand elles sont comparées aux masles,
 ne sont point pires ne l'un ne l'autre, pour quel-
 que operatiō charnelle qu'ilz s'efforcēt faire l'un
 avec l'autre. Et comme dit Aristote, les bestes les-
 quelles engendrent souuent & s'efforcent engen-
 drer, & exercent souuentesfois copulation char-
 nelle, enuieillissent incontīnēt, seichent & endur-
 cissent leur chair, & acquierent nature de vieilles-
 se. Et les bestes & oyseaux chastrez ne sont ia-
 mais gastez ne contaminiez par copulation char-
 nelle. Nous voyons aussi les vaches, cheures &
 autre bestial estre meilleurs & auoir meilleure
 chair quand ilz n'engendrent point que les be-
 stes lesquelles engendrēt: & les gelines estre meil-
 leurs quād elles ne ponnēt point que quād elles
 pōnēt. A ceste cause diēt les philosophes que les
 gelines sōt meilleures en hyuer qu'en esté, & qu'en
 toutes les autres parties de l'an, pource qu'elles
 cessent à pondre, & principalement en automne.
 Et pour ceste cause aussi les femelles des bestes &
 oyseaux

oyseaux chastrez, cōme il appert des pourceaux & des poules chaponnées, sont tousiours plus grasses que les autres: pource que leur chaleur naturelle est multipliée, & adonc digerent l'humidité & gresse qui n'a pas esté suffisamment digérée, & qui a esté parauant de mauuais nourrissement.

De la tierce difference il appert manifestement l'aage des bestes estre moult requise & tresvtile à la bonté de chair: car la premiere aage des bestes est humide, & de tant plus qu'elle tend à vieillesse, tāt plus est seiche, iacōit ce qu'elle puisse estre aucunesfois humectée par vne humidité accidentale. Les bestes desquelles la complexion naturelle est seiche, sont meilleures en l'aage auquel leur complexion & seicheté naturelle avec l'humidité de la cōplexion de l'aage est attrépée, laquelle chose n'aduiant ainsi des bestes ayans naturellement humide complexion. Et à ceste cause nous disons que les aigneaux & cochons durāt le tēps qu'ilz succent la mammelle de leur mere, sont de mauuaise, humide & grosse nourriture, aggrauāt asprement l'estomac. Pource leur naturelle humide complexion s'adioinct avec l'aage & puerile complexion. Mais quand ilz croissent & cōmencent à venir à plus grand' aage leur humide naturelle complexion au decours de l'aage est attrémpee à plus grande seicheté. A ceste cause selon les medecins, & proprement au pays d'Arabie, auquel le chastremēt des bestes n'est gueres en vsage, la chair d'un aignel d'un an est moult extollée deuāt qu'il soit pollū. C'est adire deuāt qu'il ayt

accomply ceuvre charnelle avec son semblable. Mais toute chair de vieilles bestes est tresmauvaise, & de difficile digestion, & pareillement aussi generatiue de mauuaises humeurs . La chair des bestes lesquelles faillēt encores du vêtre, ou sont sorties depuis vn peu de temps, & les oyseaux de bonne plume engendrent humeurs putrescibles & abominables à tout le corps.

De la quarte difference, nous voyons selon diuerses regiōs, & diuers pays diuerses bestes estre meilleures . Aux lieux des montaignes & lieux pierreux les meilleures bestes sont produictes, lesquelles sont de plus subtile, sauoureuse & legere chair que les autres.

Le contraire est des bestes produictes es lieux aquatiques, fangeux & là ou court la mer . Et est à noter que des meilleures herbes & pasturages meilleurs humeurs, meilleur laiēt, & meilleure chair sont produictz . Et de tant plus les bestes produisent meilleure chair, de tant qu'elles ont viandes plus proportionnelles, & plus cōuenables à leur nature. A ceste cause nous disons les porceaux estre meilleurs quand ilz sont nourriz de glan, que quand ilz sont nourriz d'herbe . Et les chapons & gelines estre meilleures de manger & estre nourriz de fromēt & de millet que d'herbes ou de son.

De la cinquiesme difference, absolument les bestes sont meilleures quand elles sont moyennes, c'est asçauoir entre maigritudē & grāde gresse: Car abondance de gresse rompt l'appetit, debilitē l'estomac, empesche la digestion, & prepare
le corps

le corps à mauuaises humeurs : parquoy la science & cotelte d'elire la chair sur la beste, est d'une grasse beste prédre la plus maigre chair, & d'une beste maigre prendre la plus grasse chair.

De la sixiesme difference. Les bestes chaudes sont meilleures en hyuer à cause de leur humidité, & les froides sont les meilleures en esté. A ceste cause la chair du porc quant à ceux qui ont tousiours l'appetit ouuert, est meilleure en esté qu'en hyuer, à cause de son humidité. Et les pigeons sont meilleurs en automne qu'au printéps. Les petitx oyseaux au printemps quand elles nichent ne sont pas bonnes : mais sont meilleures en automne, pource qu'elles sont pourries de figues & de raisins.

DES OUSTARDES.

Les oustardes sont meilleures en hyuer quand elles ne s'exercét point tant à voler, & encore meilleures au téps des neiges qu'ad elles prennét leur pasture, nourrissemét & alimétation des vers estans autour de la racine des arbres.

De la septiesme difference.

Gráde diuersité & differéce acquiert la chair & la maniere de leur appareil. La chair grasse est meilleure & plus saine à rostir qu'à bouïllir, & encore meilleure qu'ad elle est rostie sur les charbons ardans. A celle fin que son humidité coulle sur les charbõs, & qu'elle soit resoluée & rendue plus seiche. La chair maigre est plus saine & meilleure bouïllie que rostie, afin que sa seicheté soit attrépée avec humidité aquatique : mais la chair

moyenne peult estre indifferemment boüillie ou
 rostie, selon la nature de la beste de laquelle elle a
 esté prinse, & l'appetit de celuy qui la veult man
 ger. La chair d'aucunes bestes est meilleure rostie
 que boüillie, comme la chair de porc & d'autres
 bestes humides. Au contraire la chair d'aucunes
 bestes est meilleure boüillie que rostie, comme la
 chair de bœuf & plusieurs autres bestes seiches.
 Chair frite & chair cuite en vn vaisseau est moyé
 ne en vertu entre la chair rostie & la chair bouil
 lie: iagoit ce que la chair frite soit plus prochai
 ne à la chair rostie & à la chair cuite en vn vais
 seau, qu'à la chair boullie. Il est conuenable sur
 toutes choses de soy garder de couvrir fort chair
 rostie, ains il l'a fault laisser descouuerte pour les
 inconueniens qui en peuvent aduenir: car quand
 la chair rostie est fort couuerte, & en telle façon
 que son euaporation ne puisse sortir, ains est pro
 hibée & gardée par telle couuerture, elle est con
 uertie en venin & chose venimeuse, selon l'opi
 niniõ des Philosophes, des autres aucteurs & l'ex
 perience sur ce faicte, laquelle chose est moult à
 douter & à craindre. Car à cause de ce aduiét sou
 uentesfois plusieurs inconueniens, lesquelz sont
 incogneuz à plusieurs personnes. La chair rostie
 est de plus grãde & meilleure nourriture, & plus
 conuenable aux corps robustes & fors, & de plus
 difficile digestion que la chair boullie: & à ceste
 cause engédre meilleure & plus profitable nour
 riture que n'est la chair boullie: pource que la
 chair est plus humide d'humidité aquatique &
 actuelle: iagoit ce que la chair rostie ayt propre
 humidité.

humidité. La chair rostie cuist en sa propre humidité: mais la chair bouillie cuist en estrange humidité, laquelle retire son humidité. A ceste cause la chair bouillie est rendue plus seiche par sa propre humidité que la rostie. Quand lon veult rostir chair, ne luy fault pas faire grand feu flambât de prime face, ne approcher si pres du charbon fort ardent: car tel feu & si aspre chaleur luy feroit venir trop grosse cruste. Parquoy seroit empeschée la penetration de chaleur aux parties interieures de ladicte chair. A ceste cause dit Aristote estre chose plus artificieuse & plus industrieuse rostir que bouillir. Oultre-plus la chair acquiert telle vertu cōme les choses avec lesquelles elle est confite & meslée. De toutes ces reigles cy & de toutes les autres lesquelles nous delaissons à dire & declarer pour cause de brieueté, experiance donne suffisant tesmoignage. De la huitiesme difference & diuersité est clair & manifeste aucunes especes de bestes auoir meilleure chair que les autres absolument. La meilleure chair entre les oyseaux c'est la chair de becasse, du faisât, & de la geline. Entré les bestes sauuages la meilleure chair c'est la chair du cheureux, & la chair du porc sanglier ieune deuant qu'il soit pollu. Il y a aussi difference aux membres des bestes, car la chair des genitoires & des māmelles est meilleure que la chair du foye & des autres mēbres: mais à celle fin que de ceste huitiesme difference & diuersité nous ayons bonne notice & cognoissance, ie declareray cy apres chacune espee des bestes qui se peuuēt manger, & desquelles le corps

humain peut estre nourry & alimenté, & de chacun des mēbres d'iceux. Premièrement cōme à la plus noble nous commencerons à la becasse.

DE LA BECASSE.

LA chair des becasses est la plus legere & subtile chair qui soit entre to^s les autres oyseaux: elle decline à attrempance, elle engresse le corps, elle cōforte le cœur, elle nettoye & guarist la debilité du cœur, elle donne medecine au foye, à l'estomach, & contre hydropisie, elle augmente la matiere de luxure, & est meilleure & plus conuenable que tout autre oyseau à ceux qui se veulent garder par subtil regime: & sont les poussins encore meilleurs.

DE LA PERDRIX.

Pource que la perdrix est vne espee de becasse, iacoit ce qu'aucuns dient autrement, sa chair donne bonne augmentation au cerueau & entendement, elle prouoque & incite copulation charnelle, & augmente sa matiere.

DU FAISANT.

ET combien qu'Auerrois dit que la chair du Faissant est meilleure que la chair de tous les oyseaux, toutesfois elle est moyēne entre les bōtez de la becasse, & de la geline.

DES GELINES ET DU COQ.

ET des coqz celuy là est le meilleur, lequel n'a point encore chanté ny engendré, ny pollué sa chair. Des gelines, celles sont les meilleures lesquelles n'ont point encore ponnu. Et est à noter
que les

que les meilleures gelines que lon scauroit manger pour la santé corporelle, sont celles lesquelles sont rosties au ventre du cheureau. Aucuns des auteurs louent les chapons, & les dient estre meilleurs que toute autre volaille. La chair des poussins faict augmentation au cerueau & entendement: & le poussin masse est meilleur que la femelle. La chair de geline conforte la poitrine, & restraint la seignée du nez, elle clarifie la voix, & engressist le corps. Le ius d'un vieil coq quand il est beu, donne bon remede contre les douleurs du ventre.

DE LA COTURNICE.

CHair de coturnice est à craindre aucunement à manger, pource qu'elle mange vne herbe moult venimeuse & spasmeuse, laquelle est appelée helleborus. Aucuns des auteurs dient que sa nourriture est tresbonne, & est generatiue de la matiere de copulation charnelle à l'homme, toutesfois il y a grande cōtrouersie entre les auteurs de la coturnice & de la caille: car les sages & instruietz aux histoires de la langue Latine entendent par les coturnices les cailles. Et ainsi l'a entendu le translateur d'Auicenne au chapitre de la coturnice, quand il escript la propriété de la caille, disant que d'icelle est crainct le spasme, pource qu'elle prent sa nourriture de l'herbe dessusdictte, plusieurs autheurs entendent par la coturnice vn oyseau, lequel a les plumes painctes, & est plus grand que la perdrix, cōbien qu'il soit en la bonté de la chair de perdrix.

R E G I M E

DES PIGEONS.

Pigeons sont chauds & humides à superfluité, les ieunes pigeons lesquelz commencēt encores à voler, cōme de l'aage d'un mois, sont de plus legere & meilleure nourriture que les autres, & iceux petitx pigeons sont conuenables aux flegmatiques, & les doiuent manger les coleriques avec vn peu de vin-aigre, ou autre chose qui altere chaleur. Les vieilx pigeons sont de moult durre & difficile digestion, & non loüable.

DE LA TURTERELLE.

Aucuns appellent la turtrelle perdrix: mais ilz errent. Sa nourriture est stiptique, & donne tressingulier remede contre le flux de ventre. Auicenne loüe la chair de la turtrelle si haultement & excellentement, qu'il dit qu'elle est meilleure que la chair de toute volaille: & cela est pource qu'en toute la region d'Auicenne les turtrelles sont meilleures qu'en Italie, ainsi comme dient les habitans d'icelle region: pource que la turtrelle de sa propre nature conforte l'entendement & le cerueau, & faict augmētation en la matiere de la copulation charnelle.

DE LA PASSEREAU.

La chair du passereau est chaude, de mauuaise nourriture, & de difficile digestion, & incitative de charnelle copulation.

DE L'ALOÛETTE.

Chair d'aloüette est par soy stiptique: elle restraict le vētre, mais son brouet quād en boüillant

lant lon tire sa viscosité, il le lasche & rend le ventre lubrique.

DU CANART.

Chair de Canart est plus chaulde que la chair de toute volaille domestique, elle dōne remede aux froides complexions, & nuist aux chaudes si elle n'est alterée avec froides complexions, elle engresse, elle oste les vétositez, elle clarifie la voix: & quād elle est bien digerée, elle est de grande & profitable nourriture.

DE L'OYSON.

LA chair d'Oyson est plus froide que la chair du canard: Les meilleures parties de l'oyson sont les æsles, la poictrine & le ventre.

DE LA GRUE ET DU PAON.

LA chair de grue, du paon, de l'oustarde & des grands oyseaux est de grosse nourriture, & de difficile digestiō, & n'est gueres cōuenable pour la nourriture & aliment du corps humain.

DES OYSEAUX DE RIVIERE.

LA chair des oyseaux des estangs, des riuieres, & des prez aquatiques, est grosse, & engēdre superfluitez: & n'est pas conuenable l'vsage de telle chair.

DES PETITZ OYSEAUX.

VIande de petitiz oyseaux est de bonne nourriture, & proprement quand elles ne nichent point, & quand elles sont grasses: aussi est de telle condition Turdus: mais lon doit craindre à manger de son estomac, pource qu'aucuns diēt qu'il

est nourry de nappellus herbe tresvenimeuse.

DE LA CAILLE.

LA chair de la caille est chaulde & humide en este, mais au temps d'yuer elle est melancolique, seiche & de mauuaise nourriture, combien qu'elle soit de facile digestion, en augmentant la matiere de charnelle copulation.

DV CHEUREUL.

CHair de cheureul est la meilleure chair de toutes les bestes sauuages, elle est de bonne & louable nourriture, & engendre peu de superfluitez : combien que le sang engendre d'icelle chair tende à aucune melancolie.

DV LIEURE.

CHair de lieure est de moult froide & seiche complexion : iacoit qu'il soit dit qu'en aucuns lieux soit de chaulde complexion, elle est de bon & profitable nourrissement : mais elle est generative des humeurs melancoliques, plus que la chair du cheureul : La preseure du lieure, c'est a sçauoir celle partie d'aupres les entrailles que lon prend en vn veau pour faire congeler & conglutiner le laict pour faire les fourrages, est bonne pour restraindre le ventre, & est tyriaque contre tous venins. Aussi la ceruelle du lieure faict incontinent venir & croistre les dentz aux petitz enfans.

DV CHEUREAU.

La chair

LA chair du cheureau est des meilleures chairs qui soyent entre les bestes domestiques : car elle n'a aucune mixtion de malice en soy, si ce n'estoit qu'elle fust mangée incontinent après que le cheureau seroit sorty du ventre de la cheure : car adonc il a vne viscosité & superfluité humide en soy. Quand il est seuré & gras, sa naturelle complexion seiche, humide, & etatue est attrempee. Et pour ceste cause il engendre sang leger, subtil & attempé. Telle chair n'est pas conuenable à ceux qui font labourer : car elle n'arresteroit point en leur corps, pour la subtilité & tendreté de la substance de sa nourriture.

DES MOUTONS CHASTREZ.

CHair de moutons chastrez est meilleure que la chair des aigneaux ; elle engendre tresbon sang, elle est chaulde & humide, declinant quasi à attrempance, si le mouton est en son ieune age : mais les vieilz moutons, comme dessus est dit, sont tresmauuais pour le corps humain.

DU BEUF.

CHair de beuf est froide, seiche & de difficile digestion, elle engendre grosse, trouble & melancolique nourriture : laquelle, aussi prepare à fieures, & nuist à rongneux & lepreux.

DU VEAU.

CHair de veau est vtile & profitable pour le corps humain, & à cause de l'attrempance de l'age, comme dessus est dit, est de tresbon nourrissement.

D V P O R C .

CHair de porc est variée cōme les autres chairs en bōté & malice selon la diuersité de l'aage. Elle est fort humide & visqueuse . Sa nourriture est bonne & moult cōuenable, & plus aux corps robustes qu'à ceux qui sont delicatement nourriz, pource qu'elle est de tardiuë digestion: mais à cause de sa viscosité elle nuist aux paralytiques & aux podagres . Elle nuist semblablement à ceux qui ont douleur aux entrailles, pierres aux reins, ou en la vessie. La chair de porc sanglier est plus à loüer que celle du porc domestique, s'il est ieune, cōme dessus est dit. La chair du cerf est quasi semblable à la chair du bœuf.

D V H E R I S S O N .

IL y a aucun herisson lequel se tient en terre & autre aux montaignes, sa chair est resolutiue & exsiccatiuë, son visage iacoit ce qu'il n'engendre gueres bonnes humeurs, toutesfois il est de grandes vertus, car il conforte l'estomac, lasche le ventre & donne remede contre la lepre, & contre autres rongnes.

D E L A C H A I R S A L E E .

CHair salée est medicinatiue aux hydropiques & donne remede contre la pierre des reins, son assiduatiō est bon remede pour ceux qui pissent au liēt: en telle maniere qu'apres la continuation de manger chair salée sera difficile d'vriner, iacoit ce qu'aucuns dient qu'elle prouoque l'vrine, elle donne remede cōtre la morsure des vers.

D E C H A C U N M E M B R E D E S

bestes, & premierement de la ceruelle:

MEilleure ceruelle c'est celle des volailles, cōbien que chair du cerueau soit froide & humide & qu'elle engendre humeurs flegmatiques & induist fastidiosité en l'estomach. Si lon mange la chair du cerueau apres la viande elle prepare & incite vomissement. A ceste cause elle doit estre mangée au commencement de la viande fricassée avecques especes aromatiques, c'est à sçauoir bonnes pouldres, ou vinaigre, mente & autres semblables. Et adōc dōne bon & profitable nourriture si elle est bien digerée, elle donne remede à ceux de chaude complexion, elle augmente la matiere de copulatiō charnelle & adoulcist le ventre. Toutes ceruelles sont salubres & vtilles contres tous venins & morsures venimeuses, poséores que d'iceulx lon fust ia attainct quand on les mange: lesquelles louenges & vertus aucuns attribuent à la ceruelle du conuin.

DES TESTES.

LEs testes des bestes sont de grosse nourriture, & preparent le corps à fieures coleriques, Toutesfois elles sont de moult grand nourrissent, & augmentent la matiere de copulation charnelle.

DES YEUX.

LEs yeux filz sont fort tendres & d'vne beste grasse & qu'ilz soient vestuz & enuironnez de gresse ilz sont froids & humides & de moult

bonne nourriture.

DE LA LANGVE.

LA langue engendre humeur humide & quasi temperé entre le mol & le dur. Et si elle est mangée avecques chair glandeuse ioincte avecques elle, dont la salive est causée à cause de sa viscosité & humidité, est bon de la condire & mesler avecques douces especes aromatiques.

DU CŒUR.

LE cœur est froid & chault, à ceste cause il est de melancolique nourriture. Il est tardif à digerer, & nourrist habondamment. Et ne contredit point à ce qui est dessus dict, qu'il est notoire & certain le cœur estre la fontaine de chaleur & le fondement de vie. Certainement autrement sont situez & graduez en la complexion les membres viuans au regard des membres temperez de nostre corps, & autrement iceux memes membres mors à la complexion, au nourrissement ou à la viande temperée. Car le cœur viuant est treschault en la semblance des membres viuans & froict en la semblance des viandes. Comme le lieure lequel en la semblance & genre des bestes viuantes est froid & sec, & toutesfoys les aucteurs dient sa chair estre chaulde & seiche au genre & semblance des viandes. Et certes moult discrepant est, vne chose estre graduée en la comparaison aux choses viuantes

tes à soy mesmes graduée en la comparaison des viandes.

DU POULMON.

POulmon engendre froide humeur & humide, & par ainsi au genre des viandes est de froid & humide complexion. Toutesfois au genre des membres vivans est chault & sec naturellement. Il est de facile & legere digestion à cause & pour raison de sa rarité & legereté. Et est de trespetit nourrissement.

DU FOYE.

LE foye engendre grosses humeurs & est de difficile digestion, car il demeure longuement en l'estomach, & oste & fait cesser la faim par longue interualle de temps, tant que les auteurs dient, que des foyes est faite viande en l'vnique commestion, de laquelle demeure l'homme par aucuns iours sans auoir aucune faim ou appetit de manger. Neantmoins le foye engédre meilleur sang que la chair la quelle n'a point de gresse. Le foye de loup est tresutile & profitable au foye de l'homme: il prohibe aussi & deffend la crainte & abomination de l'eau.

DES MAMMELLES.

LEs mammelles sont froydes & seiches à cause de leur neruosité. Elles engédret gros, bon

R E G I M E

& grand nourrissement. Et sil y a du lait en icelles leur nourriture est encore plus grosse.

D E L A R A T T E.

LA ratte est de tardive digestion, elle engendre sang melencolique, ayant en soy quelque aigreté, à cause que c'est le receptacle des humeurs melancoliques, parquoy elle conforte l'estomac, & prouoque l'appetit, iacoit qu'elle saoulle en peu d'heure. Et est à noter qu'entre toutes les ratte, la ratte du pourceau est la meilleure.

D E S E S L E S.

LEs esles des oyseaux sont moult à louer entre tous autres membres. Car elles engendrent meilleure & plus subtile nourriture à cause de l'exercice & fatigue que prennent les oyseaux en icelles par voller, & entre les esles des vollaylles, les esles des gelines & des oysons sont les meilleures.

D U C O L.

LE col de la geline, & le col de l'oyson sont les meilleurs colz de tous les autres oyseaux. Et est à noter que tous colz sont de bonne, louable & profitable nourriture, mais qu'il ny ait point de sang conglutiné en iceux.

D E S R E I N S.

Les

LEs reins sont de difficile digestion, & de saveur horrible à cause du nourrissement de la gresse de l'vrine de laquelle ilz sont collateurs, & engendrent mauuais humeurs. Entre tous autres les reins du cheureau lequel n'est encores securé de la mammelle de sa mere, sont les meilleurs.

DE V VENTRE.

VEntre est de petit & mauuais nourrissement, & est semblable à la nourriture de trippes, lesquelles engendrēt humeur flegmatique & engressent. Mais les ventres des oyseaux sont les meilleurs, & principalement des gelines, & des oysons.

DE LA POCHE.

LA tunique & peau interieure de l'estomach des gelines & des autres oyseaux quand elle est seiche elle profite à la bouche de l'estomach, & douleur d'iceluy. Et d'icelle les medecins cōposent bon electuaire à celle mesme intention.

DES GENITOIRES.

LEs genitoires, sont meilleures à mager & plus sains quand ilz sont de ieunes bestes, car les rongnons des bestes vieilles ne sont point d'autre ne de meilleure nourriture que les māmelles, excepté les genitoires du coq, qui sont de moult bon copieux & tressouable nourrissement. Et

iaçoit qu'ilz soiēt fort réplis de perſz, ce neant-
moins ilz ſont de facile digeſtiō: ilz ſont de telle
vertu, & efficace qu'ilz donnent remede cōtre la
toux ſeiche, & auſſi à la poictrine en adouciffant
ſon aſpreté. Ilz profitent ſemblablement aux
playes & aux bleſſeures des voyes de l'vrine. Et
combien qu'à cauſe de leur viſcoſité ilz ſont ſo-
lutifz & laxatifz, ce neantmoins ilz reſtraignent
le flux du vêtre. Au regard des piedz aucune cho-
ſe n'eſt determinée ſinon que les piedz de deuant
ſont meilleurs que les piedz de derriere.

DE S. D. A. C. T. E. S.
Chap. xxxvij.

LA dacte eſt chaulde & humide au premier de-
gré, entre autres fruis elle eſt de bonne nour-
riture: combien qu'elle ſoit de difficile digeſtion,
elle engendre bon ſang. Et ſont les dactes diffé-
rentes ſelon les diuerſes regions ou elles croiſſent: car
en chaulde region elles ſont plus douces qu'en
froide, & engendrent les douces oppilations du
foye, & de la rate, elles ſont auſſi pluſtoſt dige-
rées, elles rendēt le ventre lubrique & engendrēt
bon ſang.

D' E. N. D. I. V. E.
Chap. xxxviij.

IL y a aucune endyue ſauuage & amere, & aucu-
ne domeſtique, & a les fueilles crespes. Nous v-
ſons de l'vne & de l'autre aux herbes & aux ſaul-
ces.

ces. L'endyue recente est froide & humide au premier degré. Et de tant plus qu'elle participe d'amaritude tant moins est froide & humide. Toutefois aucuns dyent que l'endyue saulvage est froide au premier degré & humide au second. Iacoit ce qu'elle n'engēdre pas si bon sang que la laictue, toutesfois elle a meilleures vertus: & est la saulvage meilleure que la domestique, car elle ouvre les oppillations du foye & des veines & estinct la mauuaise chaleur. Elle oste la fastidiosité de l'estomach, produict & cause chaleur en le confortant. Et est chose tresbonne à vn chaud estomach. L'endyue mengée ou en emplastre a ceste singuliere vertu entre les autres herbes que tant en matiere chaude que froide elle donne ayde & cōfort au foye, en la chaulde pour raison des chaleurs manifestes, & en la froide pour raison de l'ouuerture des opilations & de sa propriété occulte. Quand on la mange avec vin aygre elle conforte l'estomach, & stiptique le ventre. Semblablement elle pestrie avec sa racine & emplastrée ou son ius beu donne bon remede contre la poincture des scorpions & des mauuais vers venimeux.

DE ERUCA DICTE ROQUETTE.

Chap. xxxix.

ERUCA l'une croist aux jardins, & l'autre est saulvage, elle est chaulde & seiche au premier degré: mais la recente a humidité au premier. Et cōbien qu'elle soit inflatue, toutesfois elle ouvre

les oppilations du foye, quand on la mange seule elle induist douleur en la teste, laquelle douleur est appaisée par la laictue, l'andyue, ou par le pourpie. Oultre, eruca selon diuerses complexions & diuerse quantité produit diuers effectz. Les colleriques & les sanguins se doyuent abstenir d'icelle, filz ne la mangent avec les herbes desusdictes. Elle seulle aguise le sang, oste & refrene luxure en seichant sa matiere, quand elle est mangée en esté elle conforte la digestiue aux froides complexions. Elle prouoque & incite charnelle copulation & augmente sa matiere, principalement quand elle est mangée cuyte.

DE ENULA CAMPANA.

Chap. xl.

ENnula câpana est chaulde & seiche au second degré. Iacoit ce qu'elle contienne aucune humidité superflue en soy. Nous vsons de sa racine, ou en sauce avec son amaritude, ou en tourteaux avec œufz, petites ceruelles & autres semblables. Son ylage est meilleur en hyuer, qu'autre temps. Il conforte le cœur la poictrine & le poulmon. Il mûdifie & nettoye des humeurs superfluz. Enula campana profite aussi à l'estomach replect, elle ouure les opilations du foye, & de la rate. Son ylage superflu diminue sa matiere de copulation charnelle & pourrist le sang. Enula semblablement profite & donne remede aux podagres, ciatiques, & generalemēt à toutes douleurs de cause froide: & à son ius vne singuliere vertu,

car il faict mourir les vers, & les faict sortir du corps.

DE LA FIGVE.

Chap. xli.

LA figue quand elle est vn peu recente, elle est chaulde: declinant à humidité. Et est la figue seiche chaulde, mais elle est seiche au premier degré, & est certainement la figue plus louable & plus nutritiue que tous les autres fruietz. La figue non meure est chaulde, ardente & mauuaise à cause du lait estant encores en icelle, mais celle laquelle est en bonne maturité est prochaine à attrempance, & ne nuist aucunement. Et combien que tous autres fruietz soient nuyfibles, & que l'escorce de la figue soit dure comme vne peau, toutesfois si la figue n'est semblable au nourrissement de chair, neantmoins elle est de plus vehemente & plus louable, & meilleure nourriture que les autres fruietz. Les figues blanches sont meilleures que rouges, & les rouges que les noires. Ce neantmoins toutes figues ont vertu impingatiue, combien que leur impingation soit facilement resoluée. La principale condition de la figue est d'engendrer bone nourriture, si elle trouue bonnes humeurs en l'estomach. Mais si au contraire elle trouue & rencontre mauuaises humeurs & superfluz, principalement celle qui est seiche, elle engendre mauuais sang & penetratif, & conduist avec elle telles humeurs à la superficio-

fité du corps, & aux parties caterreuses. Et pour ceste cause les figues engendrent les poulx. Elles rendent la peau humide, & prouoquent la sueur. Et toute figue autant la verde commela seiche profite & donne remede aux epileptiques, elle adoulcist le poulmon, la poictrine & l'aspreté de la gorge, elle ouure les oppillations du foye & de la ratte, combien qu'elle leur nuyse, & sont deux apostumes sur ceste douleur. Elle prouoque l'vrine en regettant les grosses humeurs de la vessie & des narrines. La figue verde est aucunemét nuyfible à l'estomac, mais la seiche ne nuist aucunement, & est de meilleur & singulier remede, comme d'ouurir les veines de la viande, & proprement auecques la noix & agmandes. Et a aucune vertu solutible & laxatiue proprement auecques l'agmande. Les premiers fruietz de la figue comme les fleurs lesquelles ont superflue & indigerée humidité sont de mauuaise nourriture, mais ilz sont difficile à digerer. Et à cause de ce aduient qu'ilz ne peuuent estre sechez du soleil. Iagoit. ce qu'ilz soiét produictz en la plus chaulde partie de l'an. Et à ceste cause trouue lon par experiéce des auteurs que la figue, la noix & la rue, mangez ensemble au matin deuant autre viande, valent & profitent contre tout venin, & par especial contre l'air infect.

DES CHAMPIGNONS.

Chap. xliij.

DEs chápignons & des ampoules, c'est à sçavoir des faux chápignons, lesquelz croissent cōtre vne piece de bois pourry par force d'humidité, y a grande difference: cōme appert au chap. des faux chápignons. Les chápignons sont froids & humides au quart degré. Iasoit ce qu'aucuns dient que c'est au tiers degré. Ilz sont de difficile digestion, & engendrent grosses humeurs. Lon craint par le mäger d'iceux la crainte des mēbres, la douleur du ventre, l'appoplexie, la difficulté d'vriner, & la presocation & estouffement avec mort. Des champignons aucuns sont qui inferent la mort, & aucuns non. Les champignons lesquelz en leur substance sont vers & azurez, inferent la mort, & ceulx en la peleure desquelz y a humidité visqueux & putrefaction apparente, des champignons aussi fault croire aux experts de la region en laquelle ilz croissent. Toutefois les experts en la cōgnoissance de chápignons sont aucunesfois deceuz, car l'espece d'un champignon peut acquerir venin d'une chose qui ne peut estre congneüe. Et certainement les champignons prennent leur naissance d'une vaporeuse putrefaction, & nompas de la propagation d'une semence ou racine comme les autres vegetatiues. Parquoy leur naissance peult estre produicte de soulfhre ou autre venin. A ceste cause ceulx qui cueillent les champignons doiuent soigneusement attendre & soy garder de cueillir ceux qui ont prins leur naissance & sont creuz aupres de quelque fer enroillé, ou d'un arbre venimeux, ou herbe qui luy puis-

se donner mauuaise qualité comme loyue, iacoit ce qu'aucuns champignons, & mesmement ceux qui croissent au pres de l'oliue, soient bōs. Se gardent aussi que lesdictz chāpignōs ne soiēt creuz aupres des cauernes des serpens, & des vers venimeux, car de telles choses lon a veu aduenir plusieurs mauuais accidens, & sont plusieurs familles mortes, & peries en vne nuict par le manger des champignons. A ceste cause lon doit fuyr la comestion d'iceulx, mais si aucunesfois en aucune sorte ou maniere, la conuoitise d'iceux manger nous deçoieue, & qu'en ce cas il faille que l'entendement obeisse à la sensualité, fault sçauoir & entēdre que les poyres sont tyriacque & remede contre la cōmestion desdictz champignons en la maniere qui s'ensuit. C'est à sçauoir que lon face bouillir les champignons avec les poires ou avecques les fueilles des poires, & que lon iecte la premiere eau, & puis que de rechef ilz soient recuiēt & reboulluz parfaictement & apres cela meslez & assemblez avec du sel, & espices aromatiques chauldes, & que lon boyue avec bon vin, & pur, car il a en telle matiere vertu tyriacalle. Et est bon aussi de māger des poires apres que on les aura mangez, nompas celles qui auront cuyt & boullu avec eulx.

D E S F E B V E S.

Chap. xliij.

FEbues sont foides & seiches, pres d'attrempance. Les febues vertes tendent à humidité, & sont

font pires que les seiches pour ce qu'elles engendrent humidité superflue, & nuysent plus à l'estomach que les seiches: combien que toutes febues soyent de dure digestion. Et à cause de leur ventosité sont inflatiues. Elles font esleuer vapeurs & aggrauent la teste. Elles rendent les espritz gros & lours, & font apparoir mauvais songes de nuict. Les febues escocées sont meilleures que les autres: pour oster la malice & vertu nuisible des febues il les fault longuement laisser bouillir, tant qu'elles soient toutes molles puis les manger avec espices aromatiques & herbes chaudes apres qu'on aura iecté l'eau de leur premiere decoction: & par ce moyen leur ventosité en est ostée. Et donnent bon remede cõtre la toux, & confort à la poictrine en alegeant icelle. Et avec leur escorce & du vin-aygre restraignēt le ventre.

DV FENOIL.

Chapitre xliij.

FENOIL est chaud & sec au secõd degré. Nous vsons de ses fueilles aux herbages & aux saulces. Il engendre bõnes humeurs entre les choux. Il conforte la poictrine, & ouure les voyes des oppillations. Ses racines sont bonnes cuytes avec les pois pour ce qu'elles augmentent la vertu appetitiue. Mais la meilleure partie du fenoil est sa semence & graine: car elle prouoque l'vrine. Elle ouure aussi les oppilations du foye. Le fenoil sauuage rompt la pierre: & l'vsage de tout

fenoil esclarcist & augmēte la veue. Aucuns des aucteurs ont dit qu'au prin-temps les serpens mangeussent les fueilles du fenoil, & en frottent leurs yeux quand ilz sortēt des cauernes, afin que leur veue soit confortée & corroborée pour la debilité qu'elle à acquise à cause qu'ilz ont demouré l'hyuer durant en terre.

DE LA GRAINE

DE PIN.

Chap. xlv.

GRaine de pomme de pin decline peu à chaleur & humidité. Elle engresse & donne confort & ayde à la debilité des nerfz. Elle dōne semblablement confort & remede à la poiſtrine, ou poulmō, & à la debilité de tous les membres, elle incite & prouoque charnelle copulation, & augmente sa matiere, principalement quand elle est mangée avecques du sucre, ce neantmoins elle a vne vertu mordificatiue, & nuist à l'estomach, laquelle vertu est ostée par le lauement & pour la faire amollir en eau chaude. Ceux qui ont chaulde complexion doiuent manger de ceste graine de pomme de pin, avecques du sucre, & du miel, car aussi ce profite moult à l'estomac, & engendre tresbons humeurs.

DE LA GRENADE.

Chap. xlvii.

DE pommes de grenades y a trois especes: c'est à sçavoir douces, moyfies, & aygres: lesquelles toutes selon l'opinion d'Auincenne sont de froide cõplexion, & en parloit comme expert: car il auoit demouré en froyde region, c'est à sçavoir en l'extreme partie d'Arabie vers Septentriõ. Les grenades aigres sont plus froides, & les doulces & moifies moins froides. Et selon l'opinion des autres aucteurs, lesquelz ont prins naissance en chaulde regiõ. Les grenades doulces sont chaudes, car en region froide les grenades ne viennent iamais à si grande douceur qu'elles doiuent estre iugées chaudes. L'vsaige de pomme de grenade est plus medecine que viande. Et appartient plus à medecine qu'à viande. Les grenades ont la vertu des citrons quand on les mange deuant la viande: par ce qu'elles restraignent le ventre & confortent l'estomach, apres la viande. Elles repriment les vapeurs montans au cerueau. Les grains de grenade refraignent chaleur actuelle & chaleur de l'air, & confortent la vertu du cœ̃ur.

DE IUIVBES.

Chap. xlvij.

QVant aux iuiubes, les aucteurs sont discordans: aucuns diēt qu'elles sont chaudes, & aucũs dient qu'elles sont froides, & les autres diēt qu'elles sont seiches, mais elles declinēt à aucune humidité, elles sont de difficile digestion. Elles engēdrēt gros sang & sont de petit nourrissemēt.

Elles diminuēt l'aspreté de la poietrine & du poulmon. Et dit Galien qu'il trouue les iuiubes estre medicinatiues à cōseruer santé, & à oster les maladies.

DE LA LAICTUE.

Chap. xlvij.

ET la laictue est froide & humide au secōd degré, de facile digestiō, & de petit nourissemēt. Combiē que plus nourrissant soit la cuite que la crüe, la nourriture & le sang engendrez & créez d'icelle sont plus à louer que des autres choux. C'est à sçauoir que toute herbe ayant larges fueilles: car toute herbe ayant fueilles larges est appellée chou. La meilleure laictue est celle la quelle est cueillie necte & mangée sans lauer, car par le lauement la bonte de la laictuée est ostée, l'eau aussi en son humidité & frigidité nuist à icelle, & oste la vertu estant sur la fueille, parquoy par le lauement est faicte & rendue aucunement inflatiue. La douce laictue faict dormir & plus profondement quand elle est mangée avec vin-aigre. Elle induist & prouoque l'appetit, & profite à l'estomach chauld. Semblablement à la toux engendrée de chaulde matiere. Toutesfois son vsage excessif obfusque les yeux en induysant debilité en la veuë. Il prouoque l'vrine, & faict perdre l'appetit. Il refrene charnelle copulation, en diminuant sa matiere, & proprement sa graine & semence, laquelle mise avecques le bruuage soit vin ou eau, donne grand & singulier remede à ceux qui ont pollutions nocturnelles

nocturnales en leurs songes.

DES LUPINS.

Chap. xlix.

AV premier degré le Lupin, qui est dit pois amer de Saturne, est chaud, & sec au second degré. Iagoit ce qu'aucuns dient toutes les deux proprieté estre au second. Lupin amer appartient plus à medecine qu'à viade en faisant mourir les vers, & en ouurant les oppilations. Celuy qui est doux par frequente remolition de l'eau est convenable à nourriture, & n'eschauffe aucunement le corps: car par la remolition il pert sa chaleur & amaritude, il est toutesfois de difficile digestion, & engendre mauuaises humeurs & crues.

DES LENTILLES.

Chap. l.

LEntille est froide au premier degré, & seiche au tiers. Iagoit ce qu'aucuns dient qu'elle decline à attrempançe: sa pelleure lasche & rend le ventre flexible, & la moüelle est stiptique & de difficile digestion: elle engendre gros sang melan colique & disposé à lepre, chancres & autres maladies melâcoliques, elle est aussi inflatue & nuisible au cerueau, à l'estomac & à la poictrine à cause de sa seicheté, elle obfusque la veüe & fait aucunesfois voir mauuais songes, elle estaint la chaleur du sang, & excite la matiere de luxure. Pour oster sa vertu nuisible lon doit oster l'escorce puis la mettre bouïllir, & la premiere eau reiectée doit rebouïllir en nouuelle eau: & apres ce doit estre cõfite avec vin-aigre, especes aromati-

ques & amandes. La meilleure & plus industrieuse sorte de l'appareiller est d'y mesler vn peu de farine d'orge avec sa premiere decoction. Et est à noter que telle comestion faict vn nourrissement moult profitable.

DV LAICT.

Chap. li.

LE laict est prochain à attrépance, declinât vn peu à frigidité & humidité: cōbiē qu'aucuns dient qu'il soit chauld, pource qu'il cōmunique à trois substances: c'est asçauoir à la substance du fourmage, du beurre & de l'eau que nous appelons laict clair, duquel n'est pas nostre intention de parler pour l'heure presente, pource que son vsage appartient plus à medecine qu'à viande. Le laict est de noble substance, est de tresbōne nourriture, de facile digestion, & de legere cōuersion en sang, de laquelle chose ne se fault esbahir: car le laict est sang aux mammelles, & prend blancheur & saueur de la nature des mammelles par la decoction qui en est faicte en icelles: ausquelles mammelles prend aussi la nature de viande. ce neantmoins le laict peut participer de bonté & de malice, quād il acquiert diuerse vertu, selon la diuerse nature & cōplexion des bestes desquelles il est traict. Et cōbiē que le laict de la femme soit tresloüable, toutesfois nous vsons de laict de cheure, de vache, & de brebis pour nostre nourriture. Le laict a quasi telle vertu que la beste de laquelle il prouient: Mais pour la meilleure nourriture que nous puissions elire, le laict de cheure est le meilleur & plus profitable: car il conforte
plus

plus l'estomac, & oppille moins le foye. Et est encores meilleur le laiët d'une ieune beste saine & grasse que d'une vieille beste maigre & infecte. Aussi semblablement de tant que les bestes sont pasturées de meilleures pastures, tant plus est le laiët bon & loüable. Le laiët du prin-temps & de esté est meilleur que celuy d'automne & d'hiver. La meilleure maniere, plus apte & plus cõe nable de boire le laiët: C'est de le boire l'estomac ieun avec chaleur actuelle, comme il est traict, & differer la viâde & refection iusques à ce qu'il soit descendu de l'estomach. Et est encores plus apte de boire le laiët coagulé & cailleboté par une espace de temps deuant la refection, car comme ainsi soit que le laiët soit de digestion facile & legere. S'il estoit meslé avecques autre viande il pourriroit ou l'autre viande descendroit avecques luy sans estre digerée. A ceste cause fault soy reposer apres que lon aura beu du laiët, afin que pour sa tendre substance il ne soit corrompu par le mouuement. Le laiët engendre bonne & grande quantité de sang, il augmète le cerueau & la matiere de copulation charnelle, il induist belle couleur, & proprement meslé avecques le succe, il profite moult aux hydropiques, aux ardeurs de l'vrine, à la toux de la poictrine, & au crachement de sang. La propre nature du laiët, est de soy conuertir en telle humeur qu'il trouue dominer en l'estomac: Car certainement s'il y a habondance de chauldes humeurs en l'estomac à cause de sa butyrrosité, laquelle est subiecte à inflammation. Il est enflammé, corrompu & en

fumée conuertie . Parquoy il aggraua la teste & induit anxieté, mais si humeurs frois abondēt en l'estomac, le laiēt à cause de sa castité aigrift, & est cōuertie en humeurs cruz. L'estomac lequel prêt le laiēt doit estre bien disposé & vague de toutes mauuaises humeurs. Doit estre aussi en sa bonne & naturelle complexion: car il fault craindre que le laiēt ne se caillebote & conglutine en l'estomac. A ceste cause les auteurs veulēt qu'avec luy ou apres on mange du sucre ou du miel, lequel fera seureté de luy . Oultre-plus il conuient apres la comestiō ou breuuage de laiēt rincer & la uer la bouche de vin, ou de vin-aigre, d'eau ou de miel, à celle fin que son adherence aux dentz & aux gēciues soit ostée, desquelles l'empeschemēt est prochain. Quād on a mal à la teste se fault garder & abstenir de l'exhibition du laiēt: car il augmente telles passions. Son vsage excessif obfusque la veüe, il engendre la pierre aux corps lesquels y sont disposez, & induist oppilations du foye. Le laiēt pur par soy lasche le ventre, mais le laiēt cuit, auquel le fer chauld ou pierres ardētes ont esté estaintes, est reſtraintif du vētre . Le laiēt finalement est tresbon cōtre les medecines mortelles. Et proprement contre le breuuage de he-leboris, & du vis-argent sublimé, & autres medecines, desquelles les corps humains meurent & perissent.

DES MELONS.

Chap. liij.

LEs melons sont frois & humides au second degré: mais l'humidité domine la frigidité. Ilz sont

Ilz font de meilleure nourriture que les pōpons ou autres fruiçtz de son genre & nature . Le melon doux & meur est d'humeurs plus conuenables, & proprement si on le mange avec sa graine & semēce, le melon & tous fruiçtz de son genre, & de sa semblance est apte de soy cōuertir en tel humeur qu'il trouue dominer en l'estomac . Iacoit ce qu'il soit plus facilement conuertiy à humeurs coleriques. Et quand il n'est point digéré il nuist à l'estomac, & induist vomissement, flux de ventre, douleur du corps, ventositez, tréchoisons, & abomination de la viande: & proprement fil est meslé avec autres viandes. A ceste cause les anciens commandent qu'il soit mangé l'estomac ieun, nettoyé & mundifié des humeurs. Et apres vn peu d'espace s'aucune viande doit estre mangée il nuist aux nerfs en les rendāt humides: il prooque l'vrine propremēt avec sa graine & semence, nettoye & cure les reins de la gravelle & des petites pierres, & semblablement la vessie: à celle fin que la vertu nuisible & empeschement soit osté du melon, les coleriques doyuent manger apres luy oxezacharam: c'est asçauoir vn iugles faict de sucre d'eau, ou de vin-aigre, ou oximel ou vin, ou confict avec zinzembre. Noz aucteurs sont trouuez differens si apres les melons ou les pompons eau doieue estre beuë, & quasi aussi de tous fruiçtz est cōtrouersie. Auicēne toutesfois, lequel estoit le prince des medecins au pays de Sarazinesme, auquel pays selō la loy le vin estoit prohibé & defendu de boire, a dit que lon ne deuoit point boire de vin apres fruiçtz humides, &

principalement apres pompons, car il les faiet penetrer sans digestion iusques au foye, & adonc sont conuertiz en humeurs pourries. Et en ceste raison cy conuiennent quasi tous les auteurs: mais quant à nous qui vsons continuellement de vin, ceste raison cy n'a point de lieu, car certainement nostre coustume a grand force, & est chose tresbonne à la conseruation de santé, pour raison dequoy est dit: que coustume est vne autre nature. Et veritablement sans difficulté il vault mieux ne boire apres les melons que de l'eau: combien que le cōtraire soit selon les Sarafins & ceux qui n'ont point accoustumé de boire vin, sinon peu en vser en medecines: & ne defend pas totalement Auicenne de ne boire vin apres les melons, veu qu'il commande à ceux qui sont humectez par les melons de boire bon vin & pur. A ceste cause s'est suscitè vn commun prouerbe entre nous: que quād nous tastons & goustons de quel que bon vin, nous disons que c'est bon vin pour les pōpons. Isaac aussi en son temps disoit que le vin vieil odoriferāt, deuoit estre beu apres les pelches, afin que leur putrescibilité fust corrigée. les melons tortuz comme cornes, lesquelz nous appellons Sarazins sont en la vertu des citrons.

DE LA MEURE.

Chap. liij.

LA meure est fruiet d'un arbre chauld, quand elle est doulce & en bonne maturité, elle decline à humidité & chaleur, elle est de petite nourriture, elle nuist à l'estomac, & en luy est facilement

cilement corrompue: car elle ne demeure gueres en iceluy: combien qu'elle ne demeure gueres au ventre. A ceste cause doit estre mangée deuant la viande, elle prouoque l'vrine & tient le ventre humide. Quand les meures doulces sont lauées en eau froide, elles sont infrigidatiues, parquoy elles ostent la soif, & estaignent la plus grand chaleur. Les meures d'un hault arbre non estans en bonne maturité sont froides & seiches, elles confortent l'estomac & restraignent le flux du ventre, & appartient plus leur vsage à medecine qu'à viande.

DE LA MEURE DV BUISSON.

Chap. liij.

MEure laquelle croist au buisson que nous appellons ronces, est moult differante à la meure dont dessus est faicte mention. Quand elle est noire & en parfaite maturité elle est chaulde, seiche & de petite nourriture, elle restraint le ventre, & est de dure & difficile digestiō: son vsage appartient plus aux corps robustes qu'aux corps viuans delicatemēt: quand on en mange en grande quantité elles aggrauent la teste, parquoy deuant que les manger est bon de les lauer, comme cy dessus est dit des autres meures.

DE LA MENTE.

Chap. liu.

Lmente de iardin laquelle a odeur aromatique est chaulde au second degré, cōbien qu'il y ayt en elle humidité superflue. De sa propriété elle esioüist le cœur, conforte & eschauffe l'esto-

mac, elle induist l'appetit, elle oste l'abominatiō faicte des humeurs pourries, elle reprime le vomissement de sang ou d'humeurs frois, elle excite & ayde copulation charnelle, à cause de l'inflation qui est en elle, aussi à cause de son humidité superflue. Pour ceste cause les anciens capitaines des exercices, afin qu'ilz eussent leurs gens-darmes plus continés & plus chastes, ilz ne vouloiēt jamais souffrir que lon apportast de la mente en leurs chasteaux, ny souffrir qu'elle fust plantée en leurs iardins, ainsi comme recite Aristote en ses Problematicques. Oultre-plus la mente faict mourir les vers, & de sa propriété donne bon remede contre la morsure de chien enragé.

DE MATIANVM.

Chap. lvi.

MAtianum est de l'espece des pommes, lequel est appellé par aucuns pomme d'ache ou l'ache semblable, il est froit ou sec au second degré: & celuy auquel y a aromaticité & douceur a la propriété de conforter le cœur & de l'eslouyr: sa nourriture est meilleure au gère & comparaison des pommes.

DE LA MARIOLAINE.

Chap. lvij.

LA mariolaïne est chaulde & seiche au tiers de gré, elle ouure les oppilations du cerueau, elle conuient aux douleurs de la teste, & à l'humidité & vétosité d'icelle, sa pouldre meslée avec miel oste l'ordure du sang mort, lequel viēt souz l'œil. Semblablement la mariolaïne verte & recête brisée

lée entre les pierres oste celle meſme ordure, elle purge le chef, elle nettoye le cerueau de ſon ius, & le cõforte: miſe avec vin-aigre ſur la poincture & morſure du ſcorpion donne bon remede.

DV MIEL.

Chap. lviij.

Miel eſt vne roſée occulte laquelle chet de nuit ſur les herbes que les mouches recueillent & puis eſpandent en vn lieu qui leur eſt eſtably à ce faire, & aux regions auſquelles la roſée eſt manifeſte, elle eſt cueillie des hõmes & appellee manne. Le miel eſt chauld & ſec au ſecõd degre, & eſt meilleur celuy qui eſt doux avec bone odeur, & vn peu de poincte ayãt couleur de paille. Le miel du prin-temps eſt meilleur que celuy d'eſté. Et le miel d'eſté eſt meilleur q̃ celuy d'automne. Et eſt à noter que le miel d'hýuer eſt mauuais pour le corps humain. Le miel nettoye toutes les mauuaiſes humeurs, compete & appartient aux froides complexions, & propremẽt aux vieillẽs gens, car il eſt incontinent conuertý en ſang en leurs corps: mais il n'eſt pas conuenable aux complexions chaudes proprement en eſté, car il eſt incontinent muẽ en humeurs coleriques. Le miel cuit eſt meilleur que le cru: car le miel cru engendre ventofitez & inflations, penetre incontinent & nourriſt ſoudain, il profite contre la ſufocation faicte par les champignons venimeux, il prouoque l'vrine, & donne remede contre la toux. Le miel eſt diuerſifié en ſes vertus ſelon la differẽce & diuerſité des fleurs, des herbes, & des fueilles, ſur leſquelles chet la roſée que les mou-

ches recueillent, car certainemēt la rosée acquiert la qualité de l'herbe sur laquelle elle est cheute en la nuit deuant qu'elle soit recueillie des mouches. A ceste cause le miel de la region des bonnes herbes & arbres est meilleur que celuy de la region des mauuaises. Le miel s'il est beu chauffé avec huile rosat, il donne remede souverain contre la morsure des vers venimeux, & la comestion donne remede cōtre la morsure du chien enragé.

D E L A N O I X .

Chap. lix.

IL y a de deux sortes de noix: c'est ascauoir verdes & seiches. La noix seiche est au tiers degré chaulde, & seiche au secōd: & de tant plus qu'elle est vieille & longuemēt gardée, de tant plus elle pert son humidité, & la laisse lon aucunes fois tant vieillir qu'elle pert la nature de viande. Et adonc est de moult difficile digestion, & nuist à l'estomac chauld, car elle est tost conuertie en humeur colerique en faisant adustion & en eleuant fumées, parquoy induist douleur de teste & tenebrosité des yeux. La noix gaste la lāgue, & empesche la parole, à cause de l'exhibition de son humidité, principalement aux masles les langues sont empelchées quand ilz chantent l'office en Karesme, à cause de la greuance & la superfluité des huiles. Les noix nuisent aussi à la peau de la bouche, à la toux chaude, & à la gorge, & toutes fois la noix profite à l'estomach froid, & luy est bon nourrissement, & de bonne digestion. Properment la noix verte confite avec du miel, laquelle

quelle adonc donne bon remede aux reins frois. La noix, la figue & la rue sont treslouables en medecine contre tout venin, & l'usage de telle medecine, principalement en temps de pestilence le matin l'estomach ieun est tresalutaire, vtile & profitable contre le mauuais air, comme aucuns ont experimente. L'empeschement de la seiche-
 té de la noix peut estre osté par la fraction de la peleur de dessus comme p'elle estoit verte: Car adonc sera plus sauoureuse, & ne sera quasi plus nuisible.

DE LA NEFFLE.

Chap. lx.

LA nefle est froide & seiche au premier degre, & appartient plus à medecine qu'à viande, elle a de coustume de conforter l'estomach, elle restrainct vomissement, le flux du ventre, & prouoque l'vrine: toutesfois elle est de petite & grosse nourriture.

DV CRESSON ALNOIS.

Chap. lxi.

LE cresson alnois est vne herbe de laquelle nous vsons en la salade, il est chauld & sec au tiers degre, & est en vertu semblable à cruce: son usage est meilleur en hyuer qu'en este, il est conuenable à la poitrine quand il est mangé en petite quantite, & nettoye le poulmon des humeurs cruz: il induist appetit, combien qu'il face mordificatio à l'estomach, il eschauffe le foye & la rate, il excite & prouoque charnelle copulation, & faict mourir les vers du corps, il donne remede contre la morsure des bestes & vers

R E G I M E

venimeux quand il est beu meslé avec du miel. Aussi la suffumigation reiecte les bestes venimeuses.

D E S O L I V E S.

Chap. lxiij.

NOus ysons des oliues pour nostre nourriture quand elles sont confictes, & acquierent la vertu du fenueil & des autres choses avec lesquelles elles sont meslées, elles sont de difficile digestion & de petite nourriture, elles engèdrēt grosses humeurs & stiptiques, elles ostent l'abomination de l'estomac & incitent l'appetit en confortant l'estomac, & induisant bon odeur à la bouche. Quand les oliues sont mangées apres la viande, elles gardent les fumées de monter en la teste, mais si elles sont mangées au milieu de la refection, elles confortent plus l'appetit. Pour moult exciter & prouoquer l'appetit Galien louë fort les oliues lesquelles ont par espace de tēps trempé en vin-aigre.

D' H V I L E.

Chap. lxiij.

IL y a aucune huile d'olif lequel est fait d'oliues non meures, & est appelée par aucuns omphacinum. Ceste huile est froide & seiche au premier degré, l'autre huile est d'oliues meures lequel auons en vsage, & est quasi attrempé à chaleur & à humidité. Quand l'huile commun est vieil, il est en la vertu des plus chauldes, & pert adonc habilité de confiture: mais si l'huile lequel est appelé omphacinum est vieil, il sera semblable à l'huile commun: & iacoit ce que l'huile omphacinum

phacinum soit plus sauoureux & confortatif, toutesfois l'huile cōmun est absolument meilleur. Toutes les especes d'huile confortent le corps, mais l'huile omphacinum veu qu'il est stiptique & plus sauoureux, il est ayde à l'estomach. Il est aussi à noter que boire au matin l'estomac ieun la quantité d'vne petite fiole d'huile commun faict mourir les vers, & les faict sortir du vētre, & si on a quelque venin dedans le corps, que lon face vomissement par huile & eau chaulde, & adonc la malice du venin sera reprimée.

DE L'ORGE.

Chap. lxiiij.

AV premier degré l'orge est sec & froid, & est sa farine & son pain de moindre nourriture que de fromēt, il est de facile digestion, abstersif & refrigeratif, sa farine a vertu stiptique, il profite à ceux qui ont chaude complexion, & nuist à ceux qui ont douleurs au ventre causées par ventositez: toutesfois sa farine engendre plus parfait sang & donne vtilité & profit à la poiētrine & au cerueau.

DES OEVEZ.

Chap. lxx.

ET les œufz sont quasi de complexion tempérée, & ont vicinité à nature humaine: cōbien que le blanc de l'œuf decline à frigidité, & le moyeul à chaleur. A ceste cause le blanc est au regard du moyeul vn peu dur & tardif à digerer. Les moyeulx des œufz confortent merueilleusement le cœur quand ilz sont d'oyseaux bons & louables, comme de gelines, de faisans, & d'autres

semblables. Les moyeux sont de facile digestion & sont facilement conuertiz en sang, ilz engendrent le sang conforme & semblable au sang duquel le cœur est nourry: c'est asçauoir subtil & clair, & lequel facilement se conuertist vers le cœur. A ceste cause & deuant toute autre nourriture sont plus cōuenables en la dissolution des espritz & restauratiō du sang cordial, ilz donnēt remede à l'aspreté de la poictrine, profitēt à l'ethique, donnēt remede cōtre la pleuresie, cōtre l'estroicture de la poictrine & crachemēt de sang.

Les œufz filz sont cuitz à tout leur coquille en vin-aigre iusques à ce qu'ilz soyēt durs, ilz sont
stiptiques & restraingēt le ventre. Les moyeux
 des œufz cōpetent & appartiennent à l'ardeur de l'vrine, & aux cloux & playes des reins & de la velsie, & proprement filz sont humez cruz. Tous œufz donnent augmentation à charnelle copulation. Oultre plus la comestion des œufz requiert l'estomach estre nettoyé de toutes mauuaisēs humeurs, car pour leur trestendre substance filz trouuent chaulx humeurs, ilz pourrissent & sont conuertiz en matiere pourrie & colerique: mais filz trouuent froides humeurs, ilz aigrissent, comme dessus est dit du lait. Les œufz semblablement prennent diuersité & difference de plusieurs choses en leurs bontez: Car certainement ilz sont meilleurs quand ilz sont des oyseaux dessusdictz, & principalement quand ledictz oyseaux sont lains, gras, en leur iouneſſe, & proprement filz sont nourriz & alimentez de bonnes viandes, comme de mil, froment & au-

tres bõs grains, & qu'il soit veritable nous voyõs les œufz des gelines, lesquelles paiscent les herbes, estre mauuais, & auoir l'odeur & saueur des herbes dont elles prennēt leur pasture. Les œufz des gelines & autres oyseaux, lesquels ne sont foulez ne congneuz des masles, selon l'opinion d'Aristote sont œufz de vent. Et pource qu'ilz ne germent point & qu'ilz n'ont aucune vertu masculine, ilz sont de moindre bonté que les œufz des oyseaux, lesquels sont montez des masles: Car par chaleur naturelle de la semence du masle, les œufz sont de meilleure substance, de plus loüable nourriture & de plus facile digestion. Les œufz de canard, de l'oye, du paon & de l'oustarde sont de mauuaise nourriture, ont mauuaise odeur, & engendrent fastidiosité en l'estomac. Les œufz frais sont meilleurs que les vieulz. Et de tant plus qu'ilz sont gardez, de tant moindre bonté sont. Les œufz aussi de la diuerse maniere de leur preparation & appareil acquierent diuerses bontez & malices. Les œufz ne doiuent gueres cuire, afin qu'ilz soyent tendres & legers à humer. Car ceux qui sont trop cuitz ainsi comme durs, sont de dure & de difficile digestion, & engendrent mauuaises humeurs: Il conuient toutesfois en cinq sortes & manieres les œufz estre diuersifiez en leur preparation & appareil. Ou ilz sont bouilliz, ou ilz sont cuitz en la braise, ou sont fritz, ou apposez en vn tourteau. De toutes les manieres de les cuire, la meilleure est les cuire en la braise avecques la coquille deuant petit feu, ou les faire bouillir en eau:

mais les auteurs louent merueilleusement les œufz pochez en eau chaude, car la chaleur de l'eau despure & nettoye la superfluité des œufz, comme appert par l'escume: & apres qu'ilz sont ainsi pochez, les fault aromatiser de bonnes poudres aromatiques ayans bonnes & loüables vertus. Apres ceux cy les œufz boulliz avec leurs coquilles existent en bonté, car en bouillant ilz cōseruent & gardēt leur humidité naturelle, veu ce que l'humidité de l'eau repugne à l'exsiccation du feu: apres ceux cy sont ceux qui sont cuitz en la braise couuers d'un peu de cēdre deuāt vn peu de feu: les pires sont les œufz fritz, car ilz greuēt l'estomac, & sont incontinent conuertiz & muez en fumositez, pourriture & mauuaises humeurs. Les œufz cuitz aux tourteaux sont moyens entre les fritz & les boulliz. Les mauuais œufz & puās sont à fuir comme venin: Car nous voyons par experience de la seule pourriture & infection d'un œuf, l'air estre de toutes pars ifect. Les œufz de limaçon confortent le cerueau. A cestē cause donnēt confort aux epileptiques, car ilz ont vertu & puissance contre maladie caduque.

DES PESCHES.

Chap. lxvi.

ET les pesches sont froides au secōd degré, & humides au premier: celles qui ne sont pas en bonne maturité, & celles qui sont fendues & seiches sont stiptiques: mais les pesches meures & verdes pourrissent incontinent, & sont cōuerties en humeurs flegmatiques. Leur vſage excessif pre
pare

pare le le corps humain à fiebures quartes. Les pesches meures sont de facile digestion, font le ventre humide, & multiplient l'urine. Mais celles lesquelles ne sont pas meures, & semblablement les seiches ne sont pas de bonne nourriture, sont de dure & difficile digestion, & resserrent le ventre. Celles qui sont en bonne maturité & ont odeur aromatique sont bonnes à l'estomach, & est en icelles vertu inductive de l'appetit. Elles ont vertu espediale contre la puanteur de la bouche, prouenant de l'estomach proprement, si telle puanteur est causée des humeurs coleriques, & de leur propriété rendent bon odeur en la bouche. Les pesches doiuent estre mangées deuant la viande, l'estomach ieun, en buuant apres icelles vin vieil odoriferant, car elles pourriroient si elles estoient mangées apres la viande. Et combien que ainsi soit, toutesfois aucuns des auteurs veulent les pesches estre mangées apres soupper en petite quantité, si premierement lauées en bon vin pur, elles sont ramollies, car en ce cas elles refrigerent les membres superieurs. Proprement quand le soupper a esté de chair rostie.

DES PRUNES.
Chap. lxxvj.

PRunes sont froides au second degré, & humides au tiers. Toutesfois aucuns dient que les prunes douces sont plus prochaines à attemperance. Entre les prunes celles là sont les meilleures lesquelles nous appellons prunes de damas: combien qu'elles soient de petite nourriture.

Les prunes douces nuyſent en humectant l'eſtomac, elles tiennent le ventre laſche & flexible, deſſient & adoulciſſent la collere, & ſont les prunes vertes plus ſolutiues que les ſeiches. Les prunes vertes ſont mauuiſes, nuyſibles & ſans aucune nourriture. A ceſte cauſe ne les doit on manger ſi elles ne ſont meures, car celles qui ſont meures appaiſent l'inflation du cœur, & repriment les humeurs colleriques.

DES POIRES.
Chapitre xlviii.

Plusieurs ſont eſpeces de poires. Aucũs des anciens auteurs dient que les poyres douces & ſauoureuſes, leſquelles ſans aucunes pierres participent d'aromaticité, ſont plus à louer que toute eſpece de poires, cõme generatiues de bõnes humeurs. Et ſont telles poires attirépées & ont vertu d'eſlourir & cõforter le cœur plus que les coings, mais le p^p ſouuēt les poires froides au premier de gré, & ſeiches au ſecõd doiñēt eſtre eſlites cõme bonnes. Car elles cõfortent l'eſtomac, & promettent leur ſemencence. Elles donnent ayde & remede contre la toux, & contre douleurs du ventre. Iacoit que les poires par trop en vſer induiſſent douleur au ventre, mais pour oſter toute malice & vertu nuyſible des poires apres qu'elles ſont cuites les faut manger avec chauldes aromatiques ou avec del'aniz ou de la coriande, & ſelon que la diuerſe eſpece des poyres le requiert. Et ainſi doiuent eſtre mangées poyres cuittes ou crues, leſquelles le plus ſouuēt ſont miagées apres

la viande. Si quelque personne a le flux de vêtre, & que lon ne craigne point que les poyres dures foyent amolyes, ou plus saouzeuses, adonc les fault faire bouillir ou les pendre sur la fumée de l'eau chaude. Les poyres pour & à cause de leur stipticité sont bon seel à l'estomach, en le confortant & augmentant la digestion, & en reprimant le montement des vapeurs. Les poyres & leurs fueilles & proprement celles qui sont sauuaiges, sont tyriacque & bon remede contre la comestion des champignons venimeux, comme dessus est dict, au chapitre des champignons.

DE P O Y R P I E R.

Chap. lxx.

P O U R P I E R est froid au tiers degré & humide au second. Il est de petit nourrissemēt, & non à louer, il restraint le flux & le crachemēt de sâg, ensemble le vomissemēt fait des humeurs chauds. Il estainct l'estrange chaleur de l'estomach, & l'ardeur des reins, de la vessie & de l'vrine. Sô vsaige excessif fait aucunes fois aduenir la maille en l'œil & debilité l'appetit. Combien qu'aucuns dient que de sa ponctité il conforte l'estomac, & les entrailles. Il diminue le desir de charnelle copulation, & la matiere semblablement par sa qualité. Il garantist quand on le masche, & oste l'agacement des dentz, que lon a acquis par la comestion des choses aigres.

DE P E R S I L.

Chap. lxx.

LE persil, qui est l'une des especes d'ache, est chauld & sec au second degré. Iacoit ce qu'aucuns dient que c'est au tiers. Il prouoque l'vrine en mondifiant les reins & la vessie, & appaisant leur douleur. Il oste semblablement les ventosités & inflatiōs du ventre. Et ouure les oppilatiōs de tout le corps.

DES POMMES.

Chap. lxxi.

POMMES sont de diuerses especes, c'est à sçauoir douces, meures, & aygres: lesquelles toutes sont de froide, & humide complexion: mais les pommes douces sont plus prochaines d'atrempance. Et les pommes aygres sont continues à seicheté. La comesttion de telles pommes prouoque douleurs aux nerfs, prepare le corps à fieures continues: & engēdre humeurs putrescibles: proprement la comesttion des pommes non meures: mais les pommes douces: sauoureuses & aromatiques cōferent à l'ardeur & debilité de l'estomach. Elles prohibent le vomissement, induisent appetit. Et si elles sont dures & non en parfaicte maturité, elles ont indigence de decoction. Et principalement si telle espece de pommes le requiert. La meilleure mode & maniere de faire cuire pommes, est de les faire cuire sur les charbons, les pepins ostez, & puis apres les emplir de sucre, ou de miel: selon la complexion de ceux qui les veulent manger.

Si les pommes sont grosses, il les fault fendre en deux parties. Et de la poincte d'un couteau

seau y faire vne fente tout a l'entour entre la pe-
 leure & la pulpe : & puis en oster les pepins &
 emplyr le creux de la pomme de tresbon sucre.
 Et puis apres avecques ce les faire cuyre sur les
 charbons: tournant le costé vers le feu . Car cer-
 tainement de telle decoction les pommes sont
 plus digestibles, plus sauoureuses , & plus saines
 au corps humain, car adonc estaignent la soif, re-
 priment l'ardeur de la colere, & confortent l'esto-
 mach. Elles peuuent estre mangées apres la vian-
 de: & proprement avec anis confit, & coriande.

DE LA PASTENADE.

Chap. lxxij.

PASTENADE selon l'opinion des Arabes, est de
 deux especes: c'est à sçauoir blanche, sauuage
 ou chāpestre. Et aussi la pastenade rouge, de iar-
 din. Toutes deux sont de difficile digestion, de
 petit & gros nourrissemēt, soient mangées cuyt-
 tes, ou crues en saulce ou aux herbages. La paste-
 nade donne remede contre la toux, pleuresie, &
 ydropisie. Elle incite charnelle copulation, &
 proprement la semence. Toutesfois elle doit e-
 stre deux fois boullue & la premiere & seconde
 decoction gettée doit estre de rechef cuite &
 boullue avec lectues, & conficte avec coriande,
 vin-aigre, poyure, oygnōs & autres semblables,
 car celle qui est ainsi conficte est de plus facile
 digestion, & profite cōtre la froidure des nerfz,
 douleur du dos & des reins. Et excite plus char-
 nelle copulation. Toute pastenade est chaulde

au second degré, & humide au premier. Ceulx qui cueillent les pastenades doyuent soygneusement & affectueusement regarder qu'ilz ne cueillent au lieu d'icelle, vne espece & maniere de sicue laquelle ressemble moult fort aux pastenades. Car la sicue induist mauuais & quasi venimeux effectz. Et dit maistre Benoist de Mursia, qu'il a veu par telle erreur & accidēt aucūs deuenir folz, insensez, & faire tousiours folies iusques à ce que les accidēs de lad icte sicue eussent esté appaisez.

D E S P O I S S O N S .

Chap. lxxiiij.

NOus auons de plusieurs especes de poissons, De la nature desquelz & de leur appareil fault croire ceulx qui demeurent aux regions ou ilz croissent vniuersellement, toutesfois ilz sont froids & humides. Combien que les grands poissons participent moins d'humidité, & frigidité avec les petitz. Mais les poissons salez sont chauds & secz. Et de tant plus qu'ilz sont salez & demeurent en vieille saulmeure, tant plus habondent de secheté & chaleur. A ceste cause fault manger des poissons salez en petite quantité, lesquelz soient preparez & appareillez en beurre ou autres choses grasses selon les diuerses especes des poissons, lesquelles sont quasi infinies & à nous incongneues. A ceste cause cy apres sera faicte mention de ceux dont nous auōs meilleure notice & meilleure congnoissance. Et desquelz est cōmun vsage en Italie, pour le manger.

Galien dit que le meilleur sang, moyen entre
les

les gros pur, subtil & aquatique, est engendré du pain bien fait & préparé, & des bestes volatiles comme sont perdrix & autres semblables : & le plus prochain de ce sang, c'est le sang engendré de grans poissons comme les peres. Les poissons sains engendrent aux corps humains sang moyen entre le subtil & le gros, & est leur aliement bien digestible. Mais généralement de tous les poissons ceux là sont les meilleurs, lesquels ne sont pas trop grans & n'ont pas trop dure chair, n'aucune superfluité. Lesquelz aussi n'abondent point de grandeur abhominable, ausquelz aussi n'a point de senteur de fange n'autre mauuaise saueur. Et desquelz la chair se pourrist incontinent qu'ilz sont tyres de l'eau. Des poissons ayans dure chair le moindre & plus petit doit estre esleu & choisi pour nostre viande. Au contraire doit estre esleu le plus grand de ceux qui ont la chair dure. Iacoit ce qu'aucuns des aucteurs dient que les poissons lesquels sont de moyenne quantité & grandeur sont meilleurs en leur espèce. Les poissons qui sont plus louez des aucteurs pour le nourrissement du corps humain sont les poissons de mer demourans en lieux pierreux plus conformes selon l'opinion des anciens à complexion humaine, lesquels engendrent sang attrempé, non point trouble ne gros, mais plus prochain au sang aquatique, subtil & resolvable des membres pour sa velocity : comme le sang qui est engendré de temperée & subtile nourriture. A ceste cause ne sōt pas cōuenables à ceux qui traouillēt

& labour fort, lesquelz ont besoing de dure vian de . Mais conferent & conuiennent à ceux qui viuent oyssiement & selon le regime de santé, & proprement à ceux qui sont sains, vieilz, & debiles.

ET apres ces poissons cy, les poissons des roches & vagues de la mer sont les meilleurs. Car ilz ont eau moult fort bonne & claire: Mais ilz sont beaucoup plus durs, & aussi plus gras. Et avec ce sont beaucoup de plus grosse nourriture que ne sont les autres.

A Pres ceux cy sont les poissons lesquelz se tiennent & font leur residence & demourance aux riuages des eues pierreuses & sablonneuses. Parquoy les dessusdictes especes de poissons sont meilleures & de meilleur nourrissement que les poissons d'eau douce, car la saleure principalement de grand eau en lieux pierreux & sablonneux oste des poissons les viscositez, & humiditez. A ceste cause telle maniere de poissons sont meilleurs, & avec ce sont plus sauoureux.

A Pres ceux cy sont meilleurs poissons de fleues courans, & pierreux, desquelz l'eau est fresche & claire. Et qui plus est, selon l'opinion de plusieurs, telz poissons ont le renom d'estre meilleurs que toute autre sorte de poisson. Car entre tous ces poissons cy, nous trouuons les lamproyes, truites, & carlets, lesquelz sont louables sur tous autres poissons.

ET apres ceux cy, sont les poissons des fleues, qui n'ont pas eau fresche, ne fort courante, lesquelz filz ont leur cours aupres des citez, & des villes,

villes ilz engendrent mauuais poissons & putrescibles, car des immundices desdictes citez l'eau est rendue puante & infecte. Principalement si elle passe par dedans icelles villes. Et si elle est meslée avec l'eau, en laquelle le lin est macéré, & autres choses semblables.

CEux cy sont les poissons des fossez, & estâgs, desquelz sortent fleuves de bonne eau ou ilz entrent, car telz poissons ressemblent quasi aux poissons des fleuves.

IL y a aussi des poissons faisant leur residence aux riuages, ausquelz y a eau boueuse, trouble & meslée avec immôdices terrestres. Et les pites poissons sont les poissons des caues des fosses boueuses & fangeuses, desquelles ne sort ne n'entre en icelles aucunes eaues manifestemēt ou oculatement. Mais les poissons de mer qui mōtent aux doulces caues, ou les poissons d'eau doulce qui entrent en la mer, sont moyens entre les poissons d'eau douce & de mer. Aussi les poissons sales sont de difficile digestiō, faisant lōgue demeure en l'estomac, & sont de moult petit nourrissemēt, non louable. Ilz induisent soif & engendrēt sang froid. Ilz amolissent les nerfz, & produysent diuerfes viscositez au corps, desquelles prouiennent diuerfes maladies. Les poissons recens & froyds, cōbien qu'ilz soyent de dure digestion, toutesfois ilz rendent le corps humide, ilz rendent copulation charnelle & sa matiere. De plusieurs poissons les laictances & œufz laschent le ventre, & induisent vomissemēs: car ilz retiēnent quelque espee de vêtosité. A ceste cause se fault

adstenir de la comeſtion d'iceulx.

IL est conuenable de ſoy abſtenir de māger des poifſons, leſquelz apres leur decoctiō ſont gardez frois par l'eſpace d'un iour, car aucunes fois prennent qualit  de venin. Et induiſent par leur comeſtion, ce qui a accouſtum  de aduenir par la comeſtion des champignons venimeux. Les poifſons froids doyuent eſtre roſtiz, ou boulluz ſelon que leur diuerſit  le requiert, il eſt bon toutesfois de mettre du vin-aygre parmy eſpices aromatiques,   celle fin que leur viſcoſit  ſoit brul e & reſiſt ce ſoit fai te   l'ab d te frigidit . Et eſt   noter que tous les brouetz & chaudaux des poifſons prins  n ſorte de bruuage donnent ſouuerain remede c tre les venins. Et ſi lon fait frequens vomifſemens par leſdictz brouetz & chaudaux, ilz profitent contre la morſure du ſerpent cornu, du ſerpent enrag .

DE LA CARPE.

CARPE eſt l'un des plus louables poifſ s d'eau d'ouce, elle eſt de b  nourriſſem t & de facile digeſtion ayant peu de ſuperfluitez, leſquelles ſont incorruptibles. Et c'eſt ſigne qu'elle dure longuement cuitte & ne pourriſt point.

DE LA TRUYTE.

LA truyte eſt moult ſ blable   la carpe en forme & nourriture, car elle eſt prinſe en fleuves pierreux & hautes montaignes. Et c me la carpe pluſieurs fois recuitte dure longuement deuant qu'elle ſoit pourrie, de la truyte ent doit Galien, quand

quand il disoit qu'il y auoit poissons beaucoup meilleurs que les poissons du Tybre fleuve, lesquelz poissons sont prins aux fleuves descendans des montaignes faisans estangs par viues fontaines, toutesfois la truite a ceste singularité en elle, que quand elle descend de ces viues pierreuses fontaines aux grans fleuves, estangs & fosses, elle est si facile à muer qu'elle perd sa bonté & saueur, & acquiert ie ne sçay quelle gresse gluante & abhominable par l'oyssiueté ou grosseur de leau.

DU BROCHET.

Brochet est vn poisson cruel & deuorât, & est le roy des poissons d'eau douce, comme le Dauphin en la mer. C'est l'vn des bons poissons qui soit entre tous autres, de bonne louable & seche nourriture, sans aucune superfluité, quand il est prins en viues fontaines, & fleuves courans, mais aux estangs & grosses eaues il perd sa bonté de la gresse qu'il acquiert par oyssiueté comme dessus est dit de la truite. Les poissons treslegiers & de grand exercice font de telle bonté. De la truite a esté expérimenté comment elle monte par les rayes des eaues descendans des roches par grande impetuosité.

DE LA PERCHE.

La perche est de bonne nourriture, de bonne saueur, de facile digestion, & a peu de superfluitez.

DU SALMON.

Saulmon est vn poisson lequel se tient aux fleu-
 ues d'Allemaigne. Il est de bon nourrissement
 & bonne saueur, & quand il est par trop grand, il
 default aucunement de la bonté de son nourrisse-
 ment de sa saueur. Le saulmō rosty ressemble plus
 en saueur à la chair, qu'il ne fait aux poissons. Il
 meurt incontinent qu'il est hors de l'eau, cōbien
 que son cœur vit plus longuement que nul des
 autres poissons.

DE L'ANGUILLE.

LAnguille a grand conformité avec les cham-
 pignons en saueur, en visqueuse humidité, &
 malice de nourriture. Et de ce ne se fault esner-
 ueiller, car l'anguille au genre des poissons est
 engendrée par putrefaction, comme le champi-
 gnon au genre des choses vegetatiues est engen-
 dré de putrefaction, sans semence ne propagatiō
 de racines. A ceste cause quand vient à manger
 l'anguille, fault mettre & assembler avecques el-
 le espices aromatiques qui puissent corriger son
 humidité.

DES GRENOILLES.

Grenouilles sont de plusieurs especes. Celles
 lesquelles se tiēent en terre ou entre les pier-
 res aux herbes & les vertes semblablement sont
 mauuaises & venimeuses. Mais les grenouilles les-
 quelles se tiēēt aux fontaines & aux bōnes eues
 sont bonnes à manger & sont au commun vsaige
 des viandes, c'est à sçauoir les parties posterieures
 des reins d'icelles, lesquelles ne sont de mauuaise
 nourriture. Aucuns des aucteurs ont fort loué

les grenoilles pour l'vtilité & guarison des laders, disans que plusieurs ont esté deliurez & garris de lepre non confermée n'enracinée par la comestion des grenoilles, laquelle chose n'est pas loing des termes de raison, pour la cōformité que elles ont avec les serpens, car certainemēt la chair des serps est fort approuvée pour la guarison de ladrerie. Et dit maistre Benoist de Mursia, qu'il a ce experimenté en merueilleuse experience par les viperes & serps. Les grenoilles lesquelles excèdent grandeur sont moult à escheuer: car elles participent de la nature des crapaulx, & cōcubinent aucunes fois avec les crapaulx.

DES LAMPROYES.

ET les lamproyes sont de deux especes. Les vnes sont petites, viuans en la fange & limon de bōnes eaves, & sont de bōne saueur, & de louable nourriture, & n'excèdent point la grandeur de la main en figure, cōme vers de terre, les autres sont grādes aucunes fois au poix de plusieurs liu. com me grandes anguilles. Elles sont de tresbonne & tressouée nourriture, & de saueur desirée sans superfluité aucune. Combien qu'elles soient nourries par le succement des saueurs de la terre estās soubz les eaves. Et ne treuve lon rien corpulent en leur estomac. Les lamproyes excèdent certainement tous autres poissons en chair, prins à cause de la noblesse de leur nourriture.

DES CANCRES.

Cancres font de plusieurs especes. Aucuns sont de mer, & les autres d'eau douce. Les aucuns sont rons, & les autres ont grand queue. Les cancrs rons des fleuves sont de bonne nourriture, & engressissent principalement filz sont boulluz en eau, ou en lait d'orge, auquel auront par aucune espace reposé & trempé. A ceste cause sont donnez aux gens maigres, consommez & malades des fieures & ethiques, pour louable nourriture. Les cancrs ayans queue sont semblables aux cācres rons en nourriture, filz sont prins en viues fontaines & bonnes caues. Ilz sont ce nonobstant de difficile digestion. Et filz sont nettoyez du puāt boyau, lequel descent par la moytié de la queue, ilz sont plus louables & meilleurs.

DES GAMBRES DE MER.

Gambres de mer font de difficile digestiō, nuisent à l'estomac, & pour cause qu'ilz sont salez, laschent & redent le vêtre lubrique. Les gambres de mer, lesquelz autrement sont appelez langoustes, sont de difficile digestiō. Mais filz sont bien digerez, ilz sont de bonne & louable nourriture. La cendre de tous cancrs & principalement des cancrs rons habitans en fleuves, est solennelle & singuliere medecine cōtre la morsure du chien enragé. De laquelle chose maistre Benoist de Murfia dit auoir veu merueilleuses experiences. Et selon l'opinion de Galien, nul ne mourut oncques qui ait vsé de telle poudre deuant l'abomination des caues.

DE LA TREILLE,

poisson de mer.

LA treille est vn poisson de mer,excedant tous autres en boné, faueur, & nourriture, mais elle est vn peu de difficile digestion, pour cause qu'elle a dure chair,laquelle n'a aucune viscosité.Et dōne tresapte nourriture au corps humain. Galian escript les Legatz de Rome auoir esté autresfois esmerueillez du tressauoureux foye de la treille, & que tant les aimoyent qu'ilz baillerent grandes sommes de deniers pour les treilles, afin d'en auoir les foyes d'icelles.

DES PIGNES DE MER.

LEs pignes de mer sont d'assez facile & legiere digestion. Ilz sont de bonne & louable nourriture, & tresprofitable au corps humain.

DES HUISTRES.

ILy a plusieurs especes d'huystrs,mais les huystrs desquelles nous vsons communemēt, sont de tresbonne nourriture, & sont fort louées des aucteurs, pour ce que elles confortent merueilleusement l'estomac. Elles engressent, elles sont restauratiues & donnent augmentation à charnel-le copulatiue.

DE CEPHALVS,

poisson de mer.

Cephalus est vn poisson, lequel croist dedás la mer. Et aussi en eau douce. Et ne descēd pas souvent des eaux douces en la mer, mais descēd volō tiers de la mer es eaux douces. Et est tel poisson

entre tous autres poissōs le meilleur. Celuy toutes fois qui est prins aux estangs & mauuaises eues, il est de mauuaise & non louable nourriture. Cephalus a aucuns poissōs à luy semblables, & cōbien qu'ilz ne soyent pas d'une mesme espece, neātmoins on en doit auoir semblable iugemēt.

DE L'ESTEUF POISSON

de mer.

ESteuf est vn poisson de mer, lequel est souuent fois trāsporté en Italie, pour ce qu'il croist pres d'iceluy pays. Il est du genre des poissōs lesquelz n'ont aucunes escailles, & qui n'ont pas la coquille dure, mais il a dure peau, & dure longuemēt (cōme vne chose sallée) deuāt q̄ le cuire. Et pour le rōpre le fault frapper de mailletz de bois. En apres se doit couper par morceaux, & boillir & puis mettre avec luy espicēs aromaticques, & adonc faict viande tressauoureuse & de louable nourriture. Et pour ce qu'aucunes fois aux feries en lieu de poisson, nous vsōs de lymaces, autremēt dictes coquilles de mer, à ceste cause en fera faicte aucune mention en ce present chapitre.

DES LIMACES.

LEs limaces autremēt dictes coquilles de mer, combien qu'elles ayent la chair difficilement digestible, toutes fois elles sont digerées, elles sōt de bon, louable & restauratif nourrissement. Et conferent à la poitrine & au poulmon, & proprement confortēt le foye, & ouure les oppiliatiōs. Elles profitent pareillement aux ethiques & consommez, pour ce qu'elles engendrent visqueuse

quense nourriture, laquelle n'est pas si tost consommée ne reiectée par la chaleur des ethiques. La meilleure mode & maniere de preparer les limaces est de les mettre à tout la coquille dedans vn chauderon quasi plein d'eau bouillante, auquel soyent iusques à ce qu'elles recommencent à bouillir. En apres leurs testes & poictres qu'elles portēt dehors leurs coquilles quand elles cheminent, soyent sequestrées de leursdictes coquilles & puis les enuveloper en cendre: & apres qu'elles auront là esté par aucune espace de temps, afin que les cendres boiēt leur viscosité, les fault froter des mains, & finalement les lauer en trois ou quatre paires d'eaux chaudes, à celle fin qu'elles soyent totalement nettoyyées des cendres, & mucofité. Apres cela les fault froter avec du sel, eau chaude & vin-aigre, & finalement les lauer en eau froide deux ou trois fois, à celle fin qu'elles soyent blanches & claires, & qu'elles demeurent nettoyyées de toutes viscositez: adonc peuuent estre boullues, rosties ou frites, ou preparées en petitiz vaisseaux confictes & assemblées avecq' diuerses espices aromatiques, & diuerses saueurs, selon la diuersité de l'artifice de les cuire.

DES LIMACONS.

LEs limaçons sont de diuerses sortes, & de diuerses natures, les aucuns sont de mer, les autres d'eau douce, & les autres champestres. Des limaçons de mer aucuns sont grands, & les autres petitiz. De la table & coquille des grands lon fait aucunes fois des boucliers, & viennent aussi aucunes fois à si excellente grandeur (ainsi cōme le re-

cite Albert) que lon fait de leur coquille vne nasse
 selle seruant aux grandes nauires, & en faict-on
 semblablement vn gouuernail: mais tous les lima-
 cons de mer ne valent rien pour viande & nour-
 riture. Les limaçons ayans longue queue avec co-
 quille noire ne sont pas aussi idoines à manger,
 cōbien qu'aucuns pauvres les mangent comme
 inepte & abhominable viande. Les limaçons chā-
 pestres lesquels viuent aux prez & forestz, sont
 de bonne & loiable nourriture, & est la viande
 des nobles personages & gentilz-hommes, les-
 quelz chassent plus asprement & ioyeusement
 apres ces limaçons cy avec chiens bien doctes &
 instruitz en ceste matiere selon la mode d'Italie,
 qu'ilz ne font apres les cailles & perdrix. Ces li-
 maçons doiuent estre boulluz, & d'iceux fault
 oster les piedz, les iambes, la teste & tout le col.
 Et est à noter que les œufz de ces limaçons sont
 singuliere medecine & viande contre epilencie:
 Sont aussi semblablement tresbons pour les ethi-
 ques & consommez, car ilz engressent & sont re-
 stauratifz.

DU PAIN.

Chap. lxxiiiij.

PAin peut estre faict & construit de plusieurs
 choses, selō la diuersité des diuerses regiōs, re-
 tenant en soy telle nature comme la chose dont
 il est faict & construit: mais pource que le fro-
 ment retient principaulté en autres choses, il est
 plus conforme à nature humaine: & qui plus est
 le pain qui de luy est faict, est meilleur & plus
 louable

loüable que tous les autres, Car le sang qui est de luy engendré est plus attrempé que celuy qui est engendré. & procrée de tous autres grains. Et combien que le froment soit de chaude complexion au commencement du premier degré, & obtienne attrempance entre humidité & siccité: toutesfois le pain est plus chaud, pource qu'il acquiert plus grand' chaleur par le four. Le froment duquel lon veult faire bõ pain doit estre recueilly en bonne region & de meilleure espeece, doit estre aussi pesant & meur. Son escorce exterieure rousse tirant sur le iaune, ayât les parties interieures tresblanches & grosses, & ne fault pas que le dit froment soit vieil, car il seroit de plus seiche & mauuaise nourriture: au cõtraire ne doit pas estre trop fraiz cueilly, car il engendreroit visqueuse & flegmatique nourriture, & induiroit oppilations du foye & de tout le corps. Doit estre donc nettoyé & purifié de toute pouldre & de toutes sortes de mauuais grains. Le froment lequel peut estre gardé en greniers cuëtez & bié aërez est plus louable & meilleur que celuy qui est gardé souz terre en des fosses: car ses vapeurs sont euëtes & est conserué en sa disposition naturelle: mais aux fosses en terre les vapeurs du froment meslées avec exhalatiõs terreuses & suffoquées par l'obturation des fosses, donnent mauuaise disposition au froment, veu qu'elles ont en soy qualitez contraires à la vie. A ceste cause plusieurs sont mors & periz par l'ouuerture des fosses ausquelles le froment auoit longuement reposé.

De tel froment donc ainsi eleu soit fait pain

net & purifié. Et est bon de saler vn peu l'eau de laquelle il est pestry, car le sel oste la viscosité du pain. La paste doit estre bien fort pestrie, tournée & auecq' les mains assemblée: car par cela le pain est rendu plus sauoureux, plus leger, & aussi plus cōforme à nature humaine. Soit aussi le pain bié fermenté & non trop dur: car par cela il est faict plus leger, plus digestible, plus productif, & de plus loüable sang, & se cuist plus artificiellemēt, & plus proportionablement.

Après que le pain est cuit & tiré hors du four, il doit reposer à tout le moins par l'espace & distance d'vn iour deuant que d'estre mangé, pource q' le pain chaud est mauuais, attractif de mauuais air, & est peu conforme à nature humaine.

LE pain cuit en la palette, le pain sec, & le pain deux fois cuit, toutes ces especes de pain sont de dure digestion, causantes douleurs au ventre, & oppilations du foye: elles engendrent pierres aux reins, ce que faict semblablement vieil pain. Le pain faict de bled laué & seiché au soleil, & apres qu'il est moulu, mis en œuure à tout le son, est meilleur que celuy qui est faict de farine pure. Le pain de son est plustost digeré, & nourrist plus legeremēt que l'autre: mais il est de pire nourriture & plus petite. Le pain mal cuit ne compete sinon à ceux qui sont de complexion robuste, & qui continuellement labourent. Oultre plus le pain deuant qu'il soit mangé doit estre chappelé pource que telle partie exterieure est trop bruslée & de difficile digestion, & generatiue de mauuais humeurs. Le pain aussi doit auoir maniere entre

tre grandeur & petiteur: car le petit pain est incōtinēt percé de la chaleur du four, & est quasi tout cōuertý en crouste, & ne demoure qu'vn peu de moiuelle: & certes la crouste à cause de sa trop vehemente brusleure & desiccation est la pire partie du pain. Le pain aussi lequel est trop grand & moins cuit aux parties interieures, par necessité demeure visqueux & pâteux. Il vault doncq' mieux retenir la moyenne forme & maniere de cuire: ou selon la maniere de cuire les tourteaux à Naples, laquelle est fort louable, veu qu'vniformemēt la chaleur du four attein à toutes les parties du tourteau. Le preparatif qui est fait de pain laué est conuenable pour refroidir ceux qui sont eschauffez, & n'engēdre aucune greuance ne opilations, & la meilleure sorte de le lauer est, que la presure & leuain trēpe vne nuict en eau chaulde, & puis apres aucunes fois soit laué en eau froide. Et par ce moyen la chaleur, la viscosité & siccité serōt ostées du pain. Le mil est tresbon à faire pain: car de soy il est totalement cōforme à nature humaine en toutes choses: & de luy ou de sa farine quand il est emundé, sont faictz tresbons preparatifz, lesquelz engendrēt tresbons & louables nourrissemens, si on les faict cuire avec du lait ou bonne gresse.

DE RIZ.

Chap. lxxv.

RIZ est chauld & sec plus que le froment, & plus prochain à attrempance, il est de grand nourrissemēt, declinant à siccité: mais s'il est cuit, avec huile d'amādes, & sucre, & apres mis en eau,

de son, il est adoncq' de meilleure & plus grande nourriture, il augmente la matiere de copulation charnelle, & engresse le corps: mais s'il est cuit en eau pure il restrainct le ventre, son vſage excessif nuist à ceux qui ont de coustume auoir douleur au ventre.

DE ROBILIVM. Chap. lxxvi.

RObilium est vne espece de graine que lon appelle vulgairement petitiz pois, il est froid au commencement, & porte attrempance en froidure & seicheté, il est de petit nourrissemēt, il engendre mauuais sang, & donne empeschement aux nerfz, & n'induit pas si grande visquosité que la feue: mais quand il est emundé il engendre meilleure & plus profitable nourriture, son broüet donne remede contre la toux, & douleurs poignans en la poictrine.

DE LA RAUE. Chap. lxxvij.

LA raue est chaulde au ſecond degré, & humide au p̄mier degré, elle est de facile digestion: & entre les autres herbes & racines elle est de grā de nourriture: combien qu'elle engendre chair molle & flegmatique, à cause de sa v̄tosité & inflation. A ceste cause elle augmente charnelle copulation & sa matiere, elle engresse le corps, & proprement quand elle est cuite au feu, si la premiere decoction iectée elle est recuite en la ſeconde eau elle acquiert attrempance de sa substance, & mediocrement engendre nourrissement entre le bon & mauuais: & si la premiere & ſeconde decoction iectée est tiercement boullue conioincte & assēblée avec especes aromatiques & avec tref-
grasse

grasse chair elle en est meilleure, & est sa vétofité ostée. Les raues non parfaictement cuites engendrent ventositez & oppilatiós du corps. La raue faict vriner, estainct la soif, & profite cõtre la douleur de l'vrine.

DE LA RUE.

Chap. lxxviij.

LEs auteurs dient que la rue est meilleure & plus naturelle quád elle croist cõtre le figuier. La rue verde est chaude & seiche au secõd : mais celle qui est seiche a ses qualitez au tiers degré. Son vsage propremēt est es faulces, elle conforte la rate, l'estomac, le ventre, & deslie & oste leurs ventositez, elle ayde à la digestion, & induist appetit, elle cõferme à l'estroicture de la poitrine ague & esclaircist la veuë, elle donne remede cõtre paralytie & frigidité des nerfz, elle garde de sentir & odorier les aulx & oignõs quád on les a mangez, elle faict mourir les vers du corps, elle oste les desirs de charnelle copulation en seichāt sa matiere. Son ius quand il est beu cõtre tous venins, & comme dessus est dit, quand elle est mangée avec la noix, elle donne remede preseruatif de tout mauuais air, venin & pestilence. Ce neantmoins manger grande quantité de rue, est grand mal & chose perilleuse. Et fault garder ententiuement qu'avec la rue ne soyēt mangez petitz vers de couleur verde, lesquelz elle a de coustume produire au prin-temps en ses fueilles, & sont difficilement cogneuz, à cause qu'ilz sont de la couleur des fueilles : car ilz sont mauuais, & produisent venimeux & pernicious effectz.

D V R O S M A R I N .

Chap. lxxix.

ROsmarin est vne espece de mariolaine, pour & à cause de l'odeur qu'il a semblable à mariolaine & à l'encens blanc. son vsage est aux faulces: & pour l'odeur de la chair rostie, sa fleur entre aux confections cordiales, car elle esiouist le cœur, elle ouure les oppilations du foye & de la rate, elle resoluë les ventositez des entrailles, & conforte le cerueau s'il est debilité par froidure.

D E S E S P I N A R S .

Chap. lxxx.

ESpinars sont frois & humides au premier degré: combien qu'aucuns dient qu'ilz declinēt à attrempance, ilz ont vertu laxatiue, absterciue & resectiue, ilz sont conuenables à la gorge, au poulmon, au foye & à l'estomach, ilz sont aussi de bōne nourriture & meilleure que les treffles, & proprement profite aux colleres & sanguins.

D V C R E S S O N .

Chap. lxxxi.

LE senegon autrement dit cresson, duquel communement vsons aux salades & es herbages, croist en eaux crues & dormantes, il a chaulde & seiche vertu, & faict bien vriner, il purge les reins & la vésie de grauelle, & rompt la pierre s'il y a.

D E S P A R A G V S .

Chap. lxxxij.

SParagus est chauld & humide au premier degré, iagoit ce qu'aucuns diēt qu'il soit prochain à attrempance. Entre les autres herbes il est quasi le plus

le plus nourrissant, il augmente la matiere de copulation charnelle, il lasche le ventre & mitige ses douleurs, il eschauffe les reins & les purge de la grauelle, & semblablement la vessie en prouoquant l'vrine, il ouure les oppilations du foye & de la rate, il n'est pas toutesfois fort conuenable à l'estomach, & induist aucunesfois abomination de la viande.

DV SENEVE.

Chap. lxxxij.

SEneué duquel nous vsions à faire moustarde & autres faueurs est sec iusques au cōmencement du quart degré, il profite cōtre la toux antique & aspreté de la poictrine, il coupe le flegme & autres visqueux, il mūdifie & nettoye les humeurs du chef: parquoy aucuns dient qu'il clarifie la veüe & incite charnelle copulatiō par sa chaleur.

DE LA SEMENCE DV CHENEVIS.

Chap. lxxxiiij.

SEmence de cheneuis est peschée par artifice, & d'icelle est faicte vne masse reduicte en la forme & maniere des grandes piles, & est gardée par aucuns temps. A ceste cause en aucunes regions & pais est d'icelle faict vn preparatif lequel eschauffe moult. Ceste semence graue la teste, & nuist moult à l'estomac, & pour ceste cause son vsage n'est point loué.

DV SEL. Chap. lxxxv.

LE sel soit artificiel ou aquatique il est de plusieurs sortes, & tant plus est aspre en leure, tāt plus est chauld, il induist appetit, & par luy l'esto

mac prend plus asprement la viande dont est causée meilleure digestiō: il coupe le flegme & humeurs cruz, & les garde de putrefaction. L'usage de sel a besoin de moderation, combien que grande quantité de sel soit plus conforme aux flegmatiques, & la moindre quantité aux coleriques.

DE SIMULA. Chap. lxxxi.

PAR simula nous entendons ce qui s'ensuit, c'est asçavoir quand le bled est parfaitement lavé & nettoyé de toutes ordures, le fault mettre seicher, & puis l'escacher en grosses parties & le rompre avec la meule, apres ce le broyer de rechef & rompre plus menu tant qu'il soit quasi en farine, & puis le laisser à tout le son, & en faire pain ainsi comme il est apporté du moulin: car adonc il estainct chaleur & la soif, il profite à ceux qui ont le foye chault, mais l'orge ainsi appareillé affroïdist.

DE LA SAULGE.

Chap. lxxxviij.

LA saulge cōbié qu'il y en ait aucune sauuage, & l'autre domestiq & fraîche: toutesfois nous auons la domestique & fraîche en usage de viandes, elle est chaulde & seiche au second degré, & conforte le cerueau & l'estomac: elle est resolutiue des ventositez, & appetitiue des oppilations. La saulge est iniustement d'aucuns blasphemée, que d'icelle les crapaux soyent engendrez, qui sont bestes venimeuses. Ce neantmoins pource qu'elle a plusieurs brâches pleines de grosses fueilles, & causantes vmbraige espoisse en esté, les crapaux courent volontiers souz la mention d'icelle. Pour

le. Pour ceste cause les experts iardiniers ont acoustumé de mettre la rue (laquelle toutes bestes venimeuses fuyent) auprès & ioignant de la saulge.

DES FAULX CHAMPIGNONS.

Chap. lxxxviij.

GRande difference y a entre les champignons lesquelz croissent en vne nuit par la rosée en beau pré gras & fertile, & entre les autres qui croissent sur vne piece de bois ou sur arbre pourry par force d'humidité, lesquelz vulgairement sont appelez empoules par similitude, pource qu'ilz sont enflés gros & ronds cōme empoules: tous champignons ne sont pas empoules, & nō au cōtraire, ilz sont de difficile digestion, & induisent difficulté de vriner, ilz engendrēt gros & melancolique nourrissement, & par la comestion d'iceux viennent aucunes fois, paralyse, apoplexie, & autres venimeux accidēs, comme dessus est dit des champignons. Ces faulx champignons cy n'ont aucune faueur: & combien que tous ne valent rien, toutesfois les blancz sont les meilleurs, lesquelz n'ont point mauuais odeur, & proprement s'ilz sont meslez avec sel & especes aromatiques. Ce neantmoins fault entendre que ceulx que nous appellōs empoules en ceste region ne doiuent pas estre mis au chapitre des faulx champignons, ny des champignons simplement: Car les anciens Philosophes en font vn chapitre different, auquel plusieurs medecins sont deceuz: & dient les docteurs qu'il y a vne sorte & espece de ces empoules qui est tout vn monceau cōme vn genitaire, & sont telles empoules profondes,

& croissent en terre sablonneuse cōme les champignons: & est telle espee de douce saueur declinant à douceur, quand est cōparée aux champignons & empoules: & ne dit on point que ces empoules cy soyēt nuisibles cōme les chāpignons & les empoules. Ceste cy a moindre frigidité en soy que les chāpignons & empoules, elle est aussi ventosité avec la siccité de sa substance, laquelle chose est cogneuë quand nous voulons comprendre sa parfaicte decoction souz la cēdre: car elle rend vn son avec aucunes ventositez, par quoy elle incite charnelle copulation en augmentant sa matiere. Et de ceste sorte d'empoule a entendu Galian quand il a dit que les empoules ne sont pas generatiues de mauuais humeurs, laquelle chose se peut persuader par leur odeur aromatique, & la douceur de la saueur qui est en elle, & principalemēt quand elle cōmence à noircir. Les empoules croissent enuiron la moitié du temps d'automne premieremēt blanches dedās, & vers l'hyuer commencent à noircir: & quand elles sont dedans parfaictement noires elles commencent à pourrir au cōmencemēt du printemps & se conuertissent en vers. Plusieurs ont dit ceste sorte d'empoules estre chaude, pource que la neige se fond facilement dessus: Et aussi ont dit que sa nature incite copulation charnelle. Ce neantmoins la verité est au contraire, c'est asçauoir que tous genres d'empoules sont de froide complexion: mais ceste espee dessus declarée à cause de son odeur aromatique & douce saueur decline moins à frigidité, & est plus prochaine d'attrem-
pance.

pance. La neige fond facilement sur les empoulles, car d'icelles continuellement & aussi par la terre grasse estât autour les vapeurs humides sont eleuez du hault putredinal, parquoy aucune forte & maniere de mousches habitent volontiers dessus les empoules, & aussi ne croissent point les herbes autour d'icelles empoules: Car cōme elles soyent engēdrées de pourriture, par la grosse de la terre, de laquelle aussi elles sont nourries; toutesfois elles incitent copulation charnelle nō pas par leur chaleur, mais à cause de leur ventosité & de la matiere de copulatiō charnelle, laquelle est engendrée des empoules, laquelle sorte d'empoules ou semblables à icelles croissent aux plaines & aux prez, & commencent à sortir hors la terre enuiron le my prin-temps: Et n'ont ces empoules cy aucune douceur & odeur, & les trouuent lon seulement durant les chaleurs du temps, mais les odoriferātes empoules & sauou- reuses ne sont trouuées qu'au tēps froid, depuis automne iusques au cōmencemēt du prin-tēps.

DES GRAPPES DE RAISINS.

Chap. lxxxix.
TOUS les autheurs & philosophes sont d'accord que les grappes de raisins, c'est asçauoir les raisins des vėdanges, & les figues estās en bon- ne maturité, sont meilleurs que tous les autres fruietz, pource qu'ilz ne sont aucunement nuisibles. Les raisins de vendanges bien meurs engendrēt louable & bon sang, & propremēt filz sont cueilliz de deux iours du mois, deuāt qu'ilz soiēt mangez: car filz sont mangez incontinent apres

qu'ilz auront esté cueilliz, ilz sont inflatiz, & engendrent humeurs pires & cruz. Si les raisins de vendanges sont parfaictement digerez, ilz engresfent, & est leur escorce froide & de difficile digestion: mais s'elle en est sequestrée, ilz sont adonc de facile & legere digestiō. Si les pepis sont auallez tous entiers, ilz sortent tous entiers du corps sans aucune lesion. Ceux qui mangent grande quantité de raisins de vendanges, se doiuent premierement purger des humeurs superfluz, & apres facilement engressent par la comestion d'iceux raisins, de laquelle chose les iardiniers enfans des vigneronz, & autre menu peuple en donnent bon tesmoignage, lesquelz ne mangent en la saison des vendanges quasi autre viande que raisins & figues, & se trouuēt en ce temps plus gras qu'en toute l'année: la gresse toutesfois acquise des grappes de raisins & des figues est de facile resolution, & est icōtinēt fondue, pource qu'elle engēdre chair molle & enflée. A ceste cause la grappe de raisin est meilleure & plus profitable quād elle est pēdue d'yn iour deuant qu'elle soit mēgée.

DES RAISINS DE KAREME.

Chap. xc.

RAisins seichez au soleil, que nous appellōs raisins de Karesme ont conformité avec les raisins dessusdictz en douceur, austerité & ponticité. Ceux lesquelz participēt de plus grande douceur, declinent à chaleur selon plus grande ou moindre douceur. Et tout ainsi & en la maniere cōmēt aucuns raisins ont des pepins & les autres n'en ont point: tout ainsi semblablement sont

les raisins de Karesme. A ceste cause quand il est commandé à quelque malade de prendre des raisins de Karesme sans pepins, lon peut entédre les raisins desquelz lon a osté & sequestré les pepins. Il n'y a aucune differéce aux raisins de Karesme, filz sont faictz de grosses grappes ou de petites. Les meilleurs toutesfois sont les plus doux & les plus gras, ayans la peau moult subtile & deliée. Ilz profitent grandemēt au foye, en ostant les opilations, en confortant la digestiue du sang, & nettoiyēt le flux du foye par sa propriété, ilz confortent la rate, ilz ouurent les voyes des reins & de la vessie en les confortant. Plus ample nourrissement donnēt les raisins secz que les raisins vers & sont de meilleure nourriture, ilz conferent au poulmō, à la toux, à la difficulté de l'haleine, & tiennent le ventre humide : toutesfois iacōit ce que tous raisins soyent amiables à l'estomach & au foye, ce neantmoins les raisins aspres & ayans aucune acetosité confortent plus l'estomach que les raisins doux, & sont plus stiptiques, en humectant moins le ventre. Quand lon veult nourrir quelque malade, ouurir les opilations, amollir le ventre, conforter le foye, & donner confort à la poictrine, lon doit prédre les plus grās raisins, & en oster les pepins, mais si nous voulons constiper & restraindre le ventre, nous devons prendre iceux raisins & les manger avec leurs pepins, & propremēt les raisins aspres & non doux: toutesfois ainsi comme les raisins fortissent & prennent diuersité par la variation des regions, ainsi prennēt ilz diuersité selon les grappes maigres.

VIN est vne liqueur pressée des grappes de la vigne si bõne qu'il n'y a aucune autre liqueur (pour commun vsage) qui soit plus apte, cõuenable ny accommodante à nature humaine. Et certainement oncques homme ne sceut trouuer par art, ou par nature chose qui peust supplier l'office du vin en bonté & conformité: Mais qui voudroit ou seroit si hardy d'escrire, ou narrer les vertus du vin accumulées, dõt il est par les Philosophes & autres autheurs extollé, il seroit plus veu des ignorans, que des sçauans estre amy du vin. Suffise dõc narrer & exprimer aucunes de ses vertus speciales: que le vin donc prins & assumé moderémēt, n'y a de viãde ny breuuage si bon: mais au cõtraire n'est point de viãdes ny de breuages pires q̃ le vin beu excessiuemēt, le vin est de grãd, loüable & tresbon nourrissement, comme dessus est dit aux reigles generales. Et notez qu'il n'y a aucune chose comparable au vin qui puisse si tost subuenir aux deffaulx de nature: parquoy selon la coustume des Sarazins ausquelz selon leur loy le vin est prohibé, leur est loysible & permis d'vser seulement de vin en leurs grandes & extremes necessitez, & quãd nature leur default: car incontinent il refocile vertu & engendre nouueaux espritz, & nouuelles nourritures, pource qu'incontinēt de sa propriété est couru au cœur, & ne trouue lon aucune viande ou breuuage qui soit si confortatif de chaleur naturelle comme le vin: pource que sa chaleur est semblable & con-

forme à chaleur naturelle à cause de la familiere conuersation qu'il a avec nature humaine. Le vin aussi s'il est beu modérément, & cōme par raison appartient il conserue la santé corporelle, il cōforte la vertu du foye, & de l'estomac, avec leur digestiue. Et en ouurant les passages des veines, fait penetrer la nourriture par tout le corps. Il engendre clair sang, & clarifie celuy qu'il treuue estre trouble, il ouure les oppilations du foye, & de la ratte, & nettoye les reins & la vessie, il oste & regette la tenebrosité du cœur, en coroborant toutes les vertus corporelles, & spirituelles, & nō seulement du corps, mais donne les forces de l'ame, quand il est beu par modération. En ce cas aussi il ague tous les sens, il donne sciēce & ingeniosité, il ague les forces de l'entendement, il donne lyesse & audace en repellant toute tristesse, il fait presumer & entreprendre grādes choses en toute raison. Le vin aussi prins & assumé avec deue proportion est conforme à tout aage, en tout temps, en toutes regions & à toutes cōplexions. Aux enfans certainement est conuenable de donner vn peu de vin compettemment trempé & modifié d'eau, car leur donner pur, seroit adiouster & mettre feu avecques feu. Aux ieunes hommes en plus grande quantité avec moins d'eau: car pour la force de leur cerueau & des autres mēbres peuuent mieux endurer le vin & plus facillemēt estre gardez & preseruez qu'il ne leur nuyse. Aux vieilles gens le vin profite, car le vin cōme dit le philosophe est le lait des vieilles personnes. Mais pour la debilité de leur cerueau ne peuuent pas si facil-

lement estre preseruez qu'il ne leur nuyse. A ceste cause il fault telle portion & quantité de vin, & donner aux vieilles gens, qu'ilz le puissent porter & endurer sans aucune violéce. En froyde regiõ est cõuenable de plus boyre de vin, mais en chaulde region, en fault moins boire. Et avec ce qu'il soit bien attrempé d'eau. Semblablement & proportionnablemēt en hyuer plus que en esté, selon la diuersité du temps, & à cause des chaleurs & extraction de la soif. Mais moins en chaulde region en esté qu'en froyde. Et adonc ceux qui ont chaudes complexions y doiuent mettre beaucoup d'eau, & pareillement ceulx qui ont chaudes complexions que nous apelons colleres, car adonc le vin leur profite, pour ce qu'il appaise la collere, qui est vn humeur chaud & sec par les reins, & la vésie. Le vin aussi confere à complexion froide & humide, qui est appelée flegmatique. Il coupe les humeurs visqueux, les meurist & resoluë par sa chaleur, il profite à froide & humide complexion : qui est appelée melancolique, & faict sortir les humeurs melancoliques, en ostant leur vertu nuisible. Il compete aux chaulx & humides, que nous appellõs sanguins. Car il engēdre bon sang & clair (comme cy dessus est dit). De diuerses choses ie trouue le vin diuersifié ou de la regiõ, en laquelle il est produict, ou de diuerses especes de vignes des grappes desquelles il est presuré, ou par l'odeur, ou par la couleur, ou par la force & puissance, ou par la debilité & foyblesse, ou par la nouveauté, ou par la decoction, ou par l'antiquité & artifice.

artifice. Nous voyons aussi aucunes sortes de vignes, & aucunes regions produire meilleurs & plus louables vins que les autres, desquelz est bon croire aux vigneron experts en ceste science.

Le vin doux est gros & chauld, au secōd & au premier degré, contenant humidité, & n'est pas si bon que les autres vins. Car il engendre grosse nourriture. Il trouble le sang & n'estaint aucunement la soif. Mais aucunes fois l'augmēte. Et quād il est meslé avec autres humeurs dedans le corps, il pourrist incontinent, & est conuerty en humeurs colericques. Le vin lequel est doux, a force de nuire à tous les membres, excepté à la poictrine & au poulmō, desquelz il ouure les opilations. Son vsage excessif engendre ydropisie. Parquoy il prepare le corps à ydropisie. De l'vsage du vin doux, donc il se fault abstenir & garder. Le vin aspre lequel plus souuent est produit en pays de mōtaignes, est dit & reputé froid de plusieurs aucteurs, il estrainct la poictine. Il mort l'estomach, & induist les effectz de vin-aygre. Le vin lequel obtient saueur entre douceur & ascetosité est treslouable, reputé par les aucteurs, proprement s'il est odoriferant & aromatique, non ayant odeur aguë, graue ne estrange.

Q Vand aux couleurs du vin, il fault enquerir & inuestiger l'experience des lieux, car en aucunes regiōs, les vins blācz sont meilleurs que les noirs. Aux autres regiōs les noirs sont meilleurs que les blācz. Mais communement selon l'opiniō des philosophes parlans du vin, les vins ayās

couleur del'or, vins claiertz, vins soubblancz, &
 generalmente vins ayans moyenne couleur, sont
 meilleurs que tous autres vins. Les trespuissans &
 fumeux eschauffent par trop le corps, & la teste.
 A ceste cause leur vsage continu est mauuais. Les
 vins debiles & aquatiques sont de petit nourris-
 sement. Les meilleurs donc sont ceux qui sont
 moyens entre les vins declairez: les vins vieilz &
 les vins nouveaux sont fort varieez en nature. La
 nature du vin nouveau dure vn an ou plus selon
 plus grande ou moindre puissance qu'a le vin,
 car le vin fort & puissant enuieillist plus tardie-
 ment & le vin foible & aquatique plus tost que
 l'autre. La vieillesse du vin cōmance à la quatrie-
 me année. Celuy donc qui pour raison de son
 aage est plus loué des aucteurs est le vin de la fin,
 & terme de la premiere année, iusques au com-
 mencement de la quatriesme, car le vin nouveau
 & celuy principalement qui depuis peu de tēps
 est fait, est chauld au premier degré, oppilatif du
 foye: putrefactif des humeurs, ebulatif, vétoseux
 & inflatif. Le vin vieil de quatre ans ou plus, est
 chauld & sec au tiers & quart degrez. Et de tant
 plus est chauld, de tāt plus est fort & puissant. Ce
 vin cy nourrist peu, & enyure tost & soubdaine-
 mēt. Et quād il est trop vieil il acquiert faueur a-
 mere, & pert la propre nature du vin. Et est son
 vsage mauuais. Mais le vin moyen de la premiere
 année iusques à la quatriesme est chauld & sec au
 secōd degré. Celuy vin cōme peult estre entēdu
 par les choses cy dessus dictes, est le meilleur, le-
 quel est odoriferant & aromatique nō bruslé par
 decoction

decoction & non artificiel, mais celuy qui tiét le moyen entre le blanc & le noir, entre le doux & l'aspre, entre le puissant & l'aquatique, & entre le nouveau & le vieil. Par artifice aussi féblablement le vin acquiert diuerse nature. Car selon les diuerfes especes, il ayme la decoction: & son moust cuit, & boullu, est rendu plus vineux, plus puissant & plus fumeux, car les parties vineuses au moust sont meslées avec les terreuses & grosses, & tousiours en la decoction les plus grosses parties sont retenues, & demeurét. Et les aquatiques lesquelles au regard des vineuses sôt meslées avec les terrestres sont plus subtiles, & sont resoluées par telle decoctiō. A ceste cause le vin cuit pour ce qu'il est moins meslé avec les parties aquatiques pourrist plus tardiement & est plus longuement gardé sans empirer. Il demeure donc vineux & aquatique, est euaporé par la vertu du feu: de laquelle chose le contraire seroit faict si le vin parfaictement & entierement depuré estoit cuyt. Comme il appert du vin distillé ou les vineuses & puissantes parties du vin, sont esleuées par la fuscée: & sont conuerties en eau ardante, laquelle nous appellons eau de vie ou de vin. Et les parties de l'eau sans saueur residét au fons du vaisseau de la distillation comme eau, & les venimeuses parties demourans au fons du vaisseau sequestrées, sont reduictes plus subtiles que les parties aquatiques. Et ce qui est plus subtil est plus tost resolu par le feu, mais de la decoction de vin vieil & de pur, les parties venimeuses sont resoluées des aquatiques: icelles aquatiques de-

mourans en bas. De laquelle chose le cōtraire est veu par le moust.

LE vin aussi a vertu singuliere par ce qu'il tyre à soy la vertu de toutes les choses meslées ou decoctionnées auecques luy, au moyen dequoy aucuns des anciens medecins garissoiēt toutes maladies par le vin, car certainement durant le temps de vandanges, ilz preparoiēt diuerses fioles, & autres vaisseaux de moust, par la decoction des medecins, & selon l'exigence des diuerses maladies. Et ainsi reseruoient les vins ayans vertu des sirops & medecines, selon l'exigence de chascune maladie. Toutesfois si aucun en hyuer vouloit boire le vin de l'année presente, faire le peult par deux meilleurs moyens desquelz vsent les princes volōtiers, soiēt cueillies les grappes estans en bonne & parfaicte maturité, & par trois iours, ilz soyent exposées à la chaleur du soleil, & iusques à ce qu'elles soient aucunement passées & seiches. Et puis soyent ostez les pepins, & les raizins cloz & fermez. En apres ait telle & si grande quantité de grains que ilz puissent emplir la moytié d'une fiole. Apres ce soit mis par dessus lesdictz grains bon moust, iusques à ce que ladicte fiole soit pleine. Et pour vray tel vin clarifie incontinent. Et cōbien qu'il soit nouveau, il n'est poit toutesfois oppilatif du foye, ventoseux, inflatif, ne ebulatif des humeurs. Tel bruage est volontiers baillé par medecins aux princes & corps viuans delicatement. L'autre maniere est de prédre les trois pars du moust & vne partie d'eau meslez & boulluz ensemble,

iufques à la refolution de la quarte partie, tel vin eft dit laué. Et combien qu'il foit nouveau, il pert toutesfois la malice du vin nouveau. Au furplus de l'artifice du vin eft bõ de croire à ceux qui de telle experience ont vſé.

LImmodéré & ſuperflu vſage de vin eft tres-mauuais à l'ame, au corps, & aux humeurs, car il effemine l'homme, & engroſſiſt l'engin & entendement. Il fait auoir regard aux choſes inferieures terriennes & tranſitoires. Et faiçt deſpriſer les choſes grandes, magnifiques & perdurables. Et n'eſt pas de ſi grãde vertu l'vſage de vin moderé, que l'immodéré eſt de grand malice & peruerſité, car il debilité le cerueau & ſes vertus. Il engendre tremeur au cœur, paralifie, apoplexie & ſpaſme. Et eſt à noter q̃ le vin n'induift pas ſes mauuiſes paſſiõs pour raiſon de ſa qualité, car telles maladies ſont froides, & le vin eſt chaud. Mais comme dit Ariſtote en la tierce partie de ſes problematiques, le vin par ſa naturelle chaleur reſiſteroit à telles maladies, & moult profiteroit. Mais par accident leur nuift. C'eſt à ſçauoir par excès, & les fait aduenir. Pour ce que de ſoy il eſt penetratif, & faiçt penetrer les humeurs viſqueux, & cruz aux mēbres loĩgtains, & aux nerfz, leſquelz de ſoy ne ſeroient pas penetratifz, & ainſi telle frigidité induiſt maladies, outreplus le vin beu en grande quātité n'eſt aucunement digéré en l'eſtomac. Et à cauſe de ſon amytié & conformité qu'il a avec nature humaine, il eſt des mēbres, tyré ſans digeſtion, au moyen duquel il aygriſt. Et eſt le vin aigre ennemy des

membres & induist froides maladies. L'immodéré bruuage de vin induist ebriété, & frequante ebriété, ostant tous les sens naturelz, & debilité tous les membres. Ebriété certainement a plusieurs causes, car ceux qui ont plus debille cerueau sont les plustost enyurez pour ce que leur cerueau n'a pas la puissance de resister aux vapeurs vineux & à leur vertu nuysible. A ceste cause telz personnages sedoyuent garder & abstenir de boire vin fort, & fumeux silz ne le modifient raisonnablemēt d'eau. Ceux aussi qui ont accoustumé de boire peu de vin, encourent plus facilement ebriété. Mais les biberons & tauerniers s'en enyurēt en plus grande difficulté, pour ce q par coustume inueterée leur est acquise resistance cōtre le vin. La famille aussi comme petits enfans, & ceux qui vsent peu de viande acquierent plus facilement ebriété. Car le montement du vin au cerueau non empesché de quelque chose que ce soit induist plustost ebriété. Le vin semblablemēt paré, fumeux, & puissant induist plus facilement ebriété. Il est à noter que plusieurs choses meslées avec vin, induisent à plusieurs ebrietez, comme les raisins cueilliz en la vigne au temps de védanges meslez & esprains parmy le vin vieil, ou le bois d'aloës, lesquelz ians resistance induisent ebriété avec le dormir doux & amyable. Ce qui plus tost & plus fort enyure vne personne, c'est de mettre avec le vin l'eau de la decoction de lolion, & encore plus fort est l'eau de la decoction de Iusquianus, que nous appellons hanebane: ou de mandragoire: encore plus asprement
eau d'ache

eau d'ache. Et y a aucunes autres confectiōs composées, causantes merueilleusement ebriété, lesquelles ne sont licites ne conuenables de reciter, pour obuier à la malice des peruers, & est à noter q̃ le vin trempé d'un peu d'eau, enyure plus facilement & plustost que le vin pur, pour ce que si peu d'eau, fait plustost pénétrer le cerueau par aucune resistance avec le vin: mais le remede contre ebriété est longuemēt & subitement dormir apres icelle, ou prédre le bruuage du cytron, ou prédre & māger de la coriande seiche, broyée avec autant de sucre blanc, à la quātité de deux cueillerées. Et apres cela, boire le ius de coings, boire aussi de l'eau froide avec vin-aygre. Et seruēt toutes ces choses cy, pour oster ebriété, & semblablement le bruuage d'huyllé pure, & la comestion des choux, ainsi comme le recite Aristote en ses problematiques, mais odorier & florer cāphoram & le sandail, par soy ou meslez avec eau rose, allege & appaise ebriété. Semblablement aussi la comestion des myettes de pain trempées en vin-aygre, & plusieurs autres cōfectiōs ont composé les anciens philosophes, ostans & appaisans ebriété & gourmandise, lesquelles icy escrire & narrer, seroit chose superflue & trop prolixé.

D V S V C C R E.

Chap. xxxij.

Succe est laxatif, & absterfif, mais le sucre depuré est chaud & humide au premier degré. Il engendre bonne nourriture, il ouure la poitrine, & adoucist son aspreté, il profite à

l'estomach collerique, & est facilement cōuertty en collere. L'vsage du sucre quant aux corps sains est bon aux confections & preparatifz, & acquiert telle vertu comme la chose avec laquelle il est meslé & confict.

REGIME DOMESTIQUE. QV VN chacun doit garder pour sa santé.

TOy qui veux auoir santé corporelle ie te demontre & enseigne, que si tu desires conseruer longuement la vie humaine en santé & prosperité, & par ce moyen fuir & euitier plusieurs perilz de ton corps, que tu entendes & retiennes diligemment ce qui s'ensuit.

QVand tu te leueras au matin de tō liēt extē vn peu les mēbres de ton corps: car par telle extension nature est moult confortée & chaleur naturelle corroborée & fortifiée és membres. Apres cela pigne les cheueux de la teste, car par telle pection les ordures & immundices de la teste & du cerueau sont nettoyyées & abstergees, le chef totalement purifié, & les cheueux, la teste & le cerueau en sont plus legiers. Laue tes mains & ta face d'eau venant d'estre puisée & d'eau la plus froide que tu pourras trouuer, car telle lotion rend bonne veüe, claire & ague. Et par cela aussi chaleur naturelle & les espritz sont moult fort confortez. Nettoye ton nez pour expurger & reiecter la fastidiosité de la poiētrine, car par telle mūdicitē, le cerueau & la poiētrine sont allegez, & demeure la parole plus ferme & plus aisée.

Torche tes dentz & tes gēciues des escorces d'arbres chauldes & seiches, comme de la reglisse ou de cannelle, & autres qui te donnerōt bonne alaine & bone odeur en la bouche, & par ce moyen tes dentz & genciues serōt purgées de toutes imundicitez & ordures. Ayes le soing & sollicitude d'enfumer ton cerueau avec choses precieuses: au temps d'esté de choses froides comme roses & autres semblables. Et au temps d'hyuer avec chauldes, comme cinnamomon, gyrosles, & autres semblables, car telle suffumigation ouure les nazilles, nettoye & conforte le cerueau: & est de telle & si efficace vertu qu'elle garde de cheoir les cheueux de la teste, & faict engresser le visage.

Avec les choses dessusdictes, adorne & acoustre ton corps de beaux & honestes vestemens, car par telle adoration ton cœur sera totalemēt tout resiouy, & par ce moyen le corps sera en bonne prosperité. Apres ces choses dessusdictes va & chemine ou tu voudras, en maschant quelque chose en ta bouche, comme de la semence de fanueil, de l'aniz & autres semblables qui te rendront bon odeur en la bouche, conforteront ton estomach, & avecq' ce t'ouuriront l'appetit.

Aussi pareillement des choses cōfictes cy dessous escrites prenez vne portion, & quantité, à celle fin qu'elles te desenfient le ventre: C'est ascauoir Diaborfaca, Diacase, & autres semblables. En apres fatigue vn peu tes lebures en parlant ou deuissant, maniant & remuant ton corps, semblablement avec doux mouuement, car

telle fatigation cause tresbõnes vertus, elle cõforte chaleur naturelle, & consommé la superfluité du corps. A ceste cause, t'est chose tresvtile de fatiger & trauailler ton corps deuant que prẽdre ta refection, afin que l'estomach soit allegé.

ET quand viendra l'heure de prendre ta refection, commence & icelle prens en tel ordre, & principalement au disner. Premièrement tu mangeras viandes de legiere & facile digestion, & apres icelles viandes de difficile digestion, cõbien que l'vsaige de plusieurs & diuerses viandes soit totalement contraire à santé corporelle, cõme dessus est dict. Ou tu mangeras seulement grosses viãdes lesquelles ta nature a de coustume mieux & plus parfaictement digerer, car certainement plusieurs personnes sont de telle nature qu'ilz digerent mieux du bœuf, qu'ilz ne sont des poulcins, & en sont plus nourris & plus sustẽtez, & la cause seule est la coustume, car no' trouuons diuerses viandes, desquelles aucuns acquierent santé, & les autres maladies. Toutesfois les meilleures & plus saines viandes sont celles lesquelles ont meilleur sang en la digestion, & desquelles nature humaine est plus parfaictement substantée & mieux conseruée & gardée en santé & prosperité, & sont telles qui s'ensuyuent. C'est à sçauoir chair des bestes chastrées, chair de cheureau, & de veau, & des oyseaux, les perdrix, les faisans, les chappons, & les gelines, sont les meilleurs oyseaux, les plus digestibles & les plus sains pour le corps humain. Et des oyseaux lesquels volent aux montaignes, celles sont les pires

pires lesquelles se tiennent en la fange, car'elles se digerent en grande difficulté: Les œufz des poules sont tresbons, & engendrent tresbõ sang. Les poissons d'eau douce ayant le cours, sont tresbõs, & leur chaudau ou brouet est moult profitable, car il adoulcist & rend le ventre lubrique, produist l'vrine, & avec ce faict digestion moult bien ordonnée. La bourroche, les choux crespus, la mante, les espinars, & autres semblables, sont tref bon potage, & bonne cuyfine, & est leur nourrissement moult profitable.

LE pain que tu mangeras soit bien neet, bien leué, & bien cuiet, & soit mangé le iour d'apres qu'il aura esté cuiet, pour ce qu'adonc engendre meilleur sang, mais par le pain tédre & chaud l'estomach & les entrailles sont greuez.

LE vin que tu buras soit odoriferant, de la couleur de l'or, & soit doux & suave, lequel soit modifié d'un peu d'eau, à celle fin que la viande en courant par les mēbres, face plus vertueuse operation.

NE te haste aucunement en buuant n'en mangeant, car par cela les espritz sont greuez, tu doibtz aussi parfaictement mascher la viande que prendras deuant que tu l'aualles, en telle maniere que tu sentes bien peu sa saueur: car telle viande est plus tost digerée en l'estomac, & quand elle est fort machée, elle est à demy digerée. Et ne fais pas comme aucuns, lesquels boient & veulent boire à chascune bouchée, mais boy tousiours à la fin du disner, ou soupper tout ton soul, & au-

tant cōme ton corps en desire, sans excéder les metes de raison, & sans diuersité de viandes.

Sur toutes choses garde que tu ne manges tant en vn repas que tu n'ayes tousiours appetit de manger: pour ce que quād le corps est excessiuelement remply, l'estomac seuffre grand aggrauation & empeschement. Et certainemēt la viande superflüē, te rendra pesant & debile. Et debilitera aussi semblablemēt chaleur naturelle. Et si d'auāture il aduient que ton corps prengne viande à superfluité & excessiuemēt, au moyē dequoy tu sentes empeschement & aggrauation en ton esto mac, & en ton corps, il te conuient preparer à vomissemēt. Et si à toy est impossible vomir, il te cōuiēdra boyre vn peu d'eau chaude, & incōtinent la douleur sera appaysée & te trouueras assez moult bien allegé, & aussi te donnera ladicte eau appetit de dormir, adonc pourras dormir seurement, autāt que ton corps voudra dormir. Si cela ne suffist, fais abstinence deux iours durans, & iufques à ce que ta condition soit retournée en son premier estat. Et si tu ne le peuz faire, boy vn peu d'eau froide, de la plus froide que tu pourras trouuer: car tant plus sera froide tant meilleure & profitable sera pour te faire abstenir, pour ce que la soif est appaisée par l'eau, principalemēt quād elle est froide, chaleur naturelle aussi confortée & adouleye, & la viande mieux & plus parfaitemēt comprise.

Si aucunes fois aduient que tu remplisses ton corps de plusieurs & diuerses manieres de viandes, tu doibz obseruer & garder sur tout

toutes choses telle ordonnance en la comestion d'icelles.

Premierement & deuant toutes ces choses tu dois manger les plus legieres & les plus digestibles viandes. Apres ce consecutiuemēt, tu doibz manger les grosses & de difficile digestion. Et quand les grosses & pesantes viandes sont dessus les legieres au fons de l'estomach, par leur grauité & pesanteur, & sçaches que si d'auenture tu manges les grosses viandes les premieres, & les legieres & subtiles apres les grosses, les viandes legieres & subtiles demourent sans aucune digestion en l'estomac, pour l'obstacle d'icelles grosses viandes, à ceste cause est l'estomac corrompu & la viande demoure indigerée, & ne profite aucunement au corps.

ENtendez oultre qu'en mangeant ne dois differer vne viande apres l'autre, car sur toutes autres choses il n'y a rien pire que de manger plusieurs & diuerses viandes, & en les mägeant proroger espace entre les viandes: pource que quand la premiere viande commence à digerer, & tu manges vne autre viande apres ceste là, la seconde viande demeure indigerée: Et par ainsi chaleur naturelle est corrompue en la premiere digestion. Tu dois aussi mettre ordre à prendre ta refection. Et si tu as accoustumé de manger deux fois le iour, il te conuient manger deux fois. Si tu n'as accoustumé qu'une fois tu ne la dois pas excéder: Mais si d'auenture tu l'excede, & il aduient que tu manges deux fois, adonc s'engendre vne paresse en la viande, pour laquelle ne se digere au-

cunement.

Q Vand viendra apres disner, ou soupper, que tu te leueras de table, tu laueraus bien tes mains, car telle lauatiō est bōne, & profite moult, tellement qu'elle garde les mains de trēbler: mais par faulte de lauer les mains apres la refection, il aduiēt plusieurs maladies au visage & aux yeux: laue aussi ta bouche & tes dens, car les ventositez des viandes sappliquent aux dentz, & par ce moyen rendent mauuaise alaine.

A Pres que tu auras fait ces choses dessusdictes, tu te pourmeneras & chemineras mille pas ou enuiron, à celle fin q̄ la viande soit conuertie en nourriture, & avec ce qu'elle descende au fons de l'estomac, laquelle chose tu pourras congnoistre & apperceuoir par la singultifation & alleuiation de ton corps. Apres cela tu pourras dormir, car le dormir en est biē meilleur: & avec ce chaleur naturelle plus confortée, mais tu dois dormir la teste couuerte, & assez haute. Et premieremēt reposer sur le costé dextre, vn peu apres sur le costé senestre, & te tourne pour accomplir ton somme, du costé opposite.

DES QUATRE PARTIES DE L'AN.

PCur ce que le temps de l'année en l'ordonnance des viandes & à la preseruatiō de santé corporelle dōnēt grād secours & aide aux corps humains. Saches que l'an est diuisé en quatre temps, c'est à sçauoir, printemps, esté, automne, & hyuer, à ceste cause pour prendre & assumer le commencemēt du printēps, qui est le plus noble temps

temps de l'année. Je t'enseigne cy dedás desquel-
les choses tu te dois garder, & comment tu dois
gouverner la cõplexion de ton corps en iceluy.

DU PRINTEMPS.

LOn doit premieremēt entendre que le prin-
temps prend son cõmencemēt à la my Mars,
& dure iusques à la moytié du mois de Iuin. Je
t'admoneste donc que tu estudies & prènes pei-
ne durāt ce printēps de regir & gouverner la con-
dition de ton corps en la maniere qui s'ensuit.
C'est asçauoir premierement que tu manges peu
des viandes qui sont de facile & legere digestion,
cōme la chair de moutõ & de cheureau chastré,
chair de perdrix & de chappõs. Faiētz cuire des
bourraches & mäge le potage d'icelles, & te con-
forte du broüet de pois, car en ce mesme tēps les
corps sont moult repletz, & n'ont pas besoin de
manger guere souuēt diuerses viādes pour la re-
pletion du ventre. Fatige & trauaille ton corps tē-
perāment, car telle fatigation & trauail oste toute
superfluité, & garde le corps sain, sans aucune de-
bilitation. Ne laisse point à te leuer au matin. Pur-
ge ton corps & t'efforce de lascher & nettoyer tõ
vêtre, à celle fin que l'esté lequel s'ensuit apres ce
temps cy, ne te trouue replet de toutes humeurs.
Tu pourras aussi si tu es marié acõplir copulatiõ
charnelle avec ta partie moderēmēt, sās toy aucu-
nement eschauffer: & trouue lon ce tēps cy estre
generatif des enfans. Et par ainsi il a tempestiue
surrection du liēt, car par ce le courage est cõfor-
té, & aussi le corps de l'homme.

DE L'ESTÉ.

Esté prend son cōmēcemēt au mois de Iuin, & dure iusques à la my Septēbre. Adonc la cōdition humaine est entrelīée par chaleur & siccité, en telle maniere qu'il s'engēdre multitude de chaleurs au corps humain. Vie dōc en ce tēps souuēt de vomissemēt, pource qu'il purge le cerueau & l'estomac. Quand tu seras vn peu pesant & mal disposé, ta viande soit aigre & froide, cōme de lactues, de bourraches & autres semblables, pource que telles fatigatiōs cōsomment, & est la chair de mouton, de cheureau, de poussin & veau principalement cōuenable en ce tēps d'esté. Garde toy en ce temps de manger viandes haillées, chaudes, seiches, & esquelles y ayt trop de poyure. Garde aussi en ce tēps ton corps de labeur & de copulation charnelle afin qu'il ne defaille par trop grā de debilitation de chaleur naturelle. Prends soing & sollicitude de souuent baigner ton corps en baings d'eau douce, & arose souuentefois ta face & aussi tes mains en eau froide, & dors en lieu couuert. L'attrempance de ce tēps est tresbonne aux femmes vieilles, & autres estās de froide cōplexion : mais elle est contraire à tous ceux qui sont chaulx & secz, car elle les faict souuentefois encourir fieures agues, & auoir angosse en plusieurs autres choses.

D' A U T O M N E.

Automne prend son cōmencemēt à la my Septēbre, & dure iusques à la moytié du mois de Decēbre, & est vn tēps lequel est totalemēt dissonne & discordāt aux corps humains, & sont par luy engēdrez les cōpositiōs des mauuaises cōplexions,

xions, c'est asçauoir plusieurs melâcolies, & plusieurs fieures. Te cōuiēt dōc tellemēt & en la maniere regir & gouuerner la cōplexiō de tō corps, la cōdition & l'estat en ce tēps cy. Premièrement tu auras sollicitude de prēdre viandes de facile & legiere digestion, & qui engēdrēt bon & loūable sang. Vse de bon vin, & te garde de manger des choux & du beuf: car en ce tēps de telles viandes fās doute s'engēdrēt plusieurs melâcolies. Garde aussi & t'abstiens de manger fruiçtz estans en ce tēps, pource q̄ de la comestiō d'iceux grâdes maladies sōt excitées es corps humains. Garde toy aussi en ce tēps de dormir en lieu froid la teste decouuerte: car en iceluy tēps les dentz, la poiçtrine & le poulmon degoustent, & maladies prochaines sont incontinent suscitées.

DE L'HYVER.

HYuer prend son commencement à la moytié du mois de Decēbre, & dure iusques à la my Mars, sa nature est froide & humide: & en iceluy tēps s'engendrēt plusieurs flegmes aux corps humains. Garde toy donc en ce tēps de māger viādes froides & humides, c'est asçauoir chair de pourceau, & de māger poisson, laiçtages & autres semblables: pource que d'icelles viādes s'engendrēt les flegmes et s'assemblēt au corps humain: mais au cōtraire vse de viādes chaudes et seiches desquelles chaleur naturelle soit fortifiée, laquelle est debilitée au corps par froidure: Et ainsi par chaleur naturelle la viande est plus parfaictement digerée. Ce temps est acceptable aux hommes de chaulde nature et cōplexion, mais il est dom-

mageable aux vieilles femmes, aux enfans, & à tous autres qui sont de froide complexion.

Q Vand la saignée est bõne, il est vtile de diminuer le sang. Et faict bon saigner depuis le xxv. iour de Iuin iusques au xv. iour de Iuillet faict bõ prédre medecines laxatiues & breuuages au matin, & apres midy depuis le xxij. iour de Nouëbre, & le xxij. iour de Decëbre iusques au mois de Ianuier: mais la fleubotomie est bõne en tout tẽps, quãd la necessité cõtraint, car la Lune est meilleure & plus opportune en aucuns iours qu'aux autres, c'est asçauoir les iiij. vij. xj. xiiij. xvj. xvij. xviiij. & xxij. iours. Sachez que s'aucun nasquist en ces trois iours cy apres nommez, qu'il mourra de mauuaise mort, s'il n'en est par la grace de Dieu singulierement preserué. Le premier est, le premier de la Lune du mois d'Auril. Aussi en ce iour Caïn tua & mist à mort sõ frere Abel. Le secõd est le premier iour de la Lune du mois d'Aoust, car en ce iour Adam mãgea de la põme, laquelle luy estoit prohibée de Dieu nostre createur. Le troisieme est le dernier iour de la Lune de Decembre. Aussi en ce iour nasquit Iudas, lequel trahit & vedit le createur du ciel & de la terre, & à la fin se pedit. S'aucun faict ces trois iours cy aucune chose de nouveau, ou cõmence quelque œuure, ou achete, ou vende, ou faict edifier maisons, ou prenne l'estat de mariage ou autres semblables, il luy en prendra mal, si la grace de Dieu, comme dessus est dit, ne luy est propice.

TABLE OV REPERTOIRE

DE CE QVI EST CONTENV EN
ce liure. La lettre a denote le premier
costé du fueillet, b le second.

PREMIEREMENT.

D E l'air. 2.a	Des especes aromatiques. 29.a
Du dormir en lieu vou té sans ouuerture, avec du feu de charbon. 4.b	Du basilic. 30.a
De l'exercice, & d'euter oyfueté superflue. 5.b	De la bourroche. 30.b
Du dormir & du veiller. 8.a	De la buglose. 31.a
De purger les corps viuant delicatement, à tout le moins vne fois l'an. 11.b	De la porée. 31.a
Recepte pour purger. 13.a	Du beurre. 31.a
De la viande & du bren nage. 16.a	Du citron. 31.b
Des amandes. 19.b	Du coing. 32.a
De l'aueline. 20.a	De la chastaigne. 32.b
D'amydum. 20.b	De chrysomylla, autrement dicté munia. 33.a
De l'anet. 20.b	Des capres. 33.b
Du treffle. 21.a	De la courge. 33.b
De l'ozeille. 21.a	Du concombre. 34.a
De l'aigrun. 21.b	Des citrouilles. 34.b
De l'anis. 25.a	Des cerises. 35.a
Du verius de grain. 25.a	Des pois. 35.a
Du vin-aigre. 25.b	Du chou. 36.a
De l'eau. 26.b	Du fourmage. 36.b
	De la chair. 37.b
	Des oustardes. 40.a
	De la becasse. 41.a
	De la perdrix. 41.b
	Du faisant. 41.b

TABLE.

Des gelines et du coq.	41.b	Des esles.	46.b
De la coturnice.	42.a	Du col.	46.b
Des pigeons.	42.b	Des reins.	46.b
De la turterelle.	42.b	Du ventre.	47.a
Du passereau.	42.b	De la poche.	47.a
De l'alouette.	42.b	Des genitoires.	47.a
Du canard.	43.a	Des dattes.	47.b
De l'oison.	43.a	D'endive.	47.b
De la grue & du paon.	43.a	De cruca, dicté roquette.	48.a
Des oiseaux de riviere.	43.a	De enula campana.	48.b
Des petits oiseaux.	43.a	De la figue.	49.a
De la caille.	43.b	Des champignons.	49.b
Du cheureul.	43.b	Des febues.	50.b
Du lieure.	43.b	Du fenail.	51.a
Du cheureau.	43.b	De la graine de pin.	51.b
Des moutons chastrez.	44.a	De la grenade.	51.b
Du beuf.	44.a	De iunibes.	52.a
Du veau.	44.a	De la laitue.	52.b
Du porc.	44.b	Des lupins.	53.a
Du herisson.	44.b	Des lentilles.	53.a
De la chair sallée.	44.b	Du lait.	53.b
De chacun mēbre des bestes,		Des melons.	54.b
& premieremēt de la cer		De la meure.	55.b
uelle.	44.b	De la meure du buisso.	56.a
Des testes.	45.a	De la mente.	56.a
Des yeux.	45.a	De matianum.	56.b
De la langue.	45.b	De la mariolaine.	56.b
Du cœur.	45.b	Du miel.	57.a
Du poulmon.	46.a	De la noix.	57.b
Du foye.	46.a	De la neffle.	58.a
Des mammelles.	46.a	Du cresson alnois.	58.a
De la ratte.	46.b		

TABLE.

Des olives.	58.b	Du pain.	69.b
D'huile.	58.b	De riz.	71.a
De l'orge.	59.a	De Robilium.	71.b
Des œufs.	59.a	De la rane.	71.b
Des pesches.	60.b	De la rue.	72.a
Des prunes.	61.a	Du rosmarin.	72.b
Des poires.	61.b	Des espinars.	72.b
Du pourpier.	62.a	Du cresson.	72.b
Du persil.	62.a	De sparagus.	72.b
Des pommes.	62.b	Du senenê.	73.a
De la pastenade.	63.a	De la semence du chenevis.	73.a
Des poissons.	63.b		
De la carpe.	65.b	Du sel.	73.a
De la truite.	65.b	De simula.	73.b
Du brochet.	66.a	De la saulge.	73.b
De la perche.	66.a	Des faulx chāpignōs.	74.a
Du saulmon.	66.a	Des grappes de raisins.	75.a
De l'anguille.	66.b	Des raisins de Karesme.	75.b
Des grenoilles.	66.b		
Des lamproyes.	67.a	Du vin.	76.b
Des cancre.	67.a	Du sucre.	81.a
Des gambres de mer.	67.b	Regime domestique, qu'un	
De la treille poisson de mer.	67.b	chacun doit garder pour	
		sa santé.	81.b
Des pignes de mer.	68.a	Des quatre parties de l'an.	
Des huîtres.	68.a		84.b
De cephalus poisson de mer.	68.a	Du prin-temps.	85.a
		De l'esté.	85.a
De l'esteuf poisson de mer.	68.b	D'Automne.	85.b
		De l'hyuer.	86.a
Des limaces.	68.b	Fin de la table ou repertoi-	
Des limaçons.	69.a	re de ce liure.	

EXTRAICT DV Priuilege du Roy.

PAr lettres patentes du Roy nostre sire, il est permis à
Vincent Sertenas libraire, demourant à Paris, d'imprimer
ou faire imprimer un petit liure, Intitulé Regime
de viure, & conseruation du corps humain. Et
sont faiçtes defenses à tous autres de l'imprimer, sur les pei-
nes contenues audict priuilege. Donné à Paris le vingt-
quatriesme iour de Mars, Mil cinq cens soixante & vn.
Signé DE COVRLAY.